

春秋左氏传 补注

赵
汧

文硕阁

wenshuoge.com

目录

关于我们 3

提要 5

原序 6

卷一 7

卷二 16

卷三 22

卷四 31

卷五 38

卷六 47

卷七 55

卷八 62

卷九 70

卷十 77

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 经部五

春秋左氏传补注 春秋类

提要

【臣】等谨案春秋左氏传补注十卷元赵汭撰汭尊黄泽之说春秋以左氏传为主注则宗杜预左有所不及者以公羊谷梁二传通之杜所不及者以陈传良左传章旨通之是书即采傅良之说以补左传集解所未及其大旨谓杜偏於左傅良偏於谷梁若用陈之长以补杜之短用公谷之是以救左传之非则两者兼得笔削义例触类贯通传注得失辩释悉当不独有补於杜解为功於左传即圣人不言之旨亦灼然可见盖亦春秋家持平之论也至杜预释例自孔穎达散入疏文久无单行之本今从永乐大典裒辑始复为完书陈傅良之章旨世尤罕覩汭所采録略存梗概固考古所亟取矣乾隆四十六年九月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

原序

春秋左氏传补注原序

春秋鲁史记事之书也圣人就加笔削以寓其拨乱之权惟孟子为能识其意故曰其事则齐桓晋文其文则史其义则孔子曰窃取之矣此三者述作之源委也自三传失其旨而春秋之义不明左氏於二百四十二年事变略具始终而赴告之情策书之体亦一二有见焉则其事与文庶乎有考矣其失在不知以笔削见义公羊谷梁以书不书发义不可谓无所受者然不知其文之则史也夫得其事究其文而义有不通者有之未有不得其事不究其文而能通其义者也故三传得失虽殊而学春秋者必自左氏始然自唐啖赵以来说者莫不曰兼取三传而於左氏取舍尤详则宜有所发明矣而春秋之义愈晦何也凡春秋之作以诸侯无王大夫无君也故上不可论於三代盛时而下与秦汉以来举天下制於一人者亦异其礼失乐流陵夷渐靡之故皆不可以後世一切之法绳之而近代说者类皆槩以後世之事则其取诸左氏者亦疏矣况其说经大旨不出二途曰褒贬曰实录而已然尚褒贬者文苛例密出入无準既非所以论圣人其以为实录者仅史氏之事亦岂所以言春秋哉是以为说虽多而家异人殊其失视三传滋甚盖未有能因孟子之言而反求之者至资中黄先生之教乃谓春秋有鲁史书法有圣人书法必先考史法而後圣人之法可求若其本原脉络则尽在左传盖因孟子之言而致其思亦已精矣洎自始受学则取左氏传注诸书伏而读之数年然後知鲁史旧章犹赖左氏存其梗槩既又反覆乎二传出入乎百家者又十余年又知三传而後说春秋者惟杜元凯陈君举为有据依然杜氏序所着书自知不能错综经文以尽其变则其专修左氏传以释经乃姑以尽一家之言陈氏通二传於左氏以其所书证其所不书庶几善求笔削之旨然不知圣人之法与史法不同则犹未免於二传之蔽也呜呼使非先生积思通微因先哲之言以悟不传之秘学者亦将何所寘力乎第左氏传经唐宋诸儒诋毁之余几无一言可信欲人潜心於此而无惑难矣间尝究其得失且取陈氏章指附於杜注之下去两短集两长而补其所不及庶几史文经义互见端绪有志者得由是以窥见圣人述作之原凡传所序事多列国简牘之遗名卿才大夫良史所记其微辞奥旨注有未备者颇采孔氏疏畅而通之诸牵合猥陋有不逃後儒之议者亦具见其说以极夫是非之公焉若夫不得於经则致疑於传务为一切之说以释经而无所据依以持其说则岂杜氏陈氏比乎故三传之外不可无辨证者惟二家他说固不暇及也新安赵汴序

卷一

钦定四库全书

春秋左氏传补注卷一元 赵汭 撰 隐公

是以隐公立而奉之【陈氏曰传言惠公再娶以起祸奉桓为太子自谓摄主皆隐之志今按传於篡公子皆详其母贵贱与君父宠爱之私以见祸乱所由起盖所得列国史志犹可考也礼诸侯一聘九女诸侯不再娶见庄十九年公羊传诸侯立子之制见隐元年何氏注後见文六年啖氏曰左氏得鲁晋宋齐楚郑等数国之史编次年月以为传记又广采当时文籍故兼子产晏子及诸国卿佐家传并卜书梦书及杂占书纵横家小说讽谏等杂在其中虽是非交错混然难证能令百代之下颇见本末因以求意经文可知】元年春王周正月【春秋虽修史为经犹存其大体谓始年为元年岁首为春一月为正月加王於正皆从史文传独释王正月者见国史所书乃时王正朔月为周月则时亦周时孔氏谓月改则春移是也後於僖公五年春记正月辛亥朔日南至昭十七年夏六月记太史曰在此月也日过分而未至当夏四月是谓孟夏又记梓慎曰火出於夏为三月於商为四月於周为五月皆以周人改时改月春夏秋冬之序则循周正分至啓闭之候则仍夏时其经书冬十月雨雪春正月无冰二月无冰及冬十月陨霜杀菽之类皆为记灾可知矣汲冢周书有周月解亦曰夏数得天百王所同商以建丑为正亦越我周作正以垂三统至於敬授民时巡狩祭享犹自夏焉其言损益之意甚明经书春烝春狩夏蒐以此盖三正之义备矣而近代说者往往不然夫以左氏去圣人未远终春秋二百四十二年以及战国之际中国无改物之变鲁未灭亡传於当时正朔岂容有差而犹或有为异论者何也盖尝考之曰殷周不改月者据商书言元祀十有二月而秦人以十月为岁首曰夏时冠周月者则疑建子非春而孔子尝欲行夏之时也按太史公记三代革命於殷曰改正朔於周曰制正朔於秦曰改年始盖正谓正月朔谓月朔何氏公羊注曰夏以斗建寅之月为正年旦为朔殷以斗建丑之月为正鸡鸣为朔周以斗建子之月为正夜半为朔是也殷周即所改之月为岁首故曰改正朔曰制正朔秦即十月为岁首而别用夏时数月故曰改年始其言之已详汉书律历志据三统历商十二月乙丑朔旦冬至即书伊训篇太甲元年十有二月乙丑朔伊尹祀于先王以冬至越蒞行事其所引书辞有序皆与伪孔氏书伊训篇语意不合且言日不言朔又不言即位则事在即位後矣凡新君即位必先朝庙见祖而後正君臣之礼今即位後未踰日复祠于先王以嗣王见祖此何礼也暨三祀十有二月朔奉嗣王归于亳是日宜见祖而不见又何也所谓古文尚书者掇拾傳会不合不经盖如此说者乃欲按之以证殷周不改月可乎又言後九十五岁十二月甲申朔旦冬至无余分春秋历周文王四十二年十二月丁丑朔旦冬至後八岁为武王伐纣克殷之岁二月己丑晦大寒闰月庚寅朔三月二日庚申惊蛰周公摄政五年正月丁巳朔旦冬至礼记孟献子亦曰正月日至七月日至其说皆与传合夫冬至在商之十二月在周之正月大寒在周之二月惊蛰在三月夏至在七月而太初历其在立冬小雪则曰於夏为十月商为十一月周为十二月唐人大衍历追算春秋冬至亦皆在正月孰谓殷周不改月乎陈宠曰阳气始萌有兰射干芸荔之应天以为正周以为春阳气上通雉鸣鸡乳地以为正殷以为春阳气已至天地已交万物皆正蛰虫始振人以为正夏以为春盖天施於子地化於丑人生於寅三阳虽有微着三正皆可言春此亦

历家相承之说所谓夏数得天以其最适四时之中尔孰谓建子非春乎乃若夫子答顔子为邦之问则与作春秋事异盖春秋即当代之书以治当代之臣子不当易周时以惑民听为邦为後王立法故举四代礼乐而酌其中夫固各有攸当也如使周不改时则何必曰行夏之时使夫子果欲用夏变周则亦何以责诸侯之无王议桓文而斥吴楚哉何氏哀十四年传注曰河阳冬言狩获麟春言狩者盖据鲁变周之春以为冬去周之正而行夏之时以行夏之时说春秋盖昉於此然何氏固以建子为周之春但疑春不当言狩而妄为之辞至程子门人刘质夫则曰周正月非春也假天时以立义尔则遂疑建子不当言春此胡氏夏时冠周月之说所从出也先儒见孟子谓春秋天子之事而述作之旨无传惟斟酌四代礼乐为百王大法遂以为作春秋本意在此故鄱阳吴仲迂曰若从胡传则是周本行夏时而以子月为冬孔子反不行夏时而以子月为春矣何氏之失又异於此故子朱子以谓恐圣人制作不如是之纷更烦扰错乱无章也薛氏又谓鲁历改冬为春而陈氏用其说於後传曰以夏时冠周月鲁史也是盖知春秋改周时为不顺而又移其过於鲁尔然谓鲁有历实刘歆之误按律历志言刘向所总黄帝颛顼夏殷周历及鲁历为六历自周昭王以下无世次故据周公伯禽以下为纪自炀公至缙公冬至殷历每後一日则由历家假鲁君世次逆推周正交朔之合否因号鲁历非鲁人所自为明矣宋书礼志又言六历皆无推日食法但有考课疏密而已是岂当代所尝用者哉刘歆惑於襄哀传文遂谓鲁有司历而杜氏因之谬矣然说者亦自病夏时周月不当并存故直谓春秋以夏正数月又疑若是则古者大事必在岁首隐公不当以寅月即位其进退无据如此固不足深辨而或者犹以为千古不决之疑则以诗书周礼论语孟子所言时月不能皆合故也夫三正通於民俗久矣春秋本侯国史记书王正以表大顺与颁朔告朔为一体其所书事有当系月者有当系时者与他经不同诗本歌谣又多言民事或用夏正以便文通俗书乃王朝史官记言之体或书月则不书时或书时则不书月况伪孔注二十五篇决非真古书其有合有否皆不可论於春秋周礼所书正月正岁皆夏正也诸官制职掌实循二代而损益之其着时月者又多民事与巡狩烝享自夏者同故仍夏时以存典故见因革盖非赴告策书定为一代之制者皆得通言之则又不可论於春秋矣若论语言莫春亦如诗书言春夏皆通民俗之恒辞也不可据以为周不改时孟子言七八月之间旱十一月徒杠成十二月舆梁成在左传後则周改月犹自若竹书又记晋曲沃庄伯之十一年十一月鲁隐公之元年正月也竹书乃後人用夏正追録旧史故与春秋不同然亦未尝辄以夏正乱春秋之时月也盖殷周改时月与所损益只是一理如尚齿之由贵德而贵富而尚亲亲迎之由庭而堂而户大事之由昏而日中而日出之类皆是迭进法所以顺天道通世变在当时自不为异故孔子以为百世可知非徒曰以易人之观听而已彼秦人以三代为不足法既不足以知之而後之蔽於今而不知古者亦不足以言之也自啖赵而後学者往往习攻左氏而王周正月为甚以其尤害於经特详着焉】不书即位摄也【传言史不书即位皆以故废谷梁氏不知礼有摄主之我妄以隐为让说者因疑传言摄为非孔氏曰膏肓何休以为古制诸侯幼弱天子命贤大夫辅相为政无摄代之义昔周公居摄死不记崩今隐公生称侯死称薨何因得为摄者周公摄政仍以成王为主直摄其政事而已所有大事禀王命以行之致政之後乃死故卒称薨不称崩隐公所摄则位亦摄之以桓为太子所有大事专命以行摄位被杀在君位而死故生称公死称薨是与周公异也且公羊以为诸侯无摄郑康成引公羊难云宋穆公云吾立乎此摄也以此言之何得非左氏下传曰公摄位而欲求好於邾是位亦摄也所以异於正君者元年不即位行还不告庙不临惠公之葬不成声子之丧尊仲子为夫人薨则赴於诸侯又为之

立庙此是谦之实也苏氏曰礼记曾子问君薨而世子生如之何孔子曰卿大夫奉摄主於西阶南面古者天子诸侯卿大夫世子未生而死若生而弱未能君也则其娣侄之子次当立者为摄主故隐公亦摄主也黄先生曰先君失礼再娶非臣子所当议隐公摄位以俟桓长得事之宜不可言让】贵之也【陈氏曰传释未爵命之君恒称名於是特书字且见春秋之初诸侯犹禀王命】非公命也【传见国史有不书之法盖指策书正史言之非公命不登于策所以重正史而致其严故杜氏谓小事简牒而已左氏世为国史凡经不书而简牒有据者悉取以为传其经首所发不书之义皆史例也外事如崩薨卒葬盟会侵伐胜败祸福经不书而未得其说者间亦推史例以释之盖其所知者惟此而已由策书正史夫子所据以施笔削者左氏亦未及见故不能有所发明此经旨失传之由也杜氏修传例以释经凡传见其事而经无者於内则曰非公命不告庙於外则曰从赴告不赴告遂以史例为经义而不复知有圣人笔削之权诸称书不书先书故书之类槩以为孔子新意故啖赵以後说者皆非之】遂恶之【史记郑世家姜氏生太子寤生生之难及生夫人弗爱盖以为难产也】讥失教也【陈氏曰传释讥君例】难之也【陈氏曰传释不书奔例且言以克为重今按此春秋特笔也杜氏以为夫子改正旧史孔氏谓准鲁史之法惟当书郑伯之弟段出奔共其说皆是盖辞旨卓异非史氏所及也】遂为母子如初【於此见传兼取杂书小说不尽出诸国史记後蔡姬荡舟曹共观裸之类皆然】且子氏未薨故名【传以宰咺为冢宰如宰周公之比故必贬而後名之春秋不以名号为褒贬在鲁史亦无责王臣之义左氏见鲁史有以贵之而书字者若邾仪父是也有以卑之而降爵者若杞子是也因执之以为褒贬之法此一字褒贬之繆所从起也孔氏曰周官宰夫凡邦之吊事掌其戒令与财币器帛既掌其事或即充使吴先生曰王朝中士恒称名宰者其人之姓皆得之陈氏曰缓且子氏未薨故名以下疑後人增益之杂记有大夫士讎於他国之君之礼则不但同位外姻也且文九年秦人归成风之襚传曰礼也诸侯相吊贺虽不当事苟有礼焉书也以无忘旧好则赠不及尸吊不及哀非礼也与文公传自相违今不取】豫凶事【说者多疑传妄朱子曰古人不讳凶事如国君即位为禘之类】夷不告故不书【夫子笔削是据策书所有策书所无者不复论杜氏援隐十一年庄二十九年传例为证已得其旨陈氏误以左氏不书之例为笔削之法因谓左氏所记皆为鲁史旧文其不见于经者悉夫子所削遂疑隐十一年传例为後人依仿既非经旨亦失传意後传之蔽在此由不知述作本原故也】亦不书【啖氏曰春秋纪异多矣何必为灾乃书】太子少【黄先生曰传见惠公在时桓公已称太子】不见公亦不书【弗临改葬不见卫侯传因见隐摄之实】公孙滑出奔卫【凡贱者奔史不书鲁史之法大夫非卿名氏不登于策穀梁谓之卑者公羊谓之微者公子尊与卿等公孙降於公子与微者同】郑人以王师【传见郑为卿士私用王师史不书非王命後见五年凡王师令不及鲁亦不书陈氏云隐桓以来王师皆不书非也】虢师【号畿内封国与王师同】伐卫南鄙【传见经或不悉书凡不悉书皆以举重见义郑伐卫不书举重见下年】亦非公命也【传三发非公命及公子翬固请会师见隐摄位之初诸大夫不知禀畏】非王命也【陈氏曰传释不书使今按此亦史例】公不与小斂故不书日【陈氏曰传见崩薨卒葬以日月为例非必不书日皆以公不临丧也今按此不书日亦史例也其公实不与小斂而书日者事变不同非恤典薄也杜氏释例论之甚详至於崩薨卒葬亦不能推以知例陈氏於此略发其端竟亦不复深考他书盟会征伐等皆以日月为例乃笔削之法左氏学者所不及知说见属辞其君临大斂礼说见襄五年】二年司空无骇入极【鲁司空卿官无骇公孙也以摄卿书名谷梁传曰隐不爵大夫是也传於鲁卿每不书其官此

见无骇不阙属而未得其说故见其官以明为卿犹未敢以入国发贬例後於翬溺乃云疾之无据明矣说又见後四年孔氏曰春秋之例诸名书於经皆是卿也传言司空故知无骇是鲁卿又王制云上大夫卿则卿亦大夫也故注多以大夫言卿其名见於传而注云大夫者则其爵真大夫也】纪子帛【陈氏曰子帛裂繻字盖杜氏意之学者遂以駁左氏误矣】三年赴以庚戌故书之【说者多讥传妄按盟会战伐经书月日传每略之不书月日者传则详之意在互文相备非无所据者其崩卒伪赴亦必有考借令构虚亦不至是陈氏曰义同隐元年且见崩卒从赴後见桓五年陈侯僖七年惠王十四年齐舍襄十九年齐侯二十八年灵王】故不言葬【孔氏曰此传故上三事故下三事文不以次相配者初死即赴葬乃反哭反哭之後始祔三者依事之先後为文也至书於经则夫人与薨共文故先言不称夫人後言不书葬顺经之先後为文也薨者夫人之死号不称夫人必不称薨小君者夫人之别号不称夫人必不得称小君盖赴祔二礼果行一事则具此三文所异者若不书葬则小君之文无所施耳今按成尊以赴同为重故赴于诸侯则称夫人者仲子是也成丧以反哭为重故不反哭则不书葬者孟子是也声子二事皆不行故不称夫人亦不书葬此於史例必有所考惟祔姑则与书法无与盖声子仲子皆非适本不当祔非宜祔而不祔也仲子称夫人不待祔姑则声子不称夫人何關於不祔乎後世固有妾母而祔者若适母则无不祔之理定十五年定姒卒传曰不称夫人不赴且不祔也盖由声子不祔而意其或然观此年传例三事与书法铨配无序而仲子薨无传岂非所考史例有未备者乎说又见定十五年】为公故曰君氏【君氏者摄女君之称此特笔也说见属辞】王貳于虢【洪氏曰左传议论遣辞颇有害理者传云王貳于虢又云王叛王孙苏夫以君之於臣而言貳与叛晋平戎于王单襄公如晋拜成刘康公徼戎将遂伐之叔服曰背盟而欺大国不义莒弘事刘文公故周与范氏赵鞅以为讨夫以天子之使出聘侯国而言拜成谓周於晋为欺大国诸侯之卿跋扈於天子而言讨皆於名分为不正今按下云交质交恶并称周郑又云结二国之信无复君臣之辨周衰大义不明故记事者亦昧於伦理又其事或出杂书小说故语无尊卑韩宣子见鲁春秋曰周礼尽在鲁矣盖以此】郑公子忽为质於周【质子虽史不书此事或在春秋前】又取成周之禾【周四月今二月麦岂可取传欲见平王崩郑首畔王室故附见其事於此不计其时月之不合下言秋取禾与宣七年赤狄取向陰之禾同杜於彼知阙秋者以苗秀乃名为禾夏则无禾可取也於此乃训秋为夏五月而取麦取禾皆以芟踐言之则下文有八月而迁就其说也传书时每有不异下月者有重书时以起事者其书月日亦多有不合於经者有自相抵牾者杜氏於宣二年传注则以为传无较例哀十二年传注则以为传本不以为例故不皆齐同况此无经之传岂能无失由注文护短近人遂疑传杂夏正】周郑交恶【陈氏曰为桓五年王伐郑传後又见六年十一月】昭忠信也【凡传中所引君子曰云者义皆肤浅与其序事之精如出二手盖其序事精凿者皆史志成文而断论则左氏之陋见也杜注每曲为之义固不足深辨後儒并其事实一切疑之则又过矣】王未葬也【言未葬则求赙之由与不称使不名之义皆见】命以义夫【此事当以公羊之说为正陈氏曰为桓二年宋弑殇公立冯发例】嬖人之子也【陈氏曰传见州吁不称公子按刘侍读曰诸弑君公子而不称公子公子之未为大夫者也其义当与齐无知同皆史例也】四年卫人来告乱【陈氏曰传言所以书遇】公子冯出奔郑【陈氏曰凡公子奔非其罪不书今按前言使冯出居於郑原宣公之意而言此言出奔又自庄公忿怨言之两通其义也】围其东门【陈氏曰传言经所以不书围与成十七年晋围郑襄十年楚围宋同义今按经言伐郑传言围其东门是不成围也当於成十七年发例】五日而

还【陈氏曰凡还不书见庄八年襄十九年特书今按师还虽史不书以侵伐战败自足见义也惟襄十九年晋士匄侵齐至谷闻齐侯卒乃还为不成侵故史详其所至书还善不伐丧非达例若庄八年书师还乃夫子改公至之文为国讳恶与史法不同】宋公使来乞师【陈氏曰传见外乞师不书惟晋特书之】翬帅师疾之也【叶氏曰传不明不氏及帅师之义但见翬弑君者疑其强而自恣经直书翬帅师与後言公子翬者异其辞若贬然故妄意之今按翬与无骇溺侠称名皆当从二传未爵命为正左氏不知此义见翬溺不书属而事恶皆曰疾之至桓三年翬始称公子不得其说则曰修先君之好故曰公子由所考史法未备又不能阙疑故也】取其禾而还【书伐则败之不书策书举重】卫人立晋衆也【公羊传曰称人衆之所欲立也义同】五年公将如棠观鱼者【孔氏曰鱼者犹言猎者今按古字鱼渔通】陈鱼而观之【经言矢鱼传言陈鱼以陈训矢也周官 人掌以时??与鱼同言陈设?人之事也杜注意未尽故说者皆从二传经作观鱼朱子曰春秋征只书征伐只书伐不曾恁地下一字据传公不射则矢鱼是将弓矢去射之此说与叶氏同古者季冬命渔师始渔天子亲往射鱼出淮南子时则训如此则鱼为如字然传載僖伯谏辞甚详而但曰陈曰观必有所据】翼侯奔随【陈氏曰为庄十六年王命曲沃伯为晋侯张本见晋自献公以前经皆不书今按献公末年晋鲁始通前是告命不行非作经时削之也】卫人以燕师伐郑【上年书四国再伐郑继书卫人杀州吁立晋则大义已明诸侯罪恶自着故郑卫连兵不悉书】而立哀侯于翼【传见王室犹能废置诸侯後又见庄十六年】公问羽数於衆仲【陈氏曰传言经所以书初献】大夫四士二【公谷皆云天子八诸公六诸侯四刘侍读曰衆仲不知诸侯名位不同礼亦异数因天子八佾遂兼称诸侯六佾其曰士二亦非也特性少牢皆士礼也无用舞之处安得二佾而施之周礼舞师之职凡小祭祀则不兴舞小祭祀王者服玄冕之祭也士服玄冕反舞之乎衆仲之误无疑其说盖主二传汪仲裕曰乐舞之数自上而降杀以两诸侯既降於诸公则诸伯当降於诸侯而为二佾矣子男复何用乎礼经所记庙堂之制袞旒席数五等诸侯皆同岂以乐舞而独异其制乎此说与刘氏异盖主衆仲然刘氏言士无用舞之处汪氏言五等诸侯佾数不当有异皆据周礼可正三传之失】宋人取邾田【陈氏曰外取田皆不书】伐宋入其郛【陈氏曰入郛皆不书至文十五年齐特书】宋人使来告命【凡微者虽接我史不书後仿此】六年郑伯侵陈【陈氏曰隐桓之际侵未见於经今按下年记陈郑交洫盟且成昏则此侵或不告凡侵人者亦未必自告陈鲁无盟好告命或未通皆所当知其笔削之旨举重不悉书不得有二义】公为之请衆於宋卫齐郑【陈氏曰传言常事虽内不书今按京师於列国不可言告衆既实是衆不得言归粟又不可但言告饥来者微故皆不书于策凡言饥言告衆皆非常事】七年谓之礼经【据经诸侯不同盟者凡五十二人不书名九人余并书名故僖二十三年传又曰赴以名则书之然儒者皆不信其说今推较经传以求当时事情则未同盟而名者必姻邻同姓诸大国也其相与者素厚则未同盟而赴以名不为卑春秋之初小国之君未同盟则不名者宿杞滕薛是也其相与者薄而得礼焉则虽小国不为简其後无不名者不敢为异也春秋之末未同盟而赴以名後复不名者秦也秦处西戎始焉於赴告之礼犹未能详其後以远於我而相与者薄又得礼焉则虽不同於姻邻诸大国亦不为简也比事考之乃知左氏不诬但春秋之後周典散失左氏采合残缺傳以已见略示凡例凡五十条杜氏一切定为周公所制而不考其不通於经则亦陋矣】结艾之盟也【传释列国之聘有三一结好二结盟三通嗣君今考结好而聘者则有报若庄二十五年陈女叔来聘而冬季子如陈是也结盟与通嗣君而聘者皆不报盖礼薄与交聘异也若伯国之聘与国秦楚之

窥上国而来者其事体又各不同传皆随事释之盖犹有考也】宋及郑平【陈氏曰凡平不书至宣十五年始书之】盟于宿【凡平而後盟不书亦史例也】陈五父如郑洩盟【外洩盟事浅不告】八年不祀泰山也【刘氏曰注云桓元年乃卒易祊田知此入祊未肯受而有之非也经云入祊者既入之矣又何未肯受而有之乎桓元年传云郑伯以璧假许田为周公祊故也此自传误隐公时郑人归祊者郑自欲与隐公也桓元年以璧假许田桓公以许田与郑真易璧也传乃并而言之谓郑人以祊易许不顾隐八年已有我入祊之文今按易地之说三传如一而谷梁传尤详不应其误适同以传证经知左氏不误春秋书外归邑未有书我入者经既书郑来归祊复书我入祊何也盖祊远於郑郑不能有而请易于鲁鲁人虑祊不服故以兵入焉亦如苏忿生之田桓王不能有而後与郑阳樊之田襄王以与晋不服而後围之公羊传曰言入难也穀梁传曰入者内弗受也左氏传例曰弗地曰入其说皆是实未能有其地也杜氏谓鲁未肯受而有之固昧二传之旨刘氏以入祊为遂有其地由轻弗地之训於经书入祊之义皆失之桓元年传曰郑人请复祀周公卒易祊田则我入祊後事尝中辍桓公篡位而修好于郑故复许之无可疑者近代学者率谓祊与许田是二事遂疑祀周公为左氏附益不亦过乎】始作卿士于周【陈氏曰传申言郑虢之隙】会于温【春秋诸侯之事有不以告而史不书者有虽告而并入所重书之者凡一役再有事理亦无不告者会温以瓦屋之盟为重并下事书之笔削举重之义盖取诸此杜氏但以不告後人遂疑传妄皆非也陈氏曰不书郑郑不成平事在十年】公命以字为展氏【陈氏曰传言不书族有非必贬之者因见春秋之初大夫有卒而赐族者矣刘氏曰杜氏云无骇公子展之孙非也若无骇真公子展之孙当其继大宗也赐氏久矣何待死而後赐氏乎且礼云公孙之子以王父字为氏非言其死而後氏之也然则无骇固公孙羽父请族者为无骇之子请也若公孙之子死然後赐族则无骇为终身无氏矣】九年平地尺为大雪【刘氏曰经有电无霖传有霖无电传不解经杜氏专谓经误不亦惑乎三日之雨岂非常者若雨三日以往必书是二百四十二年三日雨者一而已陈氏曰凡例义浅今不取】以王命讨之伐宋【传见王命犹讨不庭不书并下年】郑人以王命来告伐宋【伐宋不书王命者王人不出则经无异文也】北戎侵郑【春秋之初戎狄侵中国不书齐桓既伯始书之】郑人大败戎师【陈氏曰隐桓庄闵春秋凡中国败戎狄不书至僖三十三年始书之】十年盟于邓为师期【此盟与下老桃之会不书杜氏皆以为不告庙然公既亲其事理亦无不告庙者盖既会而盟为师期与襄二十七年传赵孟子暂将会而盟以齐言相类既盟而会师非复期会皆以中丘为重】羽父先会齐侯郑伯伐宋【陈氏曰传言齐侯郑伯见君将贬书人今按一役再有事略称人春秋初无一字褒贬之义杜氏谓君臣不当同贬称人凡经书人而传见是君大夫将者或以为别使微者将或以为以微者告由惑於褒贬故也】公会齐侯郑伯于老桃【陈氏曰为下文公败宋传举重不悉书今按此实史例说见前】辛巳归于我【陈氏曰传言经蔽罪于鲁】正之体也【君子曰之陋说已见前後不复辨】郑伯入宋【自宋公欲以诸侯伐郑去冯连兵至此其报复之祸烈矣然祸首在宋而郑实有王命故春秋诛首恶而忿兵之过不悉书】讨违王命也【先儒颇疑此为郑人矫假以经证经凡外入国不日而入郕书日与晋侯入曹同法经固有以别之矣】十一年许庄公奔卫【陈氏曰凡诸侯被兵而出者不书奔】奉许叔以居许东偏【陈氏曰传言经所以书入】宋不告命故不书【归祊之後鲁郑同心仇宋宋宜不告鲁郑必以告也传不知经有举重不悉书之义惟以史例推之故不通】不书于策【曰告则书曰不书于策显发史例陈氏误以经旨格之故以传例为後人依仿】弑公于寯氏【陈氏曰传言经不书

丧地】不成丧也【传言不以君礼成丧故史不书葬陈氏谓修春秋者不成之为君误矣定姒不书小君王子猛卒同】

桓公

元年凡平原出水为大水【陈氏曰凡例义浅今不取】郑伯拜盟【陈氏曰终越盟传言拜觐拜辱拜嘉之类非必君身亲之杜说非是今案若郑伯身来与吾君接无不书之理】华父督【华父字也如言弗父何公父歟与孔父嘉五世别族者不同督公孙也无赐族之法宋太宰位六卿下一命恒称名陈氏谓隐桓庄春秋凡贼皆名之非也】美而艳【传惑於小说每类此说又见襄三十一年】二年遂弑殇公【叶氏曰孔父宋卿督其大夫杀卿取妻犹居位不去待君怒而始惧不近人情甚矣今案下文宋殇公立以後事核语精已尽其罪为欲妄解书法遂赘此数语】故先书弑其君【传不知以君及臣之义】立华氏也【言立以为卿注谓未死赐族非也庄三十二年传立叔孙氏注云立後说者亦谓赐族然叔牙之子经书公孙兹兹之子得臣乃氏叔孙则非赐族明矣彼非赐族则此言立华氏岂赐族乎】召庄公于郑而立之【陈氏曰立不书隐四年昭二十三年特书之】不忘谏之以德【陈氏曰传言桓公继故羽父不讨哀伯虽不斥言意已独至】始惧楚也【陈氏曰为楚浸强张本今案史记楚世家蚡冒弟熊通弑蚡冒而代立三十五年伐随谓随人曰今诸侯皆为叛相侵或相杀我有敝甲欲以观中国之政请王室尊吾号随人为之请尊楚王室不听三十七年熊通怒曰吾先鬻熊文王之师也早终成王举我先公乃以子男田令居楚蛮夷皆率服而王不我位我自尊尔乃自立为武王楚武王二十九年鲁弑隐公则伐随在桓六年称王在桓八年也】讨不敬也【讨不敬者鲁人责其玉帛之将不备而为之辞传固録实非所以释经】策勲焉礼也【告庙饮至策勲乃反行常礼皆同时於庙中之策勲即书至襄十三年春公至自晋传曰孟献子书劳于庙是其事也亦由告庙饮至然後书至不告庙饮至则不书至也传于桓十六年至自伐郑曰以饮至之礼也皆非杜氏释不书至者以为不告庙盖本此不知书至有笔削也说又见宣五年】来称会成事也【此鲁史旧法陈氏槩以笔削求之故不取】启曲沃伐翼【陈氏曰於此见传追书之体】三年故曰公子【刘氏曰非修先君之好而称公子多矣今案成十四年传发称族舍族例此下无以夫人至之文故别生此义可见传例多无据】四年執芮伯以归【陈氏曰王执诸侯不书因见秦自穆公以前经皆不书今案秦自穆公以前告命不通於鲁】五年再赴也【陈氏曰传申言卒日月例今案此乃史氏传疑之法亦所以避不敏赵氏疑甲戌下当记陈佗作乱事今简脱之盖不知经有两下相杀不书之义】文公子佗杀太子免而代之【陈氏曰不书杀免凡太子未即位遇害不书】王亦能军【传见周衰天子自将以征诸侯陈氏曰不书败绩于郑为天子讳见成元年特书之】仍叔之子弱也【来聘在夏释在秋伐郑後者由下重言秋错误也杜氏因谓久留在鲁过矣孔氏疑将伐郑而遣告鲁事或有之】闭蜚而烝【三代正朔不同故一以节气为限】过则书【书以志慢亦鲁史旧法考获麟後时祭不书可见如时祭悉书于宋亦不胜书矣】遂不复【张氏曰州公与祭公同州必畿内之地河内州县是也今案州公既如曹先使告鲁故书明年但书寔来以此】六年楚武王侵随【陈氏曰楚事始见于传至庄十年败蔡始见於经盖自楚王熊达以上皆略不书今案熊达即熊通自熊达以上楚未与鲁通传具载其伐灭小国志在兼并诸夏见中国不可无伯齐桓所以有功】使鲁为其班後郑【刘炫氏曰使鲁为班明鲁在矣见

经不书陈氏曰凡诸侯交戌虽内不书】七年名贱之也【传释邾仪父书字曰贵之杞书子曰卑之故以二君书名为贱之邓谷远国于鲁无朝事之礼与邾杞事异以贱之称名非人情也由其初不相通随即灭亡特名以详之且以别於与国之来朝者】八年王命虢仲立晋哀侯之弟缙于晋【陈氏曰王命诸侯不书今按王室不以立缙告诸侯晋又不告立君史亦无由得书】九年惟王后书【孙氏叶氏陈氏皆以庄十八年传见惠王后陈妫宣六年传见定王后齐姜驳例与传违按二后皆见於传何苦自相违异盖传例乃鲁史旧法二后非鲁主昏故夫子削之特存鲁主昏者以见义】十年故虞公出奔共池【畿内诸侯不与鲁通传博采衆籍为虞灭起本】齐人以卫师助之【赵氏曰鲁以周班後郑既是正礼郑亦小恨岂至兴师又经五年後方合诸侯报此小怨乎今按齐方图纪而鲁为纪归女于天子此齐之所怒但以鲁桓新昏于齐故使郑忽以旧怨为辞耳左氏追録往事多未备亦或舍大言小不可槩斥为妄】王爵也【诸侯以爵序大夫各如其班鲁史恒法也自非伯者无以主兵先诸侯之例传赘杜说非】十一年盟于恶曹【此齐卫郑称人即上文战郎诸侯也用一事再见书人例经无宋传衍文宋亦不当叙郑下注云经阙非】祭封人仲足【陈氏曰传见祭仲足不书名则书字有非必贵之者】有宠於宋庄公【陈氏曰传言宋庄公见执貶书人今按凡执恒称人称君者经变文也】求赂焉【春秋之初诸侯以贪起乱其後伯主以贪废法其末也晋大夫以贪失诸侯传具见其事】十二年句渚之丘【燕人在会传欠考後年春战有燕人盖党于宋】遂帅师而伐宋【陈氏曰传见公在不书郑伯书师今按此一事再见用衆称师之例不书公蒙上文】十三年不书所战後也【杜氏曰所者期战所在之地也孔氏曰两敌将战必豫期战地纪郑已与齐宋先设战期公不及设期而及其战此地非公所期故不书刘氏曰公虽不及其会期而及其战期自当举战地何故反没战地乎今按会期轻战期重刘氏驳之是矣传见此年战不书地僖二年城楚丘文七年盟于扈皆不序诸侯而不得其说俱以後至释之至文十五年盟于扈十七年会于扈复不序则又别生他义传例出於一时传会明矣说并见後笔削之旨见属辞】十四年书不害也【郑渔仲曰庙祀必十日戒享越三日而尝则粢盛已出廩壬申致斋之初乙亥尝非灾之余也】取牛首【陈氏曰传见自桓公春秋外取邑皆不书】十五年诸侯不贡车服【陈氏曰按周官九贡有服贡传未必左氏之旧今按周官虽左氏亦未尝见考传可知】弗克而还【实不成纳陈氏谓不书纳误矣】十六年以饮至之礼也【说见前二年】书时也【杜氏曰下有十一月此城向亦是十一月但本事异各随本而书之耳经书夏叔弓如滕五月葬滕成公传云五月叔弓如滕即知称时者未必与下月异也啖氏曰按下有十一月纵是同月亦今之九月农工未毕不可兴役今按土功自戒事至毕功非止一月之事故城筑皆时而不月兼春秋城筑多为备敌兴工得时非时本无足议传既发不时之义於此言书时疑若美之故为後人所议】又杀之【陈氏曰凡杀诸子不书】立公子黔牟【陈氏曰不书立黔牟以朔奔为义】十七年又何谒焉【陈氏曰传言得公命故书因见微者之义】蔡人嘉之也【蔡季不名与季子许叔同皆经变文以别於有罪者传不知经有笔削惟以史法推之故不通陈氏曰传释凡归皆讥也於是特书字因以见十五年许叔】官失之也【官即日官天子掌历者言日食不书日由历数之失致日食不在正朔故经不书日意与公谷不异後於文元年记闰三月又襄十七年记再失闰昭二十年二月记日南至哀十二年十二月云火犹西流皆见东周历法无传刘歆所总六历俱非古法】日官居卿以底日礼也【孔氏曰周礼太史掌正岁年以序事颁告朔于邦国然则天子掌历者谓太史也太史下大夫非卿传言居卿则是尊之若卿】弑昭公而立公子亶【郑弑君不书者

鲁人君突而绌忽郑不告】十八年齐人杀彭生【陈氏曰杀彭生不书嫌讨贼也杜氏不书非卿说非是公子书杀不必皆卿今按史既讳戕书薨则杀彭生必不後书】齐人杀子亹而轅高渠弥【不书义同昭公】遂与王杀周公黑肩【陈氏曰不书杀周公凡天子杀大夫不书】

春秋左氏传补注卷一

卷二

钦定四库全书

春秋左氏传补注卷二 元 赵汭 撰 庄公

【陈氏曰庄公自元年至七年及十九年以後迄终篇无传疑有佚坠】

元年文姜出故也【啖氏曰遇弑则嗣子废即位之礼左氏不达其意而云文姜出故也不举其大而举其细今按传於庄闵僖不书即位发义不一皆未当从二传继弑君子不言即位为是姜氏与弑而还不知在何月史记亦言夫人因留齐不敢归其归而复孙则由父兄百官衆怒羣诮责以桓公见弑之由应无告庙书至之礼其孙而复还则庄以孤童思之於内而仇襄以势胁之於外而归之尔以後不书其至乃笔削之旨孔氏曰传言不称即位为文姜出故则即位之日文姜未还经书三月夫人孙于齐则是来而复去若经无还文即言留齐不反则自是以後亦无还文二年夫人会齐侯于禚岂复自齐会之哉】絶不为亲礼也【夫人不称姜氏承上文公与夫人姜氏如齐用一事再见之例略之此经之变文也夫人罪宜絶但传以去姜氏发义则非左氏先儒取二传为说言庄公为父絶母得礼尊父之义而未尽杜氏谓文姜宜与齐絶愈失之矣以後会齐侯如齐师悉书姜氏又何说乎】为外礼也【赵氏曰为雎主昏纵在城外岂为礼乎今按齐襄贼鲁桓鲁人责姜氏而归之齐襄将亲迎於鲁之国都以礼接於其庙其中岂无所忌哉於是要鲁为筑馆於国门之外而後亲迎曰在丧改筑者为之辞也王姬至以夏而秋方筑馆历三时乃归于齐于外非礼明矣】三年疾之也【辨已见前陆氏曰不命之卿例不书氏不可别为义】缓也【桓十五年春天王使家父来求车三月乙未天王崩则求车者所以共丧具也然桓王犹七年乃葬者王室衰微莫甚於此时天子之丧礼备费重诸侯赙赠不归故久弗克葬观平王崩武氏子来求赙而鲁遂不会葬则诸侯怠慢不臣可见矣然则谷梁传云却尸以求诸侯者亦当时之情也】纪於是乎始判【孔氏曰传言纪侯不能下齐以与纪季非叛也纪亡之後叔姬归于鄫明为附庸犹得专鄫故可归也附庸之君虽无爵命而分地建国南面之主得立宗庙守祭祀】郑伯辞以难【陈氏曰杜氏厉公在栢故说非是郑伯即厉公说见胡氏今按杜氏疑下年遇垂郑伯为子仪按齐侯杀子亹而祭仲立子仪子仪非齐侯所立陈侯又突之党二国必不成子仪为君而与之会此郑伯为厉公无疑杜氏并失传意说又见十四年】过信为次【传见宿师非过信不书说者议之皆过】四年违齐难也【陈氏曰传见纪侯所以不书奔】五年未王命也【陈氏曰传释书名有非必贬之者】纳惠公也【陈氏曰不书纳以朔入为义】六年王人救卫【传见特书字】卫侯入【陈氏曰按传言诸侯纳朔书入见成十八年国逆例非是】为不度矣【刘氏曰朔比衍黔牟比剽左氏君剽而退黔牟存朔而絶衍赏罚无章莫此为甚今按左氏断论与所序之事不合者多此以二公子立黔牟为不度与後讥随以汉东诸侯叛楚为不量力同故君子讥其好以成败论人然不害其事之有据】文姜请之也【叶氏曰经言卫俘传作卫宝公谷亦作卫宝故杜氏遂疑经误按经云齐侯来献捷楚宜申来献捷传以捷为俘则经盖以俘为宝以捷为囚当从经不必改俘为宝也胡氏曰商书称俘厥宝玉则俘者正文宝者释辞也】灭之【陈氏曰於此见传终书之体今按传记楚灭凡十一国见宣十二年传注】七年不

害嘉谷也【传释书大水不言饥也宣十年秋大水冬饥此年秋大水但言无麦苗而不言饥者以黍稷可更种也刘氏疑不害嘉谷是水不为灾不应书大水盖不考书大水复书饥之义】八年治兵于庙礼也【刘氏曰治兵非其时何谓礼乎庙中非治兵之地若师出先谋於庙则可今按孔氏谓治兵于庙者告於庙习於巷也但传终未尽又其所谓礼者往往取一节之合忘大体之非故说者得以议之後不复辨】公曰不可【陈氏曰传言公在书师胡氏曰传称仲庆父请伐齐师庄公不可是国君上将亲与围郕之役也今按或云此乃公在国之言非也隐五年传郕人侵卫牧故卫师入郕则郕近卫使公果在国庆父何以请伐齐师也】君子是以善鲁庄公【书师书还皆经变文为国讳耻传谓善庄公杜氏谓因史旧文由不达变文之义】生公孙无知【传见无知不称公孙】二人因之以作乱【陈氏曰传见连称管至父实弑君而蔽罪无知】奉公子小白出奔莒【陈氏曰公子奔非其罪不书例在隐四年余放此且见小白不称公子】奉公子纠来奔【史记襄公次弟纠奔鲁其母鲁女也次弟小白奔莒其母卫女也按此知公子纠鲁出也故来奔而鲁纳之鲁女班当在卫女上则子以母贵而次又居长见纠应立可补传文之阙陈氏曰奔非其罪虽接我亦不书杜氏不书皆非卿也说非是经书公子不必皆卿】九年齐无君也【孔氏曰齐大夫来盟于莒直是子纠之党来迎子纠小白之党犹自向莒迎小白也若其举国同心共推子纠来迎即宜付之不须以盟要之今既与盟而兴师送纠是各自有党须伐乃得入也昭十三年传称桓公有国高以为内主则国子高子是小白之党也陈氏曰传言大夫不序有非必贬之者】桓公自莒先入【晋叔向论桓公所以得国者见昭十三年传史记小白自少好善大夫高傒及雍林人杀无知议立君高国先陰召小白於莒及鲁发兵送子纠至齐则小白已入亦有国高内应故得先入立孔氏曰彼迎小白既早公送子纠又迟公伐齐纳子纠始行即书小白入齐得告乃书故至齐之时出小白之後也吴先生曰小白之立盖齐国公议为社稷计也】传乘而归【陈氏曰传见公在不书】鲍叔帅师【陈氏曰传见鲍叔书人今按鲍叔非卿齐杀子纠亦不得蔽罪一人】公从之【管子小匡篇曰桓公自莒反於齐使鲍叔牙为宰鲍叔辞曰君有加惠於臣使臣不冻餒则是君之赐也必若治国家则非臣之能也其唯管夷吾乎公曰管夷吾亲射寡人中鉤殆於死今乃用之可乎鲍叔曰彼为其君勤也君若宥而反之其为君犹是也公乃使鲍叔行成管仲至於堂阜之上鲍叔被而浴之三桓公亲迎於郊遂与归礼之於庙三酌而问为政焉外传齐语桓公问曰昔吾先君襄公筑台以为高位田狩罝弋不聽国政卑圣侮士而唯女是崇优笑在前贤材在後是以国家不日引不月长恐宗庙之不埽除社稷之不血食敢问为此若何管子对曰昔者圣王之治天下也参其国而伍其鄙定民之居成民之事桓公曰成民之事若何管仲对曰四民者勿使杂处处工就官府处商就市井处农就田野少而习焉其心安焉不见异物而迁焉是故其父兄之教不肃而成其子弟之学不劳而能夫是故士之子恒为士工之子恒为工商之子恒为商农之子恒为农其秀民之能为士者必足赖也桓公曰定人之居若何管仲对曰制国以为二十乡桓公曰善於是制国以为二十乡工商之鄉六士乡十五公帅五乡焉国子帅五乡焉高子帅五乡焉桓公曰吾欲从事於诸侯其可乎管仲对曰未可国未安桓公曰安国若何管子对曰修旧法择其善者而业用之作内政而寄军令焉桓公曰善於是制国五家为轨轨为之长十轨为里里有司四里为连连为之长十连为乡乡有良人焉以为军令五家为轨故五人为伍轨长帅之十轨为里故五十人为小戎里有司帅之四里为连故二百为卒连长帅之十连为乡故二千为旅乡良人帅之五乡一帅故万人为军五乡之帅帅之是故卒伍整於旅军旅整於郊祭祀同福死丧同恤灾祸共之居同乐行同

和死同哀是故守则同固战则同强以诛无道以屏周室天下大国之君莫之能御今按晋文公作三军三行传备载之桓公管仲内政之法顾缺弗录故附见於此】十年齐师伐我【陈氏曰不书来伐义重书败】齐师败绩【传序长勺之战甚详经书败者变文也杜氏胶於传例未陈之说乃曰列成而不得用穿凿甚矣详见後】齐师乃还【按檀弓记乘丘亦战也义与长勺同说见属辞】以蔡侯献舞归【杜氏以蔡季献舞为一入何氏桓十七年公羊传注曰蔡侯封人无子季次当立封人欲立献舞而疾害李季辟之陈封人死归反奔丧卒无怨心以为二人也然杜氏不从者史记蔡世家但言桓侯卒弟哀侯献舞立献舞为桓侯弟则季为献舞字何氏之说他不见於史传故左氏先儒俱不取】谭无礼也【此谭无礼亦杞不敬之类齐桓欲图伯恐诸侯不从故灭小国以示威】十一年敌未陈曰败某师【叶氏曰经书公败某师于某此内胜外之辞也传妄以未陈为义且经书某败某师于某无有一书战者岂皆未陈而败之乎今按凡例盖鲁史旧法故左氏於败某师皆求未陈而诈敌之事以实之春秋有实战而不书战者有败绩而不书败绩者左氏皆不能发义而於未陈书败执之甚坚岂非有所据而然乎】公使吊焉【陈氏曰传言外灾所以得书】齐侯来逆共姬【陈氏曰凡诸侯亲迎合礼不书】南宮长万【陈氏曰传见南宮万不书氏今按传中如南宮敬叔及东门遂及南郭鉏皆时人因所居称之非其氏又传言南宮长而注不言长是何义周官州长中大夫一人万反国即为卿则此长应是州长杜氏谓万氏南宮陈氏因之非也贾氏以为未赐族者得之】吾弗敬子矣病之【檀弓云鲁庄公及宋人战于乘丘县贲父御卜国为右马惊败绩公坠佐车授绥御与车右皆死之孔氏曰记言车右与此不同必如记言则是鲁师败绩经安得称公败宋师于乘丘传纪不同固当记文妄耳陈先生曰记不过言公车败绩而已易车之後因二士死敌遂大败宋师乃与春秋传互相发明战几败复胜如韩原之战几获秦伯吕布之卒几获曹操者多矣况此不过公车马惊败覆乎今按经有不悉书传或不能备不可以檀弓所载与经传不合即云记妄也檀弓又言邾娄复之以矢盖自战於升陞始是两败也而传不载亦谓记者妄可哉】十二年蒙泽【楚弑其君麇于乾谿书地此弑闵公于蒙泽不书地者为连书及其大夫省文虽无异义谓史有详略亦非】又杀之【陈氏曰杀督不书嫌死节】公子御说奔亳【陈氏曰公子奔不出竟亦不书今按此史例】萧叔大心【叔萧大夫字大心其名也传兼称之孔氏曰以此年有功宋人以萧邑别封其人为附庸今按昭十一年传申无宇曰宋萧亳实杀子游时萧实宋邑庄二十三年萧叔无爵而称朝知是附庸国也】杀子游于宋【陈氏曰凡讨乱不书】宋人皆醢之【杀万不书以出奔为义蔽罪於陈】十三年以平宋乱【齐桓威信未着故假平乱之名合诸侯大夫使受伯令】灭遂而戍之【事与灭谭同微国安知世有伯主之兴传见齐桓急于合诸侯而不务德】宋人背北杏之会【於伯令必有未安者】十四年诸侯伐宋【经文已序则传皆称诸侯经總称诸侯则传为序列意与日月互见同】齐请师于周【陈氏曰传见齐初伯稷命天子今按齐桓始伯诸侯未遽服从必假王命而後定传见人心不忘戴周】单伯会之【凡王人以内辞书之二传不知史法误以单伯为鲁大夫故元年送王姬改送为逆胡氏承其误遂使桓公请命天子之意不彰吕大圭氏曰单伯周之世族周有单襄公单简公诸侯大夫无称伯者如毛伯凡伯召伯皆王朝卿士盖周有单姓鲁无单姓经传固可考也】而纳厉公【杀郑子不书者鲁人终始君突自郑忽复归後郑厉二君皆不通於鲁故郑伯入国经不书说见属辞胡氏曰杜氏称四年子仪称伯会诸侯非也子仪虽乘间得立其为君微矣岂敢轻去国都与诸侯会乎故知遇垂者乃厉公也】楚入蔡【蔡哀侯在楚而蔡人会于北杏此荆所以入蔡也传乃以为由息妫

故失在采辑未备举其细遗其大後人因此并其可据者一切疑之则又过矣】十五年齐始伯也【单伯既归京师桓公始自以其伯主之礼长诸侯故再会于鄆而传曰始伯张氏曰传言始伯指诸侯始定而言然鲁未信从卫郑复叛盖诸侯之心犹未一也】十六年郑伯自栢入【说见十四年】缓告于楚【传见郑尝附楚】杀公子阙【入国不书则杀不附己者亦不足议】公父定叔出奔卫【义同上】以一军为晋侯【陈氏曰天子变置诸侯皆不书义见诗无衣传书王命自此盖少】周公忌父出奔虢【陈氏曰於周公忌父见凡奔者复之则不书说在文十一年】惠王立而复之【经书葬桓王後王人救卫王姬归于齐则庄王也单伯会伐宋会诸侯于鄆命曲沃伯为晋侯则僖王也虢公晋侯郑伯使原庄公逆王后于陈以後皆惠王事杜氏云王室微弱不能自通于诸侯非也其庄僖不书崩葬与文十四年顷王不书崩葬皆夫子削之以明义说见属辞】十七年郑不朝也【前年十二月郑方同盟改岁又使大夫如齐无遽责不朝之理盖郑人於伯主新令有难尽从者如子产争承之类故齐人执之】十八年实惠后【陈氏曰为王子带起传】讳之也【啖氏曰书追明已去而追直言事实有何讳乎】十九年庚申卒【陈氏曰传见楚卒犹未见於经至文元年弑君始书之今按当齐桓始伯楚人於鲁好命不通赴吊之礼未行】二十一年胥命于弭【陈氏曰传见桓三年齐卫特书】郑伯将王自圉门入【陈氏曰传着郑虢克复则子颓不书立惠王不书出见经於襄王书出於子朝书立於王猛敬王书入不复讳之矣】及五大夫【陈氏曰凡篡立虽王子杀之不书】阙西辟乐备【服氏曰西辟西偏也】王巡虢守【陈氏曰王狩不书见僖二十八年特书今按惠襄巡狩非省方之比令不及诸侯】始恶於王【孔氏曰郑伯谓厉公子文公也】二十二年陈人杀其太子御寇【陈氏曰杜称太子以实言非是盖经改正之若杀太子当称陈侯】成子得政【传於此见陈氏之始朱子曰陈敬仲毕万季友占筮皆其子孙假托如後世符命之类】二十三年君举必书【传於此见策书之体】譖富子而去之【陈氏曰为杀太子申生起传後见二十四年二十五年】二十五年嘉之故不名【啖氏曰聘者常事有何可嘉谷梁云天子命大夫是也陈氏曰自入春秋非姻邻之国不交聘於是有伯诸夏自相为好故曰始】非常也【孔氏曰长历推此辛未为七月之朔不应置闰而置闰误使七月为六月也按二十四年八月丁丑夫人姜氏入从彼推之则六月辛未朔非有差错杜云置闰失所者以二十四年八月以前误置一闰非是八月以来始错也今按大衍历是年正月甲戌小戊戌冬至五月壬申大庚子谷雨六月壬寅小庚午小满经五月癸丑在此月闰月辛未日食长历癸丑五月十二日大衍历与长历所推每差一月至考经书六月朔日食为置闰失所则同学者不通历法槩言传妄且谓春秋用夏正可乎】伐鼓于朝【孔氏曰古之历书亡矣汉兴以来草创其衍三统以为五月二十三日月之二十而日月交会近世为历者皆以为一百七十三日有余而日一食是日食者历之常也正阳之月阳气尤盛於此尤盛之月而为弱陰所侵故尤忌之孙氏曰按周礼夏官凡救日皆鼓刘氏曰日有食之变之大者人君当恐惧修省以答天意岂可非正阳之月则安而视之春秋所以书者讥其不鼓于朝乃鼓于社又用牲耳】二十六年大司空【传见晋变周制僭王官孔氏曰言大司空明任以卿也直言司空者是大夫即司空亚旅皆受一命之服是也晋自文公以後卿以军将为名司空非复卿官故文二年司空士穀非卿也成十八年传曰右行辛为司空使修士蔦之法虽则非卿其职掌同】二十七年出曰来归【言凡诸侯之女传见列国史例父母不在而假归宁之礼以来者亦以归宁之例书之也无文以见义非谓当来赵氏陈氏驳之皆过】赐齐侯命【陈氏曰外锡命不书今按外锡命不告】二十八年齐侯伐卫【陈氏曰传见齐侯称人例在隐十

年】楚令尹子元【陈氏曰子元不书人楚未有大夫也今按中国有伯则楚君大夫将皆称人经变文也】都曰城【陈氏曰大夫不敢祖诸侯都城无宗庙之制今不取今按春秋书城多矣岂皆有宗庙杜氏欲通之於周礼尤非左氏惟不见周官故妄发此例尔】二十九年新作延廐【赵氏曰若新作但当云作延廐不当云新也马虽出入有时廐何妨农隙修之】无曰侵【陆氏曰按齐侯侵蔡晋侯侵楚之类皆用大帅而总数国若无钟鼓何以行师又狄师亦有称伐者岂是能有钟鼓乎今按侵伐异事知陆氏释侵曰但行杀掠胡氏则曰潜师掠境又安用钟鼓为哉外传晋语赵宣子曰伐备钟鼓声其罪也袭侵无声为蹇事也传例盖本此但左氏语意未备耳】不为灾不书【传不知春秋有记异之法啖氏曰蜚非为灾之物春秋记异多矣何必为灾乃书孙氏曰春秋灾异悉书不必皆为灾也鸛鹄岂为灾乎春秋何以记其来巢也】日至而毕【此成周遗制也周室盛时诸侯无备御攻伐及门观踰制之事史记土功但见时与不时而已春秋之世或备难兴工或改作踰制时与不时岂足後议而左氏但以旧例释之故说者得议其非】三十年归于京师【陈氏曰执不书义同芮伯传见僖二十八年晋执卫侯成十五年晋执曹伯所以书归京师今按天子执大夫不告不入例】以纾国家之难【陈氏曰传见楚所以强】三十二年为管仲也【范氏曰小谷鲁邑孙氏曰曲阜西北有小谷城高氏曰昭十一年传申无宇曰齐桓公城谷而置管仲焉此齐谷也非鲁之小谷且公虽感齐侯岂为管仲城邑乎盖齐自有谷如文十七年公及齐侯盟于谷宣十四年公孙归父会齐侯于谷此齐谷也】于党氏【传言讳不书杀】成季奔陈【陈氏曰奔非其罪虽吾公子为命大夫亦不书】

闵公

元年乱故也【刘氏曰去年十月子般卒则闵公立至今已三月乱亦定矣言乱不得成礼非也且必若所云何以能朝庙乎】齐人救邢【陈氏曰传言齐桓救邢之缓】请复季友也【落姑之盟虽曰请复季友若出公意然是时闵公八岁尔哀姜庆父专国岂欲季友之归者故陈氏以为国人为之临川吴氏因谓必鲁之世臣有不当权而忠於国如卫石碏者深谋秘计告於伯主请复季友故桓公以伯令召闵公至齐地而与之盟使若复季友之意出於齐季友以伯主之重则庆父不敢去之矣此说深得当时事情但哀姜庆父事与州吁石厚不同季友既出奔岂有如石碏者能自安于内以经传推之时陈方为齐所厚且与鲁交好季友又尝一再如陈其出奔陈盖有所托然则落姑之盟亦季友援陈人以请於齐桓耳】公次于郎以待之【陈氏曰凡次不书杜说非是】嘉之也【陈氏曰於是特书字义同蔡季】齐仲孙湫来省难【陈氏曰传见仲孙湫不名】亦嘉之也【陈氏曰传释大夫恒书名於是特书族吴先生曰书氏而不名者鲁人以两臣之礼接而不以见君也】鲁可取乎【鲁大国非譚遂之比虽内乱犹有人焉桓公方以救邢为功岂遽萌取鲁之意叶氏曰鲁可取以下乃後世附益之辞其说是也】晋侯作二军【陈氏曰外改制不书今按外改制不告】以灭耿灭霍灭魏【陈氏曰晋灭三国不书春秋之初楚灭国略不书於齐桓公特书之今按晋灭三国在西楚灭诸小国在南告命皆未通於鲁不可为例说已见前】必复其始【陈氏曰传起赵魏事】二年公不禁【公即位年八岁岂知禁其傅者传疎如此】成季以僖公适邾【传见季友僖公出奔不书】乃缢【陈氏曰庆父不书刺义同宋万今按春秋録内与録外异当从杜氏不书卒者罪重於叔牙不以卿礼成丧也】遂以命之【传起季氏事】遂灭卫【不书战故不书

君灭皆以书入为义】以庐于曹【陈氏曰戴公不成君例不书孔氏曰此年之末文公在位计戴公为君不过十数日耳言立一年卒者灭而复兴不是嗣位故成丧为谥文公继世而立明年始为元年故戴公虽复曰少亦称一年年表亦以此年为戴公元年今定本云以其年卒今按定本近是近代本作立其年卒亦未安】以戍曹【戍不书说在桓六年】重锦三十两【陈氏曰传言经所以不书灭】高克奔陈【陈氏曰不书克以弃师为义】乃事之而属僖公焉【黄先生曰事如孟子事之以皮币之事後言敬嬴嬖而私事襄仲义亦与此同】

春秋左氏传补注卷二

卷三

钦定四库全书

春秋左氏传补注卷三 元 赵汭 撰 僖公

元年公出故也【刘氏曰去年八月闵公遭弑僖公自邾入为君不应犹以出奔之故不得行即位礼】诘国恶礼也【传不知经有笔削故推史例以释之】诸侯救邢【陈氏曰经文已序则传皆称诸侯】邢人溃【陈氏曰传言经不书溃】具邢器用而迁之【传见以自迁为文说见成十五年】谋救郑也【经言会传言盟传误自同盟于幽至此九年使齐侯合五国为盟亦无不书之义】嘉获之也【陈氏曰传释凡获非卿不书於是特书莒挈今按此亦史例】女子从人者也【刘侍读曰哀姜与乎乱杀二子几亡国齐桓公讨而诛之此伯者所以行乎诸侯之义也鲁以臣子不得讨而齐以伯主得举法】二年诸侯城楚丘而封卫焉【迁国不当言封盖承用俗语故二传有专封之说】不书所会後也【此谷梁离至不序之例左氏不达妄谓後期说者疑之且谓楚丘非卫邑】晋里克荀息帅师【陈氏曰传言里克荀息见灭称师他放此今按征伐不在大夫不得有二义侵伐入灭称人亦不当异旨说在属辞】贿故也【虞以天子上公封国序晋上公羊传亦谓使虞首恶皆非】三年蔡人嫁之【归蔡姬当时适有是事或者假此为名欲出楚人不意左氏惟记所闻故未尽说已见隐元年及後僖二十三年】四年齐侯以诸侯之师侵蔡【陈氏曰传见伯主徵师诸侯皆不书以後放此】西至于河【杜氏释例曰海自辽西北平渔阳章武渤海乐陵乐安北海东莱城阳东海广陵吴郡会稽十四郡之东界以东河出西平西南二千里从西平东北经金城故北地朔方五原至故云中南经平阳河东之西界东经河东河内之南界东北经汲郡顿丘阳平平原乐陵之东南入海孔氏曰杜之此言据当时之河耳禹贡导河积石至于龙门南至于华阴东至于底柱又东至于孟津东过洛汭至于大伾北过洹水至于大陆又北播为九河同为逆河入于海案验其地自大伾以上河道不改大伾以下即是汲郡以东河水东流秦汉以来始然也古之河道自大伾而北过洹水故迹不可复知其大陆则赵地之广泽也大陆以北播为九河九河故道河间成平以南平原鬲县以北其九河者徒骇一太史二马颊三覆釜四胡苏五简六絜七钩盘八鬲津九徒骇最西以次而东故郑注禹贡河间弓高县往往有其处中候云齐桓伯遏八流以自广计桓公之时齐之西境当在九河之最西徒骇盖是齐之西界其东至于海当尽乐安北海之东界也】寡人是问【史记周纪昭王南巡狩不返卒於江上其卒不赴告讳之也帝王世纪昭王德衰南征济于汉楚人恶之以胶船进中流胶液船解王及祭公皆没于水中崩今按外传云桓公南征伐楚济汝踰方城望汝山使贡丝于周而反荆州与传不合其终篇亦大夸故不取】楚子使屈完如师【陈氏曰传见不言使】五年日南至【孔氏曰冬至者十一月之中气中气者月半之气也月朔而已得中气是必前月闰闰前之月则中气在晦闰後之月则中气在朔闰者聚残余分之月其月无中气半属前月半属後月是去年闰十二月十六日已得此年正月朔大雪节故此正月朔得冬至也而杜长历僖元年闰十一月此年闰十二月又闰之相去历家大率三十二月耳杜於此闰相去凡五十月不与历数同者杜推勘春秋日月上下置闰或稀或概自準春秋时法故不与常历同今按传於此年记正月日至与杂记孟献子之言合後昭十七年记大史与梓慎言之二十一年记梓慎之言二十四

年记昭子之言皆见周人改月改时致分至啓闭不合天正春秋之末距传成仅数十年正朔未改不容有误近世异议皆过】必书云物【孔氏曰周礼保章氏以五云之物辨吉凶水旱降丰荒之祲郑衆云以二至二分观云色青为虫白为丧赤为兵荒黑为水黄为丰衆之此言盖出占侯之书计云气之占不啻尽此而已】晋侯使以杀大子申生之故来告【传见策书从赴告例後凡言来告仿此陈氏曰传释申生死在去年冬经书在春他放此】公孙兹如牟娶焉【赵伯循曰大夫越境而娶非礼经文不应无讥今按赵氏於此亦疑传妄不知大夫娶妻法不得书史无文以见讥杜氏谓因聘而娶亦非辨见属辞】会王太子郑【陈氏曰传见郑不书名】楚鬬谷於菟【陈氏曰传见鬬谷於菟书人】虞不腊矣【孔氏曰月令孟冬腊门闾及先祖五祀腊之见於传记者唯月令与此二文而已周时腊与大蜡各为一祭秦汉改曰腊不蜡而为腊矣今按汉蔡邕月令章句夏曰嘉平商曰清祀周曰大蜡总谓之腊史记秦惠文王初腊正义云始效中国为之亦明腊不自秦始或疑传作於秦误矣】晋侯围上阳【陈氏曰传见晋侯书人】其九月十月之交乎【传见三正通於民俗後见襄三十年绛县人】丙子朔【传见赴告策书惟用周正与童謡异】虢公丑奔京师【虢公天子三公京师朝廷所在不可言奔传不知此义】且言易也【林少穎曰不云灭而但云晋人执虞公者圣人不忍周襄诸侯再取其地故不斥言而微文以见意见晋人执天子三公不道之甚矣详见属辞】六年郑所以不时城也【刘氏曰齐桓会诸侯于首止郑伯逃归不为无辞岂强取新城然後达其罪哉今按伐郑书围邑陈传得之】楚子围许以救郑【陈氏曰凡救不悉书传曰楚子见楚君书人】楚子从之【陈氏曰传着无救许之实今按微子启之事盖逢伯设辞以动楚君欲其全许耳刘侍读并疑许事为妄误矣许君内不敢恃诸侯之救外不敢深其怨于楚故乘其退师自屈以下楚亦当时小国求全之虑观蔡人一会北杏而荆入蔡江黄一盟于贯而楚灭江黄桓公非惟不能救蔡而亦不能救江黄其谓许不楚是事可乎】七年郑杀申侯以说于齐【张氏曰申侯出自楚专利不厌至是郑用陈轅涛涂之譖杀之】官受方物【受所命当贡伯主之物是盟虽曰谋郑实则以命朝聘之数职官各以方物岁时贡献使太子华临之听命为聘伯主之始杜云当贡天子之物若楚包茅之类诸侯久已不修至是齐桓倡义始职贡不乏焉晋悼邢丘之会盖仿此为之】郑必受盟【吕氏曰此一事见桓公服人有三代气象惜其急於功利不终於德桓公自小其规模尔】子华由是得罪於郑【陈氏曰传起郑杀子华事】不发丧而告难于齐【陈氏曰为二十四年王出居师传後见十一年十二年二十二年】八年则弗致也【孔氏曰檀弓曰殷朝而殡於祖周朝而遂葬知周法不殡於庙而此传及襄四年皆云不殡于庙知其将葬之时不以殡过庙耳殡过庙者将葬之时从殡宫出告庙乃葬非是殡尸於庙中也据哀姜以元年十二月丧至二年五月始葬明至则殡於寝也既殡於寝自然葬当朝庙今按哀姜与弑出奔齐桓以伯令取而杀之诸侯莫不闻虽薨葬皆书于策其赴同禍姑一时必不得备礼如已祔亦不常历八年不致杜氏胶於隐三年传例故说者得以议之当知哀姜与他夫人不同】是以缓【陈氏曰传释王崩在七经文在八年叶氏曰秘不发丧在前世或有之然不过数日之间惠王果以七年崩岂有经一年而子带不知者以经考之诸侯为襄王谋已见首止洮但寻盟而已传言襄王定位而後发丧则诸侯已知惠王之崩何为更待十二月以告乎今按传言襄王定位而後发丧盖为下缓告丧张本非谓盟洮後即发丧也又曰难故也是以缓岂盟洮之後子带之难犹未靖故大行人诏相诸侯之礼久未克举乎传序此事大略他无可考证当阙疑】九年故曰子【陈氏曰传见春秋之初未葬犹有称子者】公侯曰子【赵伯循曰按王猛在丧不曰小童子男在丧亦当称

子陈氏曰按书康王初嗣位称予末小子诰诸侯称予一人钊礼无称小童者【王使宰孔【凡王朝公卿大夫史皆不名传每详之】使孔赐伯舅胙【叶氏曰按是时襄王初立以月计之惠王犹未葬不得有事於宗庙何赐胙之有且脤膾之礼以亲兄弟之国或小白特赐亦疑在终丧之後而误记于此】下拜登受【孔氏曰觐礼天子赐侯氏以车服诸公奉篚服加命书于其上升自西阶东面大史氏右侯氏升西面立大史述命侯氏降两阶之间北面再拜稽首升成拜彼侯氏降阶再拜是此下拜也升成拜是此登受】言归于好【传记盟辞即孟子所述之末句其五禁之辞传不能举则二伯之事阙漏多矣】宰孔先归【陈氏曰传言宰孔不与盟】晋侯乃还【陈氏曰传言齐桓之伯晋独不至】未葬也【陈氏曰传於武氏子毛伯不称使晋奚齐不称君皆曰未葬明未葬不成君天子与诸侯同程氏曰未葬之说即公羊未踰年之意然既承重则固一国之君矣若曰杀其君之子不同弑君则是杀嗣君於未葬之时罪可减等难以为训今按齐舍未葬见弑称君此策书之?辞也奚齐未葬称君之子乃经之特笔说在属辞】齐隰朋帅师会秦师纳晋惠公【陈氏曰凡纳所宜纳不书】是吾利也【外传晋语既杀奚齐卓子里克及丕郑使屠岸夷告公子重耳於狄曰国乱民扰得国在乱治民在扰子盍入乎吾请为子鍼重耳告舅犯曰里克欲纳我舅犯曰不可夫坚树在始始不固本终必槁落不哀丧而求国难因乱以入殆以丧得国何以导民重耳曰非丧谁代非乱谁纳我舅犯曰偃也闻之大丧大乱之剡也父母死为大丧讎在兄弟为大乱今适当之是故难公子重耳出见使者曰子惠顾亡人重耳父生不得供洒扫之臣死又不敢泣丧以重其罪且辱大夫敢辞夫回国者在亲衆而善邻在因民而顺之苟衆所利邻国所立大夫其从之吕甥及却称亦使蒲城午告公子夷吾于梁曰子厚赂秦人以求入吾主子公子夷吾出见使者再拜稽首许诺吕甥出告大夫曰盍请君于秦乎大夫许诺乃使梁由靡告于秦穆公曰天祸晋国谗言繁兴延及寡君使绍续昆裔隐悼播越托在草莽未有所依又重之以寡君之不禄丧乱并臻以君之灵鬼神降衷罪人克服其辜羣臣莫敢宁处将待君命君若惠顾社稷不忘先君之好辱收其逋迁裔胄而建立之以主其祭祀且镇抚其国家及人民虽四邻诸侯闻之也其谁不倣惧於君之威而欣喜於君之德秦穆公许诺反使者乃使公子繫吊公子重耳于狄曰寡君使繫吊公子之忧又重之以丧寡人闻之得国常於丧失国常於丧时不可失丧不可久公子其图之重耳告舅犯舅犯曰不可亡人无亲信仁以为亲是故置之者不殆父死在堂而求利人孰仁我人实有之我以徼幸人孰信我不仁不信将何以长利公子重耳出见使者曰君惠吊亡臣又重有命重耳身亡父死不得与於哭泣之位又何敢有他志以辱君义再拜不稽首而哭退而不私公子繫退吊公子夷吾于梁如吊公子重耳之命公子夷吾出见使者再拜稽首起而不哭退而私於公子繫曰中大夫里克与我矣吾命以汾阳之田百万丕郑与我矣吾命之以负葵之田七十万君苟辅我蔑天命矣君实有郡县且入河外列城五岂谓君无有亦为君之东游津梁之上无有急难也亡人之所怀挟婴饗以望君之尘垢者黄金四十镒白玉之珩六双不敢当公子请纳之左右公子繫反致命穆公穆公曰吾与公子重耳重耳仁再拜不稽首不没为後也起而哭爱其父孝也退而不私不没於利也公子繫曰君之言过矣君若求置晋君而载之置仁不亦可乎君若求置晋君以成名於天下则不如置不仁以滑其中且可以进退是故先置公子夷吾为惠公今按里克志在重耳夷吾得国不以正秦穆公贪贿而无远略重耳克让舅犯有谋其事皆见于外传与大学檀弓所载舅犯重耳之言相表里可补传文之阙】十年苏子无信也【程氏曰叛王即狄岂特无信】苏子奔卫【孔氏曰尚书立政云司寇苏公成十一年传曰昔周克商苏忽生以温为司寇以此知苏子司寇苏公之

後也国名为苏所都之邑名为温故温苏递见於经是得两称故也】晋侯杀里克以说【谷梁传曰里克所为弑者为重耳也夷吾曰是又将杀我乎故杀之今按夷吾杀里克左氏録其迹谷梁得其情】蔑不济矣【为秦纳重耳起本】及七舆大夫【孔氏曰每车一大夫主之】皆里之党也【陈氏曰传见杀贱者自祁举以下不书他放此今按此史例也】十一年晋侯使以郑之乱来告【传见书国杀大夫从告盖於赴告之文有考自阳处父以下每求其罪以实之则犹未达策书之情陈氏曰传见杀郑虽却芮之意晋侯以告所以书国讨亦非也春秋诸侯大夫家有藏甲党与盘据虽其君所欲杀亦必假乎强家以去之与两下相杀不同後放此】十二年惧狄难也【陈氏曰终二年城楚丘传】楚灭黄【谷梁传贯之盟管仲曰江黄远齐而近楚楚为利之国也若伐而不救则无以宗诸侯矣桓公不听遂与之盟管仲死楚伐江灭黄桓公不能救今按谷梁所记管仲语极切事情亦可见桓公於仲犹有未尽其谋者但言管仲死与左传不合盖传闻失真史记秦穆公虏晋惠公之岁管仲隰朋皆卒】十三年聘于周【聘周说见後三十年】齐仲孙湫致之【陈氏曰虽戍京师不书】晋荐饥【陈氏曰外饥不书今按外饥不告】泛舟之役【陈氏曰为十五年韩之战起】十四年诸侯城缘陵而迁杞焉【陈氏曰传言经不言祀义同二年】有阙也【赵伯循曰此称诸侯即上会咸之诸侯前目後凡尔左传谓不书其人有阙亦误今按前年夏诸侯会于咸谋杞戍周今此城缘陵迁杞桓德虽衰亦不可与晋灵失伯不序诸侯例论左氏曰有阙谷梁曰散辞陈氏又从而祖述之皆大过盖诸侯既会而归改岁各使其大夫城缘陵故总称诸侯通前役为一事与城楚丘异文者彼盖微者之事耳】鄆季姬来宁【传见季姬归鄆来宁皆不书学者不知笔削之旨更以传为妄】十五年秦获晋侯以归【国君生曰获死曰灭言获则不言以归策书谨严从可知也传言获又言以归起下事也】侄其从姑【周语我皇妣大姜之侄逢公注昆弟之子女女皆曰侄】晋侯归【国君言获则得归不足志与内言战不书公至同亦史法也】十六年陨星也【胡氏曰按庄七年已书星陨如雨圣人所书各以其实岂以星陨而言石陨乎今按经言陨石而不言陨星犹言日有食之不言食之者皆阙於所不见解者当言其实不可谓非星陨也】齐伐厉【不书并上年】救徐而还【凡救不悉书伯者救中国必足以示名义而後书齐桓亲帅诸侯次于匡不能使楚母病徐则虽比年为徐出师无足议者後放此诸救例说见属辞】因晋败也【陈氏曰为僖三十三年晋败狄传】齐徵诸侯而戍周【陈氏曰不书义同十三年】郑杀子华【陈氏曰传见讨奸父之罪虽杀世子不书】不果城而还【陈氏曰传见齐侯之怠】十七年以报娄林之役也【齐比年伐厉又伐英氏皆以徐故不能服楚而唯伐其与国之微者伯业衰矣】妾为宦女焉【陈氏曰为晋怀公起传】师灭项【传见不言师杜云公在会别遣师灭项不言师讳之刘炫规之云既不讳灭何以讳师是也然刘以谓将卑师少称人不可自言鲁人故不称师亦非将卑师少岂能灭国故传例曰用大师焉曰灭下年书师救齐则将卑师衆自合称师也此不称师实经变文说在属辞】会齐侯于卞【张氏曰此管仲既亡齐桓志荒之政】以荐羞於公【孔氏曰周礼掌食之官有内饗外饗此人为饗官名巫而字易牙也】五公子皆求立【传见齐桓内宠无制贵贱不明致诸子争立相篡夺祸延数世】孝公奔宋【陈氏曰传言孝公以父命故出入皆不书】十八年齐人杀无亏【陈氏曰无亏未成君例不书】郑伯始朝于楚【二十二年又记郑伯如楚夫人聿氏见郑故昏于楚於是又纳二女二十七年见楚昏于卫明中国无伯则诸侯皆听命于楚矣】围菟圃【陈氏曰传见自此伐国不言围邑二十六年围缙之後皆不书矣】十九年宋人执滕宣公【传见滕子湣诸崩卒於经无所明而独举湣者放此】不相为用【孔

氏曰尔雅释畜牛马羊犬豕鸡谓之六畜周礼校人春祭马祖郑玄云马祖天驷也六畜之言先祖者唯此一文而已以外牛羊之等其祖不知为何神也沈氏云春秋说天苑主牛又有天鸡天狗天豕以马祖类之此等各有其祖】师兴而雨【甯庄子设辞以兴师传见诸侯无伯擅相侵伐】讨不服也【夏盟曹南曹国之南也曹伯使其大夫与盟而不亲会宋公此谓之不服杜氏谓曹南为曹国不服由不致饩皆非】自取之也【书梁亡非由赴告故不书其主与书王室乱同传义非】二十年凡啓塞从时【释例曰鲁城南面三门隐公元年开一门故今南有四门僖公意更缮治高大稷门非啓塞之义而以日至之後兴功故经书春传曰书不时言失土功之时也啓塞之事犹得从宜而修之今按隐元年新作南门以非公命不书僖公修泮宫新宫灾大室屋坏皆合修亦不书则门户道桥有司之事应不登于策此盖以踰制书】郑公子士泄堵寇【传见士泄书人】於是卫方病邢【为明年狄侵卫传】叛楚【胡氏曰随非楚之属国也传以为叛楚非矣自是以後随卒属楚】楚鬬谷於菟【陈氏曰传见鬬谷於菟书人】谓行多露【张氏曰随欲复汉东诸侯於中国左氏罪其不量力未若孟子师文王之论】二十一年楚执宋公以伐宋【不书楚人为中国讳】周祸也【孔氏曰此注引昭二十三传当云叔孙婼曰徧检古本皆作豹字盖注後即写误】二十二年礼也【陈氏曰传言经不书邾灭蔽罪於鲁杜氏为鲁私属故略不书失之矣】宋公伐郑【经叙诸侯传每略之後放此】秦晋迁陆浑之戎于伊川【孔氏曰昭九年传曰先王居櫛机于四裔故允姓之奸居于瓜州伯父惠公归自秦而诱以来是此戎为允姓也彼注云瓜州今敦煌则陆浑是敦煌之地名徙之伊川复以陆浑为名故至今为陆浑县十一年传称伊洛之戎同伐京师则伊洛先有戎矣而以今始迁戎为辛有言验者盖今之迁戎始居被髮祭野之处尔】王召之也【传见天王不能以义制恩齐侯为之请已失之富辰之言亦非也舜封象于有庳而使吏治其国未尝留之於帝都子带志在召寇作乱与象一夫之事不同宥之列国斯可矣乃还之京师以起後患谓之协其兄弟岂不谬哉】公及邾师战于升陞【陈氏曰传见不书公】我师败绩【传见不书败绩】弗可赦也已【言天弃商久弗赦其罪】门官殲焉【孔氏曰周礼虎贲氏掌先後王而趋以卒伍军旅会同亦如之舍则守王闲王在国则守王宫国有大故则守王门诸侯之礼亡其官属不可得而知此门官盖亦天子虎贲氏之类故在国则守门师行则在君左右近公故尽死也】劳楚子于柯泽【陈氏曰传言楚子在师见书人】二十三年楚成得臣【陈氏曰传见成得臣书人】遂取焦夷【陈氏曰外取邑不书例在桓十四年後放此】城顿而还【陈氏曰传为二十五年纳顿子张本】?夷也【杞成公即五年伯姬以之来朝者既即位终身不敢朝鲁故其卒也鲁人降而称子僖二十七年桓公来朝以公卑之称子襄二十九年文公来盟以晋治杞田故鲁贱之称子按晋女叔侯曰?夏余也而即东夷?以国小贫陋简礼从夷事或有之传曰?夷曰用夷礼与言杞不敬不共同皆鲁人为之辞尔杜氏谓仲尼以文贬称子陈氏误从之盖不知春秋有存策书大体之义】辟不敏也【说在隐七年】卫文公不礼焉【陈氏曰为二十八年晋伐卫传】薄而观之【陈氏曰为侵曹传吕氏曰桓文所以攘楚者必先破其党与是故桓公攘楚必先有事於蔡文公攘楚必先有事於曹卫左氏不达其故於侵蔡则曰为蔡姬故於侵曹伐卫则曰为观裸与块故其病在推寻事由毛举细故而二公攘夷安夏之烈皆晦而不章】公子赋河水【陈氏曰赋诗始於此】二十四年不告入也【此纳所宜纳不书之例若曰入国不告则何得独告惠公卒杀怀公不告乃晋人讳之】晋侯潜会秦伯于王城【陈氏曰传见自齐桓之伯诸侯特相会皆不书今按潜会不告不入例】且旌善人【陈氏曰传积文公还国善事】郑公子士泄堵俞弥帅师伐

滑【郑伐滑不书二十年书入滑举重】而执二子【传见中国无伯则诸侯无王】获周公忌父原伯毛伯富辰【陈氏曰皆以王出为重故不书今按夷狄犯京师获大臣史皆不书为王室讳孔氏曰此原伯毛伯盖是文王之子原毛之後世为王臣仍为伯爵或本封絶灭食采畿内】出奔宋【陈氏曰终十六年杀子华传】宋及楚平【陈氏曰传见宣十五年特书】辟母弟之难也【陈氏曰传释经不书王子带】二十五年同姓也故名【三传皆同此说学者疑之谓灭异姓何独无讥且虞虢同姓何以不名黄先生曰凡蒋邢茅胙祭周公之胤成王以周公有大勲劳於天下既已封伯禽於鲁又封其支子六人及至春秋时往往为人吞并今邢又为卫所灭矣邢与鲁同出自周公故书曰卫侯毁灭邢虽罪卫侯而实繫於鲁也】右师围温【陈氏曰不书善晋侯也见昭二十三年围郊特书】王入于王城【陈氏曰不书入亦善晋侯】杀之于隰城【陈氏曰杀王子带不书义同子颓】乃出其民【传见晋文以功取畿内地致王室益弱】秦晋伐郟【陈氏曰为文五年秦入郟传】楚令尹子玉【陈氏曰传见成得臣书人】纳顿子于顿【陈氏曰书纳不书出讥在纳】二十六年齐孝公伐我北鄙【陈氏曰传见齐孝公书人】东门襄仲臧文仲【使介不并书史例也文十八年各以事行非特书陈说非】祝融与鬻熊【孔氏曰自祝融至鬻熊司马迁不能纪其世杜言十二世不知出何书故刘炫规杜云计其间有一千二百年十二世何以得近一千二百年乎或传写之误】自甯于夔【孔氏曰传言熊挚有疾是以失楚明是适子有疾不得嗣位楚世家无其事不知熊挚是何君之适何时封夔郑语孔晁注云熊绎玄孙曰熊挚有疾楚人废之立其弟熊延熊挚自弃於夔子孙有功王命为夔子亦不知何所据也】又何祀焉【刘氏曰楚祖鬻熊夔祖熊挚是不得祀者也诸侯之祀无过其祖者鲁祖周公不敢祀公刘卫祖康叔不敢祀后稷祝融犹后稷鬻熊犹公刘矣】楚成得臣鬬宜申【陈氏曰传见楚成得臣书人】楚令尹子玉司马子西【陈氏曰亦书人】凡师能左右之曰以【赵伯循曰齐桓晋文用诸侯师悉能左右之何不曰以凡不用我师而用彼师曰以也】楚申公叔侯戍之【陈氏曰传言鲁以齐附楚】二十七年?不共也【说见二十三年】楚子及诸侯围宋【陈氏曰传见楚子书人今按楚君大夫称人说见庄二十八年】新昏於卫【传见曹卫皆已附楚】让於狐毛而佐之【外传晋语使狐偃为卿辞曰毛之智贤於臣其齿又长毛也不在位不敢闻命】让於栾枝先轸【晋语公使赵衰为卿辞曰栾枝贞慎先轸有谋胥臣多闻皆可以为辅佐臣弗若也】二十八年晋侯齐侯盟于斂盂【陈氏曰传见自齐桓之伯诸侯特相盟皆不书】卫侯出居于襄牛【诸侯出不踰境史不书亦未必告】晋侯宋公齐国归父崔天秦小子憖【陈氏曰传见三国之君大夫但书师说在後传楚成得臣书人今按陈氏以三国称师为始伯之辞但经书齐序宋上非复宋君齐臣之叙盖宋公不亲陈齐国归父未书大夫将不可别为义秦小子憖微史法惟师以国叙陈氏推襄八年传大夫不书尊晋侯为例非经旨亦失传意】鹽其脑【孔氏曰鹽之为嚏未见正训盖相传为然服?云如俗语相骂云嚏汝脑矣】胥臣以下军之佐当陈蔡【陈氏曰传见陈蔡不书蔽罪於楚後见哀十年今接凡诸侯以兵属夷狄皆不序後见宣十二年唐惠侯成二年蔡景公许灵公秦右大夫说昭八年宋戴恶襄十一年秦右大夫詹十二年庶长无地哀十年邾子郈子说又见宣十一年】子人九【孔氏曰桓十四年郑伯使其弟语来盟传称子人来盟杜云子人即弟语也其後为子人氏七年传子华云泄氏孔氏子人氏三族实违君命今子人九必是语之後杜谱以九为杂人误矣】献楚俘于王【陈氏曰献于楚之捷于周皆不书今按外献捷不告先儒以鲁春秋为诸侯通史故陈氏踵其误後若此者不复辨】用平礼也【襄二十五年传郑子产曰城濮之役文公布命曰各复

旧职命我文公戎服辅王以授楚捷【使元咺奉叔武以受盟【陈氏曰传见叔武书卫子】王子虎盟诸侯于王庭【传言王子虎实盟诸侯故翟泉言寻盟陈氏谓蒞盟不书非传意】无有老幼【说苑晋文公合诸侯而盟曰无以美妾疑妻无以声乐妨政无以奸情害公无以货利示下不知何所本也】前驱射而杀之【陈氏曰杀叔武不书非君意也】且明德也【此特笔也谷梁传曰诿会天王也全天王之行也庶得经意左氏所记乃流俗传闻之辞未必真修春秋时语】先蔑将左行【陈氏曰左行之名止此】二十九年馈之刍米礼也【孔氏曰聘礼卿饗饩五牢禾米与子男同其附庸执帛与公之孤同则饗饩亦五牢禾三十车米二十车薪刍倍禾则此馈之刍米刍六十车米二十车】齐国归父【孔氏曰公孙固序在齐上者盖为大司马尊於归父归父虽执齐政不废身非上卿如管仲之类犹文十七年陈公孙宁襄二十七年陈孔奭皆序在卫下杜云非上卿即此类也】秦小子憖【孔氏曰经若贬称人传则言其名氏若传无名氏则本是微人此经书蔡人而传无名氏此是实蔡之微者秦是大国小子憖名见於传而在蔡微者之後若宋向戌之後会也今按秦伯爵国其大夫自合班蔡国大夫下非为後至成二年秦右大夫说在宋华元陈公孙宁上乃楚人为之不可据以为例】且谋伐郑也【孔氏曰晋侯受命郑伯傅王践土与盟二会咸在郑无叛晋之状而此会谋伐郑者城濮战前郑复如楚虽以楚败之後畏威来会晋侯以大义受之内实怀恨此会郑人不至必有背晋之心故谋伐之也晋语城濮战下称文公诛观状以伐郑反其陴郑人以名宝行成公不许得叔詹将烹而舍之左氏无伐郑之事今按下年传载晋人侵郑以观其可攻与否则晋语所记伐郑之事乃左氏所不取盖其事与观裸与块同出于小说家而晋语又记叔詹谏郑文公弗听曰若不礼焉则请杀之事与晋侯伐郑曰与我詹而师还相终始左氏亦无此言盖虽不能悉辨其诬而犹有所不取也】卿不书罪之也【陈氏曰传释会盟恒称君大夫於是特称人内不书公罪晋初以大夫主盟】会伯子男可也【陈氏曰传言卿犹无会公之礼而盟王子经所以甚贬之】三十年晋人侵郑【陈氏曰不书举重在围】使医衍酖卫侯【孔氏曰周礼大司马以九伐之法正邦国贼杀其亲则正之郑玄云正之者执而治其罪春秋僖二十八年晋人执卫侯归之于京师坐杀其弟叔武如郑彼言则卫侯合死而云罪不及死者卫侯之心疑叔武尔前驱?犬卜君意而杀之是则杀非公命也故不至死若然则卫侯无罪而往年卫侯与元咺讼卫侯不胜杀士荣刖鍼庄子者用谗疑贤弟渝盟先期入是卫侯之罪也】吾使尔为卿【传见虽得请於王非杀元咺及公子瑕则不得入经所以不书归自京师】晋侯秦伯围郑【传见晋侯秦伯书人】秦军汜南【释例土地名僖二十四年汜下云此南汜也周王出居于汜楚伐郑师于汜襄城县南汜城是也此年汜下云此东汜也秦军汜南晋伐郑师于汜荥阳中牟县南汜泽是也】共其乏困【孔氏曰襄八年传云一介行李杜云行李行人也昭十三年传云行理之命杜云行理使人李理字异为注则同周语行李以节逆之贾逵云理吏也小行人也孔晁注国语其本亦作李字然则两字通用】晋人许之【陈氏曰为宣四年郑穆公卒传】遂初聘于晋【周制诸侯於天子有见有贡而无聘问见则大行人朝覲以下六礼贡则六服所贡之物小行人令诸侯春入贡是也诸侯於天子言聘乃东迁礼失之辞由职贡俱废而後以聘礼上问如邦交非成周之旧也自隐至僖天子遣使聘鲁者六而鲁始使人如京师传言聘周於是始前此鲁人安受王朝聘问而不遣一介如京师者先儒谓因王使之来厚其好货而已盖诸侯交聘王室古无其事既职贡不归则亦无名以往於是以聘礼行故传言将聘於周遂初聘于晋也及按昭十三年传叔向言明王之制使诸侯岁聘以志业孔氏谓岁岁使於天子所以献其贡赋修其职业其事是其名北循习失礼而

为之辞虽叔向亦不能免也观襄二十六年传韩宣子聘于周辞曰晋士起将归时事于宰旅王曰辞不失旧又周语简王八年鲁成公来朝使叔孙侨如先聘且告王孙说言其享觐之礼薄夫谓之时事谓之享觐之礼则诸侯於天子言聘非周制可知矣左氏能记其事而不能辨其是非故王制诸侯於天子比年一小聘三年一大聘五年一朝遂蒙传文之失与聘义但言诸侯交聘者异矣郝氏因之以释大行人时聘殷纥皆承误踵讹非周官春秋之旨也黄文叔曰周官大行人诸侯朝天子之礼六天子聘问诸侯之礼六盖无诸侯聘问天子之礼大宗伯曰聘曰问曰纥曰视皆下交於卑者之言非诸侯尊事天子之义故小行人曰朝覲宗遇会同君之礼也存纥省聘问臣之礼也君之礼者诸侯朝覲天子也臣之礼者天子存问诸侯也郑氏以时聘殷聘为诸侯聘问天子而不考大行人时聘殷纥问问归脉贺庆致禴皆为天子使臣於诸侯之礼也其辨之亦明矣】三十一年使臧文仲往【赵伯循曰使臧文仲往不合不书且二十二年执曹伯不应四年方分其地今按上书公子遂遂如晋下又书公子遂如晋亦不应更使一卿如晋受田据传言晋必亲其共是晋大夫疆理曹田以分诸侯文仲至分田处受之非以使礼如晋故不书于策践土後伯主有寻盟讨贰之事经四年无足疑外传记其事甚详济西田说者疑非曹地郑樵氏曰鲁之济西北曹北比晋传必有据尔】牛卜曰曰牲【孔氏曰上云卜其牲日则牲之与日俱卜之也必当先卜牲而後卜日卜得吉日则改牛为牲然则牛虽卜吉未得称牲牲是成用之名不可改名为牲更卜吉凶明知卜牛在卜日之前也此言免牲是已得吉日牲既成矣成七年乃免牛是未得吉日牲未成也】上怠慢也【鲁郊非常祀比传义非】不郊亦无望可也【孔氏曰公羊传曰三望者何望祭也然则曷祭祭泰山河海郑玄以为望者祭山川之名诸侯之祭山川在其地则祭之非其地则不祭且鲁竟不及於河禹贡海岱及淮惟徐州徐即鲁地三望谓淮海岱也贾逵服?以为三望分野之星国中山川今杜亦从之今按书舜典言望于山川不及星辰周礼典瑞言祀地旅四望次及祀日月星辰次及祀山川三祀皆不同玉不同时盖星辰随天运行不可与山川同望祭而山川之特祀者其礼杀又与方望不同也郑玄以五岳四镇四渎释四望盖推经文言之公羊释三望近之而未尽杜氏承贾服之误以为分野之星国内山川皆不知有周礼盖鲁郊不敢尽同於天子视天子四望而缺其一为三望所缺者必对方一望以其远絶故也若郑氏以三望为竟内山川则又不察鲁郊之僭而自失之耳】赵衰为卿【晋语公使原季为卿辞曰夫三德者偃之出也以德纪民其章大矣不可废也注原季赵衰也三德谓劝文公纳王以示臣义伐原以示信大蒐以示礼又曰狐毛卒赵衰代之辞曰城濮之役先且居之佐军也善不可废也且臣之伦箕郑胥婴先都在乃使先且居将上军公曰赵衰三让其所让皆社稷之卫也废让是废德也以赵衰之故蒐于清原作五军使赵衰将新上军箕郑佐之婴将新下军先都佐之子犯卒蒲城伯请佐乃使赵衰佐上军注蒲城伯先且居也今按传言命赵衰为卿让於栾枝先轸语云使栾枝将下军先轸佐之是下军将佐皆卿矣此晋六卿之始也传云赵衰为卿语云将新上军是上下新军帅皆卿也晋於是有八卿】三十二年晋楚始通【陈氏曰传见楚强晋怠夷夏狎主齐盟之渐故曰始】将殡于曲沃【孔氏曰殡攢置西序亦是下棺於地故殡为窆棺晋武公自曲沃而无晋国曲沃有旧时宫庙故公卒而往殡焉礼诸侯五日而殡按经文以己卯卒庚辰是卒之明日即将殡者以曲沃路远故早行耳】使出师於东门之外【孔氏曰世族谱以百里孟明视为百里奚之子则姓百里名视字孟明也古人之言名字者皆先字後名而连言之其术丙必是名西乞白乙或字或氏不可明也】三十三年无礼必败【孔氏曰服?云无礼谓过天子门不橐甲束兵而但免胄吕氏春秋说此事云师行过周王孙满曰过

天子之城宜囊甲束兵左右皆下必古有此礼】礼成而加之以敏【孔氏曰聘礼宾至于近郊君使卿朝服用束帛劳及聘事皆毕乃去宾遂行舍於郊公使卿赠如覲币是来有郊劳去有赠贿也】子墨衰絰【传见晋子书人说在属辞陈氏贬例书人非也失与侵入围灭异义同】获百里孟明视【陈氏曰孟明书师秦未有大夫也故获亦不书】却缺获白狄子【陈氏曰传见始书败狄犹不书获今按获白狄史不书】楚师亦归【陈氏曰传言经所以不书是役】王杀子上【陈氏曰为明年商臣弑楚子起传】葬僖公缓【刘氏曰杜氏欲读缓以上为一句非也盖欲迁僖公之薨在十一月则除丧在文二年十一月文纳币为十二月则与传合以明僖公为十一月薨独不顾作主非礼也之语无所系今按如长历则辛巳四月十五日癸巳二十七日而乙巳为十一月十二日大衍历则辛巳癸巳皆在三月而乙巳为十二月十一日长历自隐元年至文元年三十四闰大衍三十六闰盖春秋周历本差而後世追算又互有得失杜氏惟据长历释经遂以此年十二月所书四事皆为十一月亦固矣】作主非礼也【说在文二年】特祀於主【孔氏曰文二年公羊传曰主者曷用虞主用桑练主用栗郑玄注礼用公羊之说以为虞已有主此传称祔而作主者虞而作主礼本无文不可以公羊而疑左氏也又曲礼疏曰说公羊者朝葬日中则作虞主郑君以二传之文虽异其意则同皆是虞祭总了然後作主去虞实近故公羊上繫之虞谓之虞主又作主为祔所须故左氏据祔而言今按檀弓曰重主道也殷主缀重焉周主重彻焉杂记曰重既虞而埋之盖虞为丧祭祔为吉祭丧祭用重吉祭用主重既虞则埋之者丧祭有终也将埋重必预作主何则杂记士三虞大夫五诸侯七最後虞皆用刚日卒哭祭他用刚日明日始祔神不可一日无所依也重与桑主不并立者神依於一也以此主之作犹是虞日故谓之虞主以吉祭自祔始故曰祔而作主士虞记曰桑主不文吉主皆刻而谥之谓练主为吉主者後常奉事于庙不复易也外传周语襄王锡晋文公命晋侯设桑主布几筵韦昭注云自以子继父用未逾年之礼也左氏不言虞练异主郑氏通二传为一已得之使有朝葬日中作虞主之礼则何氏必援以为说是盖公羊学者言之耳】烝尝禘於庙【赵伯循曰传见前後经文惟有烝当禘三名以为祭名尽於此殊不知春秋所记祭祀惟记其失礼者於祔祠无失礼所以不记陈氏曰桓五年传例亦止及烝尝按鲁颂曰春秋匪懈享祀不忒又曰秋而载尝夏而福衡则鲁备四时之祭凡例非也朱子曰左氏烝尝禘於庙与王制丧三年不祭者不合今按丧不贰事贰则忘哀必无释丧服而衣祭服之理或是大臣摄行亦无文可据东迁礼失丧祭尤甚如襄公十六年春葬晋悼公传言改服修官烝于曲沃皆是当时之事非必周制则然杜氏遂据以为诸侯卒哭以後时祭不废之证非也】

春秋左氏传补注卷三

卷四

钦定四库全书

春秋左氏传补注卷四 元 赵汭 撰文公

元年内史叔服【孔氏曰传称内史叔服内史於周礼为中大夫天子大夫例书字】於是闰三月非礼也【孔氏曰僖五年正月辛亥朔日南至治历者皆以彼为章首之岁汉书律历志云文公元年距僖五年辛亥二十九岁是岁闰余十三闰当在十一月後而在三月故传曰非礼也志之所言闰当在此年十一月後今三月已即闰是嫌闰月大近前也杜以为僖三十年闰九月文二年闰正月故言於历法当在僖公末年误於今年置闰嫌置闰大近後也杜为长历置闰疏数无复定准凡为历者闰前之月中气在晦闰後之月中气在朔僖五年正月朔旦冬至则四年当闰十二月也杜长历僖元年闰十一月五年闰十二月与常历不同者杜以襄二十七年再失闰司历过昭二十年二月己丑日南至哀十二年十二月蠡云火犹西流司历过则春秋之世历法错失所置闰月或先或後不与常同杜惟勘经传上下日月以为长历若日月同者则数年不置闰月若日月不同须置闰月乃同者则未滿三十二月频置闰所以异於常历故释例云春秋日有频月而食者有旷年不食者理不得一一如算以守恒数故历无有不失也据经传微旨考日辰晦朔以相发明为经传长历未必得天盖春秋当时之历也】归余於终【孔氏曰历之上元必以日月之全数为始於前更无余分以此日为术之端首故言履端於始也朞之日三百六十有六日谓从冬至至冬至必滿此数乃周天也刘炫云一岁为十二月犹有十一日有余未得周也分一周之日为十二月则每月常三十日余计月及日为一月则每月唯二十九日余前朔後朔相去二十九日余前气後气相去三十日余每月参差气渐不正但观中气所在以为此月之正取中气以正月故言举正於中也月朔之与月节每月剩一日有余所有余日归之於终积成一月则置之为闰故言归余於终】事则不悖【孔氏曰闰後之月中气在朔则斗柄月初已指所建之辰闰前之月中气在晦则斗柄月末方指所建之辰故举月之正在於中气则斗柄常不失其所指之次如是乃得寒暑不失其常】先且居胥臣伐卫【陈氏曰传言经书晋侯杜氏从告非是今按传言晋襄公告于诸侯而伐郑及南阳虽中道朝王使大夫伐卫经改正之与之以继伯也】晋师围戚【陈氏曰伐国不言围邑例在僖十八年後仿此】卫孔达帅师伐晋【陈氏曰传见卫孔达书人】曰成乃瞑【孔氏曰礼葬乃加谥桓谭以为自缢而死其目未合尸冷乃瞑非由谥之善恶也】卑让德之基也【孔氏曰何休膏肓以为三年之丧使卿出聘於义左氏为短郑康成箴云周礼诸侯邦交岁相问殷相聘世相朝左氏合古礼何以难之刘氏曰左氏见当时诸侯废丧而聘故推以为礼杜氏见左氏有得礼之言遂推以当丧而吉皆反经越礼不可以教後世今按结外援卫社稷春秋乱世之事也传惟见此年夏葬僖公冬公孙敖如齐宣十年夏葬齐惠公冬齐侯使国佐来聘遂推以为例其言凡君亦指当时之事尔非谓周制则然以周礼邦交合左氏乃康成之失谓传例为周公之法自杜氏之谬尔古者吉凶不相干故三年之丧不祭而何相聘问之有】二年秦孟明视帅师伐晋【陈氏曰传见孟明视书师】不登於明堂【孔氏曰郑玄以为明堂在国之阳与祖庙别处左氏旧说及贾逵卢植蔡邕服等皆以祖庙与明堂为一故杜同之】书不时也【何氏曰礼作练主当以十三月今按僖公祥练本在元年十二月过

两月始作主以练祭後期也特书作主则祭不以时可知传不言作练主故杜氏以过葬十月释之然非也果如此则自虞後卒哭与祔皆无主凡几筵十月神无所依甚非人情当从何氏】以厌之也【传释处父去族】讳之也【此在存策书大体中为变例鲁史无不书公行之法传於昭公在晋晋人止公亦曰讳之知史有讳义而不知有笔削之旨】堪其事也【陈氏曰传言会未有书大夫者於是初书士穀今按晋司空非卿见成二年受一命之服非卿而书者列国尊伯主命春秋辞从主人见晋卑诸侯传谓堪其事非也】执孔达以说【非晋执史不书】逆祀也【杜氏曰文公二年僖公之丧未终未应行吉禘之礼而於大庙行之其讥已明徒以跻僖而退闵故特大其事异其文定八年亦特书顺祀皆所以起非常也有事于武宫及顺祀传皆称禘则知大事有事于大庙亦禘也孔氏曰禘祭之礼诸庙已毁未毁之主皆于大祖庙中以昭穆为次序父为昭子为穆大祖东向昭南向穆北向孙从王父以次而下祭毕则复其庙其兄弟相代则昭穆同班近据春秋以来惠公与庄公当同南面西上隐桓与闵僖亦同北面西上僖是闵之庶兄继闵而立昭穆虽同位次闵下今升在闵上故书而讥之今按鲁人改祫为禘既用禘则不复用祫二传盖不知此义故公羊以大事为大祫谷梁以为祫尝若鲁语以为烝则与经书八月时制月不合故韦昭注谓鲁文公三年丧毕之禘本左氏学者之说也其释逆祀升僖於闵三传初不异而昭穆之说注家不同公羊云先禘後祖谷梁云先亲後祖谓僖为称为亲而闵为祖与左传子虽齐圣不先父食语意略同皆谓闵祖而僖称也谷梁又云逆祀则是无昭穆无昭穆则是无祖也与鲁语宗有司曰非昭穆同皆谓闵昭则僖穆也夏父弗忌曰明者为昭其次为穆何常之有是欲以僖为昭闵为穆也故韦昭释之曰父为昭子为穆僖为闵臣臣子一例而升闵上故曰非昭穆是则传所谓逆祀者谓颠倒其昭穆南北之位也孔氏不考外传及公谷传文反取何氏注谓兄弟相代昭穆同班惠公与庄公当同南面西上隐桓与闵僖当同北面西上僖是闵之庶兄继闵而立昭穆相同位次宜在闵下则是以逆祀为升其同班上下之次而已何氏又谓僖以臣继闵犹子继父故闵公於文公亦犹祖也说者不详遂以三传昭穆父祖为引喻之辞由不知以为人後者为之子之义断之遂与经传之旨相悖然何氏昭穆之说他无所据汉庙制以孝惠孝文俱为穆孝昭孝宣俱为昭何氏盖推汉事以说春秋自晋及唐宋礼官之议皆以兄弟不相为後不得为昭穆反引何氏孔氏之说以春秋跻僖公为证其所以为疑者则曰若兄弟相代昭穆即异设令兄弟四人皆立为君如商祖丁齐桓公之後则祖父之庙即已从毁後立者将不得祭矣然又虑同昭穆而并立庙则七庙五庙将不足以容於是天子之庙而有同室异座之制有皇伯祖考之称其说至今犹未定也窃尝以诸侯之礼推之诸侯絶宗而兄弟不得以其属通者所以重正统也公子不得禘先君故别子为祖者所以尊宗庙也然公子不得宗君而为人後者得为之子不得禘先君而以为人後之义得祔所受国之君皆礼之变也兄弟本不得相为後而亦以为人後之义治之者为诸侯上必有所承下必有所授上无所承谓之篡下无所授谓之絶受人之国而絶其後是篡也故非为後则不得受国变而不失其中也既谓所受国者为禘则兄弟四人相及各禘其祔即同四世一昭一穆祖孙迭迁皆以受国为人後为重也使非受国为人後则支子自无干正统承宗庙之理安可以後立不得祭其祖为嫌而轻受国之恩昧为後之义乎然则祖丁齐桓四子代立祭享宗庙与父子四世相承者何异使其世有适嗣亦终不免於祧安可以庙毁於子而昧其子有贵贱本不当俱立乎後世受国与天下者遂废为人後之礼其忘君臣之义以轻正统乱昭穆之法以渎宗庙皆流俗不经之论使然而其失由汉文帝始汉文自藩邸入继大统不後惠帝而禘高祖其後遂以惠帝文帝共为一代则同室异座皇伯

祖考之无稽皆末流所必至也若谓兄弟同班立庙将无所容则不得为昭穆之说非礼意明矣以三传所释相同必有所本而注家自汨乱之使议礼者失其所依故不可无辨】犹上祖也【孔氏曰宋为王者之後得祀殷之先王帝乙之庙不毁者盖以为其所出故特存焉周制王子有功德出封者得庙祀所出之王鲁以周公故得立文王之庙襄十二年传称鲁为诸姬临於周庙周庙文王庙也郑之桓武世有大功故得立厉王之庙昭十八年传称郑人救火使祝史徙主祔於周庙周庙厉王庙是也今按传言宋祖帝乙与言郑祖厉王同盖自微子桓公不先父食言之王者之後虽曰得祀先王其庙祭之礼今不可考或谓宋当祖汤疑传妄则又全类王者故孔氏惟以不毁之庙释之鲁郑所出王庙乃东迁後僭礼事与宋祀帝乙不同传并举宋郑已非孔氏遂谓鲁郑有周制则几於诬矣凡传所言春秋时越法变礼皆指为周制乃左氏学者之通弊】谓之崇德【赵伯循曰圣人以秦穆悔过而卑中国陈氏曰大夫将犹称人也自阳处父专将书大夫今按书存秦誓如诗录秦风与修春秋事体不同左氏尊秦盖当时流俗之论唯後传於此妙得经旨】礼之始也【范甯曰丧制未毕而纳币非礼也叶氏曰僖公薨以十二月杜氏以为月误当为十一月今以冬纳币审十二月犹在 则纳采在三年之内矣反为礼乎诸侯娶元妃固有时而左氏以即位为节尤见其妄】三年在上曰逃【陈氏曰例辞粗浅今不取】来赴吊如同盟礼也【孔氏曰谥之为文必当有爵不书爵者畿内之国不得外交诸侯其臣不敢赴鲁必天子为之赴赴以王子为亲不复言其爵也陈氏曰传称同盟谓同方岳之盟故於滕杞薛发传传其微者也他非同盟来赴录之故於王子虎发传传其着者也今按传言同盟指当时诸侯会盟而言王子虎践土翟泉实盟诸侯故赴吊用诸侯同盟例】秦伯伐晋【陈氏曰传见秦伯书人】子桑有焉【此亦以成败论人春秋正谊不谋利明道不计功左氏不足以知此秦穆修怨乃中国之罪人说见属辞】晋先仆伐楚以救江【陈氏曰并入下文书且见先仆非卿帅师不书他放此今按将卑书人师衆书师史之恒法】伐楚以救江【经书阳处父帅师为大夫将书大夫之始不以救江累王室故没王叔不书且明征伐在大夫讥不及王叔也杜陈说皆非孔氏曰王叔文公不知何王之子字叔遂以叔为氏桓公是其子王叔陈生是其後也卫有公叔文子此人盖以王叔为氏也】四年故免之【陈氏曰终元年伐晋传】过数【孔氏曰哀十年传称齐人弑悼公赴於师吴子三日哭于军门之外邻国之数盖三日也】五年来会葬礼也【何休膏肓以为礼尊不含卑又不兼二礼左氏以为礼於义为短郑康成箴云礼天子於二王後之丧含为先襚次之贈次之賻次之於诸侯含之贈之小君亦如之於诸侯臣襚之诸侯相於如天子於二王後於卿大夫如天子於诸侯於士如天子於诸侯臣何休云尊不含卑非经意其一人兼归二礼亦是为讥孔氏曰按礼杂记诸侯相吊之礼含襚贈临同日而毕与介代有事焉不言遣异使也康成以为讥一人兼二事者非左氏意杜氏曰凡妾子为君其母犹为夫人虽先君不命其母母以子贵其适夫人薨则尊得加於臣子内外之礼皆如夫人矣故蚡氏之丧责以小君不成成风之丧王使会葬传曰礼也刘氏曰庶子为君为其母无服不敢貳尊者也妾母称夫人王不能正而又使公卿会何礼之有今按王室成诸侯妾母之丧归贈含会葬经於王皆不称天以示讥与锡桓公命同而三传皆不能辨左氏反以为礼杜氏释例又以母以子贵之义傅会为几何氏知不称天为刺失礼矣而其所谓失者惟以至尊行卑事为讥则以母以子贵之说实出於公羊故也刘侍读以丧服义駁之当矣】楚成大心仲归【陈氏曰传见成大心书人例在僖二十六年】灭蓼【蓼六之别封不书并灭六】哀哉【传於文五年录臧文仲语成七年录季文子语昭十六年录叔孙昭子语皆见中国无伯而识者忧之】六年以为常法【孔氏

曰周官大师大傅大保天子三公也宣十六年传晋侯请于王命士会将中军且为大傅则大傅尊於中军之将与大师皆为孤卿也周礼上公之国有孤一人王制诸侯三卿晋侯爵也而有三军六卿复有孤二人者晋为伯主多置羣官共时所须不能如礼孤尊於卿法由在上故宣子法成授二孤使行之】秦伯任好卒【传见秦卒葬犹未见於经】难必抒矣【服?作紓紓缓也】班在九人【九等之班乃诸侯取女立子通制隐元年公羊传何氏注曰礼适夫人无子立右媵右媵无子立左媵左媵无子立适侄娣适侄娣无子立右媵侄娣右媵侄娣无子立左媵侄娣是时诸侯取女立子虽不如礼而九等班位尚存故赵孟得而言之与公羊立子以贵不以长之说合後世论公子争国者惟欲以年之长少定之宜不合於经也】让偃姑而上之【孔氏曰谱以偃为国名地阙不知所在】侵官也【晋杀处父莒杀意恢据传皆两下相杀也左氏不知有笔削之旨义与事违】晋杀续简伯【非卿不告後仿此】七年非礼也【陈氏曰传言所以再书取须句】昭公将去羣公子【传录此语不言其故且昭公未即位而先欲去羣公子殊不近人情或是当时交构之言或弑君者诬之以证成其无道耳史记宋世家成公卒其弟御杀世子而自立国人杀御而立其少子杵臼是为昭公此盖国乱之由传偶不能备史亦不复详也】杀公孙固公孙郑于公宫【孔氏曰经书宋人杀其大夫则此二子名氏当见於经亦卿官也僖二十二年传称大司马固於是又有司马子鱼上文乐豫为司马下云六卿和公室六卿之外有此二子盖是孤卿之官也宋是上公礼得有孤且春秋时不必如礼今按宋有司马为卿又有大司马者僭王朝夏官之制也陈氏曰固大司马也见僖二十二年传言穆襄之族率国人杀固郑故书宋人】且言非其罪也【陈氏曰传释大夫恒书名於是特不书名且释不以国讨为文今按不称名说见後八年】秦康公【陈氏曰传见秦康公书人】赵盾将中军【陈氏曰传见晋赵盾书人】先蔑将下军【上言先蔑如秦又言背先蔑以御秦师则将下军非先蔑传误明矣杜氏先蔑前还亦非既前还背秦无用奔秦其奔秦以不与立灵公尔】败秦师于令狐【不言败经变文】盟于扈【陈氏曰传言诸侯不叙今按晋襄卒灵公幼赵盾以大夫主诸侯卒使晋不竞於楚中国於是无伯故经变文以略之下又见十五年十七年】公後至故不书所会【刘氏曰公後至不书所会非也按经与公盟矣何谓後会乎又称公会诸侯矣岂不及其会者乎杜云公後其会而及其盟此饰非之言会盟同地会所以为盟也今及其盟不得云後会且盟重会轻不当责其轻】辟不敏也【传见公在不序诸侯遂通桓十三年公会战不书所战为例使公诚後至诸侯固公所期经既书公会诸侯亦不得云不书所会至十五年公实不会亦不序诸侯始发他义凡例无据明矣陈氏曰凡例并十五年凡例後人妄加之诸侯会公不与岂得为君恶乎】八年自申至于虎牢之境【陈氏曰终元年疆戚田传且言晋利诸侯之地】以报令狐之役【陈氏曰自是秦晋再交兵不书故十年书秦伐晋】晋人以扈之盟来讨【传发公後至例以此】珍之也【叶氏曰遂本以二事出故以壬午盟赵盾己酉盟雒戎相去四日非一事再见自不应去族何珍之云使经与其遂事则当书遂与雒戎盟于暴亦不得再见名氏经不言遂而传言遂其妄可知今按襄仲是行一盟中国一盟夷狄既不得用一事再见之例亦不当言遂杜云遂不受命而盟雒戎非事实也】故书以官【陈氏曰传见邲不书名氏且言襄夫人因戴族以杀邲故亦书人】皆贵之也【陈氏曰传释凡奔皆讥也於是特书官刘氏曰握节而死亦大臣常事效节而出自求免罪而已未见可贵之实赵伯循曰大夫二卿之死此杀昭公之渐也四人皆忠於公而左氏谓之党何谬耶按周官唯守邦国都鄙及出使有节六卿居官者未闻其有节也宋有六卿以王者後即周制也司马司城何节之云啖氏曰传言此二人不失节致误节义

为符节如孔父义形於色而误为女色也今按左氏不知宋大夫不名而书官乃夫子特笔见书司城则曰以其官逆之见书司马则曰其官皆从不能阙疑而妄释书法故其陋至此】九年使贼杀先克【陈氏曰杀先克不书非君命二传所谓两下相杀也】晋人杀先都梁益耳【传见讨乱称人】未葬也【刘氏曰诸侯逾年尚称公王者逾年反不称王乎毛伯求金非王命可知也书顾命曰伯相命士须材此则冢宰当国之文矣今按诸侯逾年称公为不可明年无君臣子辞也至於发号出令犹听於冢宰三年白虎通义曰不明年无君故逾年乃即位改元以纪事而未发号令也三年除丧乃即位践阼为主南面朝臣下称王以发号令也其说於周制得之左氏言既葬称君考之不详也又见属辞】晋人杀箕郑父士穀蒯得【孔氏曰士穀书经则是卿也七年令狐之战三军将佐无士穀十二年河曲之战三军将佐杜注无代士穀者而士穀得为卿者先蔑奔秦传无其代十二年栾盾将下军注云代先蔑者据传成文言之耳未必不是士穀代先蔑栾盾代士穀也箕郑上军将也传箕郑先士穀经士穀先箕郑者经以杀之先後传以位次序列传蒯得居下知其以位次也或者晋於将佐之外别有散位从卿若郤缺赵穿之类】楚子师于狼渊以伐郑【陈氏曰传见楚子书人】以惩不恪【叶氏曰比事观之计诸国之救在一月之内未为後时设楚人闻五国来救而退亦岂可以不及楚师罪之陈氏曰传释晋尝称大夫於是特称人且为晋失诸侯之渐今按传意不及此陈氏所得由传入每欲通传於经】楚公子朱自东夷伐陈【陈氏曰并前役不书】陈人败之【陈氏曰外败不书例在隐四年後仿此】获公子茷【例在僖三十三年後仿此】楚子越椒【未赐族称名与中国诸侯大夫同】以无忘旧好【孔氏曰僖公成风服除久矣今始来吊赠当以变礼待之何休膏肓云於礼既缓而左氏以为礼非也郑箴云若以为缓按礼卫将军文子之丧既除丧而越人来吊子游何得善之是古有以服终来吊者也】十年取北徵【陈氏曰传见秦伯书国】杀鬬宜申【陈氏曰传见鬬宜申不书族】遂及蔡侯次于厥貉【陈氏曰息会不书未骤以诸侯予楚也於是蔡实从楚故但书厥貉之次後见宣元年杜说非是今按十四年新城之盟陈郑皆在而蔡独不与其会于息矫情纾急与宋同尔故息会削不书而厥貉书蔡侯此笔削之权衡也春秋亦无予楚以伯之义杜氏固非是陈氏尤失之】麇子逃归【陈氏曰凡逃夷狄不书今按麇属楚小国虽逃史不书】十一年成大心败麇师於防渚【不书败说在隐四年】即位而来见也【传见诸侯丧毕不朝京师而朝大国】且言司城荡意诸而复之【陈氏曰凡大夫奔复之皆不书杜说非是】遂伐我【伐我不书以败之为义】获长狄侨如【下言椿其喉以戈杀之则其人之长六尺之戈所可及也注长三丈乃据鲁语与谷梁传而意之不能阙所不知若何休以为盖长百尺则怪诞矣】以命宣伯【名其三子事见襄三十年】鄭瞞由是遂亡【刘氏曰经言狄不言长安知是长狄赤狄白狄姜戎山戎陆浑戎春秋书之未尝略至於长狄何独不书传曰鄭瞞由是遂亡杜云长狄之种絶外传仲尼对吴使者曰长狄氏今日大人则孔子时长狄更为大人不得言絶吕氏曰记败狄于咸于瞞侵齐之下非长狄明矣今按传记长狄事甚异而此侵齐者乃为鄭瞞而鄭瞞举国皆长人则当书长狄以别之今经但书狄则鄭瞞非长人可知然得臣获侨如以名其子亦不可谓无其事据传曰鄭瞞曰狄曰长狄制言有法盖鄭瞞者狄国名而长狄自为一种服属於鄭瞞者是时为鄭瞞驱以侵齐鲁适为得臣所获於法自不得书杜氏误谓鄭瞞是长狄国名侨如为其国之君故说者因得以不书长狄排左氏为妄】十二年尊诸侯也【陈氏曰传释书法与邾庶其三叛臣异今按此史文也左氏既不能别白学者又不知有辞从主人之义遂诋传为妄过矣】始朝公也【孔氏曰刘炫云鲁公新立邻国及时来朝则曰公即位而来朝

晚则云始朝公也诸侯自新立来及时者则云即位而来见晚则云始见伯主即位鲁君往朝则曰朝嗣君鲁君新立往朝大国则曰即位而往见也】公许之【孔氏曰成五年有叔姬来归故知立其娣为夫人也释例曰桓公以僖二十三年即位襄六年卒凡在位七十一年文成之世经书叔姬二人一人卒一人出皆桓公夫人也今按陈氏云复求其次不近人情】不言絶也【说者疑絶叔姬非此子叔姬以前不书来归传又无子字卒不系杜氏谓未归而卒则亦不当遽絶之遂排传妄非也盖叔姬不安於假归寧以反故伯来请而後絶经不书始嫁与来宁法与鄆季姬同卒不系者既絶也经称子叔姬者孔氏曰周人字法积叔故或加子以自异是也传不称子亦省其可省者或时俗通称也】言非女也【孔氏曰丧服女子既嫁而反在父母之室从本服为之齐衰期此既书其卒当服其本服杜谱不知此叔姬是何公之女要姑与姊妹皆服期也】遂围巢【孔氏曰世本偃姓舒庸舒蓼舒鸠舒龙舒鲍舒龚以其非一故言属以包之】秦伯使西乞术来聘【刘氏曰杜氏云术不称氏史略文非也内大夫未赐族者犹不氏安知此术非未赐族者乎】寡君敢辞玉【聘义曰以圭璋聘重礼也已聘而还圭璋此轻财而重礼之义也然则聘礼终必还玉非不欲与秦为好也传录宾主辞令以见秦人之进於礼下云国无陋矣是也杜说非】赵盾将中军【陈氏曰传言秦伯晋赵盾见书人】交绥【孔氏曰司马法云将军死绥旧说绥却也言军却将当死绥必是退军之名】明日请相见也【孔氏曰慙者缺之貌今人犹谓缺为慙也沈氏云方言云慙伤伤即缺也】十三年以守桃林之塞【孔氏曰桃林之塞在南河之南远处晋之南境从秦适周乃由此路使詹嘉守此塞者以秦与东方诸侯远结恩好及西乞聘鲁亦应更交余国虑其要结外援东西图已故使守此厄塞欲断其往来故也】六卿相见於诸浮【孔氏曰六卿在朝旦夕聚集而特云相见於诸浮者将欲密谋虑其漏泄故出就外野屏人私议诸浮当是城外之近地】其处者为刘氏【陶唐氏之後为刘累累後为晋范氏士氏见襄二十四年昭二十九年传及晋语】邾文公卜迁于绎【陈氏曰凡自迁其国都不书】亦请平于晋【陈氏曰传见诸侯犹有尊晋之志】十四年故不赴【顷王崩葬不书说见庄十六年传知史有不赴不书之例遂援王孙争政事以实之非也】晋赵盾【陈氏曰传言赵盾见书人】纳捷菑于邾【陈氏曰传於齐纠小白阳生邾捷菑莒去疾皆见不书奔讥不在奔故】遂杀鬬克及公子燮【楚杀大夫或不告与中国异後仿此】贵之也【失与释司马司城书官同此独书字则又诬以不义其君】十五年宋华耦来盟【陈氏曰传言华耦不书名】贵之也【叶氏曰诸侯相聘使介有常不闻其官皆从也以此为贵岂春秋之意哉今按华孙者公子鲍之党来盟盖结鲁以辅篡不称使不名者非时君所使无所受命从史文也书官者夫子特笔使与八年书官者相首尾以异其事左氏於笔削之旨无传惟谷梁传曰以其官称无君之辞也明宋大夫之见杀者来奔者来盟者皆宋人无君之事盖此经逸义也而为其学者不能发明】亚旅【孔氏曰尚书牧誓司徒司马司空亚旅成二年传鲁赐晋三帅三命之服候正亚旅受一命之服皆卿後即次亚旅知是上大夫也】古之制也【刘氏曰尚书周官六年五服一朝不得於诸侯亦五年一朝也大行人职曰凡诸侯邦交岁相问殷相聘世相朝此为得中今按曹伯文十一年来朝至十五年再来偶合五年之数传遂以为古制由不见周礼耳】卞人以告【孔氏曰治邑大夫例呼为人孔子父为鄆邑大夫谓之鄆人知此卞人是卞邑大夫】亲之道也【孔氏曰祭敬者谓助祭於兄弟之家尽其敬也丧哀者谓兄弟死丧之事竭其哀也情虽不同谓内相怨恨不能和同当无絶其爱是相亲之道也】贵之也【陈氏曰传释外大夫未有书至者於是特书至说见後传今按此史例也传於史文有未详辄妄释之盖於鲁史旧章亦考之

未备】获大城焉曰入之【陈氏曰按襄十三年取郛之传曰凡书取言易也用大师焉曰灭弗地曰入陆氏纂例辨之矣今不取】无能为故也【陈氏曰传释盟恒序诸侯於是虽伯主在焉亦不序见晋失伯而楚兴】与而不书後也【说见七年】十六年及齐平【陈氏曰凡平虽内不书】疾也【赵伯循曰十二公除文公外余未当书不视朔岂皆无疾今按公疾不视朔必书史所以谨君疾重国政虽托疾亦书史无讎君以为直之义传释公四不视朔曰疾也乃据史法言之然经既削其真有疾者则此为托疾亦可知矣左氏知史而不知经後儒又不思经本出於史此笔削之义所以失传】所以服阼隰也【孔氏曰刘炫云按楚世家蚡冒卒弟熊达杀蚡冒子而代立是为楚武王则蚡冒是兄不得为父今知不然者以世家之文多有纰缪与经传异者非是一条杜氏非不见其文但见而不用耳刘以世家而规杜非也言服阼隰则阼隰本是他国蚡冒始服之也释例阼隰与僖四年次于阼为一地颍川召陵县南有阼亭楚自武王始居江汉之间则蚡冒之时未至中土不应已能越申息远服颍川之邑疑非也】羣蛮从楚子盟【陈氏曰传见楚子书人】夫人使谓司城去公【传序六卿於上而夫人但使司城去公则余五人者皆鲍之党也且知谋者也】使帅甸攻而杀之【不书甸兵攻而杀之者时告辞略但以弑君赴也】荡意诸死之【意诸来奔而请复无能为轻重虽死节不书嫌与苟息仇牧比】君无道也【刘氏口如传所说则公子鲍为不臣襄夫人为不母而昭公未有无道之实也传曰君虽不君臣不可以不臣不得轻此两人之罪反专恶宋公王申子曰君父天也岂臣子较得失之地乎今按明年四国伐宋传记晋人讨罪之辞而讥其犹立文公晋语记赵宣子请师於灵公以伐宋曰宋人弑其君晋为盟主而不修天罚将惧及焉公许之必有据矣独於昭公见弑始终加以无道与所序之事自相反何也当时列国皆政出大夫其士民知有大夫而不知有君谓晋赵盾弑君为良大夫而宋昭公见弑为无道皆弑君者子孙设辞以分恶杀耻左氏不能辨遂援以释经且立以为例後见宣四年襄三十一年】荡虺为司马【传见惟杀荡意诸右师以下皆在位】十七年失其所也【陈氏曰传释四国之大夫书人不予以讨贼之义晋自是凡三大举皆书人见宣元年二年十年今按襄二十五年夷仪之会晋受赂不讨齐弑君者而经序诸侯无异文刘氏诸儒因以駁传卿失所称人为非考之於经凡诸侯盟会皆从其恒称义与大夫不同不得以彼证此】无功也【陈氏曰传释会恒序诸侯於是虽伯主在焉亦不序】相及於绛【孔氏曰归生对晋称己君当云寡君之二三臣此言孤者盖郑伯身自对晋或自称孤归生因即以孤言其君也】赵穿公壻池为质焉【陈氏曰传言晋之不竞】乘其饮酒也【陈氏曰为成元年王师败起传】十八年乃谋弑懿公【称人从赴例在十六年杜陈说皆非】讳之也【传见恶不书弑杜陈说皆非既葬未踰年不称君当以公羊为正刘氏曰杜云先君既葬不称君者鲁人讳弑以未成君书之非也假令不讳遂书公薨乎一年不二君之义何所施此乃明称君者之不以葬为限果矣】仆因国人以弑纪公【陈氏曰传言仆弑纪公而书国】宋公弑母弟须及昭公子【陈氏曰讨乱虽杀母弟不书】以靖国人【孔氏曰世本云戴公生乐甫术术生碩甫泽泽生夷甫须须生大司寇吕今云曾孙误也】

卷五

钦定四库全书

春秋左氏传补注卷五 元 赵汭 撰宣公

元年尊夫人也【公羊传曰遂何以不称公子一事而再见者卒名也今按此鲁史成法成十四年侨如襄二十七年叔孙豹同陈氏曰传言逆称女以君为尊至称夫人以夫人为尊成十四年传曰称族尊君命舍族尊夫人妄加之也传无以公子为族之义】以定公位【篡立者请会于大国以免於讨且假外援临制其民人杜氏谓当时事情有此非谓当然】皆取赂而还【孔氏曰按此言会诸侯于扈文承宋人之弑昭公下知非十七年会于扈既取宋赂又取齐赂而称皆必为十七年十五年二扈之盟者按十七年会于扈全无为鲁讨齐之事但宋弑昭公其罪既大故先言之为鲁讨齐其失小故後言之传言皆者皆齐宋也】陈灵公受盟于晋【陈氏曰传言晋楚争诸侯犹莫适与且着文十年息会不书宋陈郑之实】救陈宋【孔氏曰陈在宋南是先侵陈去陈乃侵宋也盖陈既被侵方始告晋晋人起师救陈楚又移师侵宋晋师比至於郑楚师既已去矣故诸国会于棐林同共伐郑棐林郑地明晋始至郑不得与楚相遇故竟无战事言救陈宋者皆是致其意耳】楚蒍贾救郑【凡楚救不悉书陈氏云楚救必不能而後书详见属辞】二年获乐吕【凡获非卿史不书】既合而来奔【败者奔虽接我史不书】晋赵盾救焦【陈氏曰传见赵盾书人杜氏曰郑受楚命伐宋大败宋师获其二卿此晋之不竞也晋赵盾为政而畏越椒之盛托辞班师失宋之心孤诸侯之望所以称人】遂自陰地及诸侯之师侵郑【陈氏曰经自此三年不书晋师今按三国大夫传失其名氏孔氏谓实微者非也】桃园【孔氏曰晋语云赵衰赵夙之弟世族谱盾是衰子穿是夙孙是穿为盾从父昆弟之子也世本夙为衰祖穿为夙之曾孙世本传写多误其本未必然也】赵盾弑其君【传於赵盾崔杼弑君见齐晋史臣以直笔为官守与鲁史讳内恶不同曰弑其君乃録外之辞谷梁云弑公是矣】非子而谁【胡氏曰亡不越竟反不讨贼是盾伪出而实与闻乎故也】越竟乃免【刘氏曰使盾遂去晋国虽未越竟不能讨贼非其责也今盾还为大夫虽已越竟苟不能讨则罪矣哀八年公山不狃曰君子违不适讎国未臣而有伐之奔命焉死之可也安在越竟乃君臣之义絶乎吾以谓此非仲尼之言叶氏曰弑君大恶也有为有不为尔使与乎弑虽在四海之外无所逃使不与闻虽在朝如晏子谁能责之今按董狐责赵盾之辞惟谷梁传所录兼该礼法可正左氏之谬孔子曰以下乃盾子孙托圣人之言为其祖分恶至谷梁时犹有谓盾为忠臣者流俗相蒙有自来矣又见四年】于周而立之【於此见盾与穿志同道合逆新君不使他人而使穿欲免穿於讨也】晋於是有公族余子公行【孔氏曰公族之官掌教公之子弟余子属余子之官则适子属公族之官也孔晁注国语云公族大夫掌公族及卿大夫子弟之官是卿之适子属公族也晋语云栾伯请公族悼公曰膏梁之性难正也故使惇惠者教之文敏者道之果敢者谗之镇靖者修之是公族主教诲也下庶子为妾子知余子则是适子之母弟言亦为余子则知余子之官亦治余子之政令主教卿大夫适妻之次子也又云庶子为公行掌率公之戎车则公行不教庶子然则卿大夫之妾子亦是余子之官教之矣周礼无此三官之名夏官有诸子春官有巾车掌事与公族公行同无与余子同者天子诸侯礼异耳】赵盾为旄车之族【孔氏曰旄车之族即公行也车皆建旄谓之旄车之

族诗云建旐设旐是公车必建旐也周礼主车之官谓之巾车巾者衣也主衣饰之车谓之巾车此掌建旐之车谓之旐车之族】三年皆非礼也【王制丧三年不祭唯祭天地社稷为越绋而行事此天子之礼也鲁郊本非礼於是天王崩未葬而鲁之郊牛伤改卜牛又死乃不郊鲁之君臣盖有不安於其心者矣为左氏学者乃议其不郊为非礼岂知礼哉】晋侯伐郑及郕【陈氏曰晋君将一不书】未可问也【陈氏曰传言晋衰楚窥周室】朝于楚【孔氏曰诸侯太子摄行父事称朝此公子士非太子亦称朝者传通言之其实合称聘耳】四年权不足也【既云惧而从之是与谋也当从谷梁志同书重为义权不足乃俚俗之言非所以释经】称臣臣之罪也【君虽无道岂臣子所当较臣既弑君亦岂有无罪者传谬至此凡弑君或书贼主名或不书主名皆从赴告传不知策书从赴之法而妄为之辞故陈氏以凡例为後人依仿】着於丁宁【孔氏曰车上不得置簋簠以县鼓故为作跗若殷之楹鼓也晋语云伐备钲鼓战以淳于丁宁丁宁即是钲也郑玄云钲形如小钲军行鸣之以为鼓节】遂灭若敖氏【陈氏曰讨乱虽杀命大夫不书】郑未服也【陈氏曰经自此四年复不书楚子】五年书过也【知告庙未通复发此义岂他公之行举无过者陈氏亦不知书至有笔削故取之】卿自逆也【陈氏曰传释书法与纪裂繻异因以见庄二十七年莒庆今按内女适诸侯诸侯遣人来逆则称逆女非亲迎故从内为称其诸侯与大夫虽尊卑不同亲迎皆当称字以明齐也杜说非】反马也【何休膏肓据士昏礼无反马以难左氏郑玄箴之曰冠义云无大夫冠礼而有其昏礼则昏礼者天子诸侯大夫皆异也士昏礼云主人爵弁纁裳缙衣乘墨车从车二乘妇车亦如之此妇车出於夫家则士妻始嫁乘夫家之车也诗鹊巢云之子于归百两将之将送也国君之礼夫人始嫁自乘其家之车也则天子诸侯嫁女留其乘车可知也高固大夫也来反马则大夫亦留其车也留车妻之道也反马婿之义也孔氏曰礼送女适於夫氏留其所送之马谦不敢自安於夫若被出弃则将乘之以归故留之也至三月庙见夫妇之情既固则夫家遣使反其所留之马以示与之偕老不复归也杜言三月庙见谓无舅姑者士昏妇至其夕成昏质明赞见妇於舅姑若舅姑既没则妇入三月乃奠菜又记曰妇入三月然後祭行郑玄云谓助祭也是舅姑没者以三月而祭因以三月为反马之节舅姑存者亦当以三月反马也士昏又称若不亲迎则入三月然後婿见於妻之父母此高固亲迎则不须更见故讥其亲反马也】楚子伐郑【陈氏曰传见楚子书人】晋荀林父【陈氏曰晋卿将再不书】六年将可殪也【刘炫氏曰尚书泰誓云商罪贯盈言纣之为恶如物在绳索之贯不得为习也】楚人伐郑【陈氏曰并入八年书】取成而还【楚比年伐郑惟此年传记取成而还故杜氏以厉之役在此传盖有阙】七年不与谋曰会【经书内师及伐者二皆微者不称将桓十年伐郑传曰宋志也自余君大夫以师出皆称会如桓伐郑纳突哀挟吴伐齐岂皆不与谋者杜氏不复深考惟徇传为说非也刘氏曰诸侯相率而讨罪伐畔则是与谋已焉有连兵合衆人君亲将而曰不与谋者哉】以谋不睦【王臣泄盟史不书】讳之也【说者多以沙随平丘不讳驳此传为妄今知非妄者宣公恃齐而不事晋於是见止而以赂免其耻在内史故讳之沙随平丘晋虽有辞然成公以国难後期昭公政在强家非所讳也】八年白狄及晋平【陈氏曰义见十一年会櫟函传】灭之【孔氏曰舒蓼二国名者盖转写误当云一国名按释例土地名有舒羣舒舒蓼舒庸舒鸠以为五名则与文五年灭蓼同盖蓼灭後更复故楚今更灭之刘炫以杜为二国而规之非也今按经传记舒庸舒鸠皆冠以舒故释例知此舒蓼亦是其类孔氏谓注言二国为转写误已得之文五年传记楚子燮灭蓼不冠以舒者别自是蓼国杜氏据臧文仲之言谓蓼与六皆皐陶之後亦如文十六年灭庸与舒庸无与也孔氏并合文

五年所灭之蓼与此年舒蓼为一则又误矣】楚子疆之【陈氏曰传见楚子再书人】盟吴越而还【孔氏曰谱云吴姬姓周大王之子大伯仲雍之後大伯无子而卒仲雍嗣之武王克殷封其曾孙周章於吴为吴子又别封章弟虞仲於虞十二世而晋灭虞虞灭而吴始大至寿梦而称王寿梦元年鲁成公之六年也越姒姓其先夏后少康之庶子也封於会稽後二十余世允常句践立为越王越王元年鲁定公之十四年也外传曰芊姓归越是越本楚之别封或非夏后之後也】始用葛藟【孔氏曰藟字礼或作绋或作紼绳之别名也周礼遂人大丧荐六绋天子用六也丧大记君葬用四绋大夫士葬用二绋是绋者所以引柩也於殡则已有之系於輶车以备火灾有灾则引柩以避火及葬则用之以下柩也】避不怀也【孔氏曰曲礼云凡卜筮日旬之外曰远某日旬之内曰近某日丧事先远日吉事先近日郑玄云丧事葬与练祥也吉事祭祀冠娶之属也然则先近日先卜上旬不吉卜次旬又不吉卜下旬丧事则先卜下旬卜葬先卜远日避不思念其亲似欲汲汲早葬之也今若冒雨而葬亦是不思其亲欲得早葬故举卜葬先远日以证为雨而止礼也王制云庶人葬不为雨止者郑玄云虽雨犹葬礼仪少也】九年王使来徵聘【陈氏曰传言所以自文公至今再书聘今按徵者虽王使不书说见隐五年】厚贿之【陈氏曰传言周衰】言易也【传释不言灭说见襄十三年昭四年】以诸侯之师伐陈【无将帅故书法与牡丘救徐不同事与襄元年韩厥异者在会诸侯皆以师属林父伐陈而次于扈以待之故晋侯卒于扈而师还孔氏曰僖二十八年城濮宋齐秦以师属晋而经书其师此全不书者彼虽公卿不行仍有大夫帅之将卑师衆故称师耳此则全无将帅以兵付晋并入晋军林父独自帅之故唯书林父伐陈也今按城濮之战唯宋公不自将耳齐国归父无为不亲兵时经未书大夫将虽将尊师衆但书师为左氏学者不知此义故谓称师为将卑师衆也秦小子憖自合书人彼有笔削之旨此但史法亦不可并论也】公弗禁【陈氏曰传言杀所以称国】其泄冶之谓乎【陈洙氏曰此非圣人之言孔子称三仁曰比干谏而死反罪泄冶乎今按传以称国杀大夫为有罪故虽无罪见杀者亦必求其罪以实之杜氏见宋曹杀大夫有不名者遂以书名为贬非但不知经旨亦未究史法】郑伯败楚师于柳棼【陈氏曰凡伐之为所败但书伐不书败讥不在败之者他仿此】十年非其罪也【陈氏曰传释棼罪不在奔公谷诸家皆以氏为世卿惟左氏无此义於崔杼信矣】且告以族不以名【自此至崔杼弑君凡五十一年惠公之世杼应尚幼成十七年传言齐侯使崔杼为大夫明前此未仕故此年传说者不取今以告以族之说推之盖崔氏出自丁公杼之祖若父必有尝为卿者至杼虽未为卿其宠已足以偪高国此高国之所恶也故因惠公卒举族出之杼未为卿故不书名实卿族也故来告书其族如尹氏非王卿士於法不合书其立王子朝亦由世是卿族故史不得不书春秋辞从主人而世卿之失自见公羊讥世卿之说不为无所出也】不然则否【玉帛之使但谓告命相通不必言聘蔡与鲁未尝交聘而书其大夫出奔可见矣诸侯赴告之法如後世郡国文移合关通者须有常準左氏惟据近事言之故未尽】二子奔楚【陈氏曰不书奔以纳为义】晋士会救郑【陈氏曰救不书例在僖六年後仿此】逐其族【此亦卿族而经不书异崔氏者事与讨乱同】谥之曰灵【传见经不书葬由不成丧後见成十八年晋厉襄二十八年齐庄陈氏佚贼犹循二传之失】十一年陈郑服也【陈氏曰传见息会不书至辰陵然後书】令尹蔿艾猎城沂【孔氏曰此年云令尹蔿艾猎明年云令尹孙叔敖明一人也世本艾猎为叔敖之兄世本多误本不必然】况寡德乎【陈氏曰传见晋不在诸侯而从事夷狄楚於是主盟】将讨於少西氏【传见经先书讨贼然後书入陈】以诸侯讨而戮之【孔氏曰经无诸侯而云以诸侯讨之诸侯皆庆者时有楚之属

国从行也十二年邲之战经不书唐而传云唐侯为左拒昭十七年长岸之战经不书随而传言使随人守舟明此时亦有诸侯但为楚私属不以告尔今按谓楚不告非人情凡诸侯以兵属夷狄不序说见僖二十八年】书有礼也【陈氏曰传释楚入未有书爵者於是特书爵】郑伯逃归【非好会不告不入例陈说误】十二年不泯其社稷【孔氏曰郑桓公是周厉王之子宣王母弟又宣王封之故僖二十四年及此皆厉宣并言之桓公始封西郑武公始居东郑郑二公是始封之贤君】夷於九县【孔氏曰楚灭诸国见於传者哀十七年言文王县申息庄六年称楚文王县申息庄六年称楚灭邓十八年称武王克权僖五年灭弦十二年灭黄二十六年灭夔文四年灭江五年灭六又灭蓼十六年灭庸几十一国见於传言九县者申息定是其二余不知所谓苏氏沈氏以权是小国庸先属楚自外为九也僖二十八年传曰汉阳诸姬楚实尽之灭国多矣】何必楚【晋人释楚而甘心於羣狄以此】以后山林【楚世家云熊罾卒子熊仪立是为若敖若敖卒子霄敖立霄敖卒子熊煦立是为蚡冒蚡冒卒弟熊达是为楚武王孔氏曰按杜注文十六年传蚡冒楚武王父不从史记也以荆竹织门谓之箚门则箚路亦以荆竹编车故谓箚路为柴车方言云楚谓凡人贫衣破丑敝为蓝缕服云言其缕破蓝蓝然】郑不可从【传记士会栾书之言见晋大夫自知非楚敌故以不战丧师】上军未动【据传上军虽未动下言殿其卒而退是亦未尝出陈也杜以上军未动得书战则言战为虚文矣盖晋人耻以未陈见败告诸侯因下军从荀首获连尹襄老囚公子谷臣故以战告也】唐惠侯【陈氏曰唐久属楚不复见於诸夏故定四年蔡以唐侯伐楚不书明年楚灭唐亦不书】楚重至於邲【孔氏曰輜重载物之车也说文云輜一云輶前後蔽也蔽前後以载物谓之輜车人挽以行谓之輶輜重輶一物也】郑杀仆叔及子服【陈氏曰讨乱虽公子不书】桓子请死【孔氏曰檀弓云谋人之军师败则死之谋人之邦邑危则亡之今桓子将军师败故请死】遂围萧【陈氏曰传见灭不书围他仿此】河鱼腹疾奈何【孔氏曰叔展言必须入水故以水厄告之云如河中之鱼久在水内则生腹疾无此二物其奈湿何】卫孔达【陈氏曰传见三国之大夫书人】同盟于清丘【孔氏曰按传先軫或称原軫此盖先軫之後也上文称为彘子服以为食采於彘今复称原原其上世所食也於时赵氏有原同盖分原邑而共食之也】不实其言也【晋景公初年楚方得志於中国入陈围郑败晋师于邲灭萧矣晋於是时乃以先穀合诸侯大夫于清丘而称同盟则岂足以敌楚乎故皆夺其恒称明年宋人及楚人平则经旨可见矣传於此特发笔削之旨而惟以不实其言释之举其小节而遗其大体故义有不通也】十三年唯宋可以免焉【刘氏曰清丘之盟左氏以谓不实其言又曰唯宋可以免自相伐矣今按清丘三国大夫称人讥在晋也传不知此义而以不实其言均责三国故复为宋解之】十四年敢告【陈氏曰传言所以书国讨】复室其子【孔氏曰释诂以平为成则成亦平也】无假道于宋【楚子忿晋伐郑欲伐宋而无名故不假道以起怨其聘于晋非为好也以怠晋之救宋而已】乃杀之【非卿虽杀行人史不书】屨及於窒皇【孔氏曰庄十九年鬻拳葬於經皇注云經皇冢前阙经传通谓两观为阙者以其在门两旁而中央阙然为道虽则小门亦如此尔故杜於寝门冢门皆以阙言之此作窒彼作經字异音同未知孰是其名为窒皇及市名蒲胥其义皆未闻】十五年死又何求【传见古人临难不二由其察理素精叶正则曰古者审乎性命而定乎吉凶忠信敬义之目後世之所诵说而不能明者也而古人饰之於一事一事之曲折而数德者必间见焉皆可以指言而名举也故左氏録之】宋及楚平【平至是始书说见後传】尔无我虞【凡书平则不书盟兵交怨结以平为重陈氏犹不书盟与隐七年例自相违】荀林父【陈氏曰传见荀林父书师】及毛伯

卫【孔氏曰捷札一人而札在子上故杜疑经文倒札字也陈氏曰不书王孙苏义同僖十九年邾子因见毛召不书名】秦桓公【陈氏曰传见秦伯书人】谷出不过藉【孔氏曰既讥其税亩言非礼乃举正礼言谷出不过藉则知所税亩者是藉外更税故杜以为十一外更取十一且以哀公之言验之知十二而税自此始也】幸之也【螽未成蝻故不为灾杜注未失说者议之过矣本为一岁再生记异文偶与下饥相连传通饥释之以为幸之也注又以为喜而书之陋益甚矣】十六年晋士会【陈氏曰传见士会书人】晋侯请于王【传见列国之卿犹有请命者】且为大傅【孔氏曰天子大傅三公之官也诸侯大傅孤卿之官也周礼典命云公之孤四命郑众云九命上公得置孤卿一人春秋晋为伯主侯亦置孤卿文六年有大傅阳子大师贾佗则晋当置二孤】天火曰灾【孔氏曰圣人重天变故异其名春秋书灾多矣唯此言火耳程氏曰天火未尝不假人火以为灾凡人火皆天所为也唯雷火灾物者间有之而不可以常理论左氏分火为人灾为天未当】以修晋国之法【陈氏曰终前年杀毛召传】十七年郤献子为政【陈氏曰传言三郤所以见杀】皆母弟也【刘炫氏曰再言凡者前凡据适妻子为文後凡嫌妾子为君母弟不得称弟故更言凡也释例曰母弟公在虽俱称公子其兄为君则特称弟殊而异之也母弟之见於经者二十而传之所发六条而已凡称弟皆母弟此策书之通例也庶弟不得称弟而母弟得称公子故传之所发随而释之诸称弟者不言皆必称弟也孔氏曰公之母弟见经者郑段鲁公子友卫叔武实母弟而不称弟陈公子招昭元年称公子八年称弟今按太子之母弟谓适子也适子之生礼文虽降於世子而视庶子则有加矣故世子为君则适子得称弟皆周制也庶子为君而母弟亦称弟者时君以同母故优其礼秩使异於他庶子故史亦称弟此礼之变也鲁公子友与齐年郑语异称者任使之际内外异辞也卫叔武摄君称子使非摄君则当称字同蔡叔於文不可称某君之弟也郑段有笔削不可同论先儒多驳此例者考之弗详尔】十八年盟于绘【陈氏曰特相盟虽伯者亦不书且见晋衰】三踊而出【孔氏曰聘礼若聘君薨于後归执圭复命于殡升自西阶不升堂子即位不哭辨复命如聘子臣皆哭与介入北面哭出袒括髮入门右即位踊今身将出奔不得亲自复命故立介於位介当南面归父於介前北面执圭复命既复命之後北面哭乃退括髮讫前即位北面哭三踊而出也】善之也【大夫还不书此为遂出奔言故不称族者因上文如晋传善之杜非常皆非是与昭十二年公子慆异者大夫从公行不书则不得言还也】

成公

元年刘康公徼戎【陈氏曰传见言王师不斥刘子】二年取龙【传见外取邑虽取诸我不书经书伐书取与但书取不同陈氏龙人致寇自违其例】辞请曲县【郑氏曰乐县谓锺磬之属县於笋虡者轩县去南面辟王也王肃云轩县开一面故谓之曲县】许之【周礼巾车掌王之五路天子诸侯皆有樊纓之饰郑氏曰樊读如鞶带之鞶谓今马大带也纓今马鞅也玉路金路象路其樊及纓皆以五采罽饰之孔氏曰繁即鞶也字之异耳巾车孤卿大夫士皆无樊纓是繁纓为马之饰皆诸侯之服也按仪礼既夕士荐马纓三就为送葬设盛服尔又诸侯之卿有受革辂木辂之赐皆有繁纓特赐乃有皆非正法所有也】皆主郤献子【陈氏曰传见内外乞师皆不书见僖二十六年特书之杜氏不知此义今按外相乞师不告不入例】栾书将下军【孔氏曰宣十二年邲之战传称荀林父将中军先穀佐之士会将上军郤克佐

之赵朔将下军栾书佐之十三年晋杀先穀当是士会佐中军郤克将上军不知谁代郤克佐上军疑是荀首为之十六年士会将中军是林父卒矣当是郤克佐中军疑是荀首将上军荀庚佐之十七年士会请老郤克将中军当是荀首佐中军荀庚将上军所以知者此年传称楚屈巫对庄王云知罃之父中行伯之季弟也新佐中军则荀首於庄王之世已佐中军明士会老後郤克迁而荀首代也首於邲战尚为大夫不应宣之末年得佐中军故疑先穀死後代郤克佐上军也明年荀庚来聘传称中行伯之於晋也其位在三则此时荀庚将上军矣林父卒来已久不应始用荀庚故疑林父卒後荀庚即佐上军士会老後荀庚转将上军故杜以为士燮代荀庚也邲战以来赵朔无代今栾书将下军则赵朔卒矣故知栾书代赵朔不知此时谁代栾书佐下军也】未絕鼓音【孔氏曰周礼大仆军旅田役赞王鼓上云齐侯亲鼓则天子诸侯自将兵者亦亲执旗鼓以令衆】右援枹而鼓【枹击鼓杖也】奉觴加璧以进【孔氏曰襄二十五年郑入陈传曰陈侯免拥社子展执紼而见再拜稽首承饮而进见古者有此礼见司马法】五伯之霸也【孔氏曰郑语云祝融能昭显天地之光明其後八姓昆吾为夏伯矣大彭豷韦为商伯论语云管仲相桓公伯诸侯昭九年传曰文之伯也岂能改物是三代有五伯矣伯者长也言为诸侯之长也郑云天子衰诸侯兴故曰霸霸把也言把持王者之政教故其字或作伯或作霸也今按传以五伯对四王则通三代伯者言之是也宋襄秦穆不成伯楚庄吞噬中国岂有所谓勤而抚之以役王命之事】而复於寡君【孔氏曰礼承玉帛之物名为繅藉藉是承荐之言故为荐也言无物则空口以为报少有所得则与口为藉故曰藉口】敢不唯命是听【陈氏曰传言鞏之战晋师无名以怒出师以贪成之】禽郑自师逆公【陈氏曰传言四卿要公劳师故不书上郟之会杜云史阙非】皆受一命之服【孔氏曰此三帅皆卿也本国三命故鲁赐以三命之服司马司空舆师候正亚旅皆大夫本国一命故皆受一命之服周礼大夫再命此司马司空皆一命者春秋之时其事已异於周礼故大夫一命又曰司马司空本是卿官之名但晋之诸卿皆以三军将佐为号其司马司空皆为大夫之官舆师至於亚旅本是大夫官名军行有此大夫从者司马主甲兵司空主营垒舆师主兵车候正主斥候亚旅次於卿是衆大夫也无专职掌散供军事故後言之】何劳錡焉【陈氏曰传因阳桥之役备载巫臣事】故楚令尹子重【陈氏曰传见令尹子重书人】许灵公为右【孔氏曰诸言御戎皆御君之戎车此云彭名御戎知王戎车亦行也若君亲在军则君当车中御者在左勇力之士在右故御戎戎右常连言之此王车虽行王身不在故不立戎右使御者在中令蔡许二君居王上当左右之位若夹卫王然】故曰匱盟【释例曰书盟而责其卿所以成晋为盟主也陈氏曰传释六国之大夫皆书人以从楚也因见吾会之书嬰齐盟亦书人】三年讨邲之役也【晋自邲战後失郑非报复故传自其始叛言之】上失民也【传见经不书廐咎如潰】其位在三【孔氏曰於时郤克将中军荀首佐之荀庚将上军是其位在三也注云下卿者传称小国之上卿当大国之下卿又言卫在晋不得为次国荀庚若是中卿自然当先晋矣乃直以盟主先晋明是二人位等以此知荀庚是下卿也晋立三军将佐有六第三犹为下卿则其余皆下卿也盖以诸侯之礼唯合三卿是其正故定以三人为上中下余皆从下卿也卿有上下往年赐晋三帅皆以三命之服者侯伯之卿礼皆三命上卿下卿命不异也】赏鞏之功也【陈氏曰传言鞏之功晋兆六卿之祸】四年欲求成于楚而叛晋【陈氏曰传积晋失诸侯之故】以救许伐郑【传见救虽卿将不书】五年遂以告而从之【传见晋无修省之实】及子国【二子皆非卿不书】盟于垂棘【陈氏曰外君臣特相盟亦皆不书他仿此】宋公杀之【陈氏曰杀公子不书罪在围龟】定王崩【定王不书葬传欲见王

謚非衍文】六年非由人也【啖氏曰传意以为武军之宫非也若然炀宫复何谓乎刘氏曰左氏以武宫为武军杜氏知其谬因护曰既立武军又作先君武公之宫】侵宋【晋伯宗非卿合书人并郑人不书者同受伯主之令以卫将尊师衆举重故书某帅师既书某帅师又曰某人亦於文不便襄十九年栾魴同杜陈之说皆非】晋迁于新田【不书说见文十三年】晋师遂侵蔡【陈氏曰传言不书遂】以申息之师救蔡【林氏曰楚以申息为经营中国之本故三军二广不常出而大抵用申息之师僖二十五年以申息之师戍商密二十八年败于城濮楚子曰其如申息之老何二十六年申公叔侯戍齐文九年息公子朱伐陈成六年以申息之师救蔡其後囊瓦败申息之师于桑隧昔宣王之世申伯实以王舅为南国之屏翰所以扞城王室秦汉之际南阳为要地故楚有图北方之志其君多居于申大合诸侯亦在焉】七年斯不亡矣【说见文五年陈氏曰传言吴入中国而识者惧】乃通吴于晋【陈氏曰传着晋用巫臣之言遗中国之患】伐巢伐徐【陈氏曰传见吴楚始交兵皆略不书】是以始大通吴於上国【陈氏曰传着吴强之渐故曰始林氏曰楚人御吴以江故用舟师吴人挠楚以淮故用车战吴自徐伐巢淮西也入州来淮北也吴楚争淮自此始自鸡父之师一败而吴得州来灭巢及鍾离矣是则亡郢始於失淮】晋反戚焉【传见不书以戚奔】八年获申骀【陈氏曰晋自此因有诸侯之事遂伐楚皆不书後见襄元年韩厥十六年荀偃之师】大获焉【陈氏曰为九年郑围许传】来纳币礼也【说者疑昏礼不当使公子公孙非也国君臣诸父昆弟同姓之卿与异姓之卿何异如鲁郑无复异姓之卿当使何人陆氏又谓常事不书由不知书法一槩责以非常】来归自?故书【鲁以?夫人礼成丧故虽来归书卒且系之?与罪出异传非是】异姓则否【说者云嬴姒已曹?妨弋同姓国少疑此礼难行盖自大国吞灭已後言之传惟言同姓不言国欲并及卿大夫亦是通时俗为例然非礼意如卫晋来媵苟非先王之制循习已久安肯如此膏肓亦以为媵不必同姓所以博异气郑箴云礼纳女於天子云备百姓纳女於国君云备酒浆不得云百姓是不博异气也】九年吴人不至【陈氏曰传於是年记吴人不至为厉公会鍾离传於襄三年再记吴人不至为悼公会戚传皆所以见吴初不敢自列於诸侯而晋求之急】兵交使在其间可也【杀行人非卿例不书此为兵交发义】莒无备故也【陈氏曰传见伐莒书娶齐入郢书人经不书遂杜说非今按伐书将入书人一事再见略言之】诸侯贰故也【陈氏曰自宣二年至是秦狄伐晋故传发之且为十一年秦背成起】十年晋立太子州蒲以为君【孔氏曰汉未应劭作旧君讳云昔者周穆王名满晋厉公名州满又有王孙满是同名不讳则此为州满或为州蒲误耳今按叶氏疑晋侯生立其子经何以无异文非也策书有定体不得异文以尽事变又言不以名别亦非诸侯自将与出奔异】郑伯归【传见诸侯被执归国不书】讳之也【陈氏曰?言葬自内书今按公既见止鲁人不复使人送葬史亦不得蒙上公如晋书葬晋景公因成讳义非笔削之旨】十一年且涖盟也【刘氏曰若聘重盟轻略盟郤犇之盟又何故不略乎若盟与聘均书如晋涖盟岂不明白今按经书外臣来盟者四鲁臣如外涖盟者亦四皆无交涖者此未知何据上言公请受盟而後使归恐盟主於与国无交涖之事当是传误】周公楚【陈氏曰传见楚不书名】三曰复出奔晋【陈氏曰传言明年经所以书出】秦伯归而背晋成【陈氏曰传见晋失信於诸侯而秦不附】十二年周公自出故也【王人内京师故自周言出传例非】盟于宋西门之外【陈氏曰传见晋楚尝同盟不书至襄二十七年特书之】且涖盟【外涖盟不告例在隐七年】十三年而重贿之【凡大夫从公行史不书宣伯请先明非专使他仿此】遂从刘康公成肃公会晋侯伐秦【二公不书讥不在王室例在文三年】秦师败绩【陈氏曰不

书秦败绩说在後传杜说非是】及不更女父【秦爵二十等四不更十左庶长十一右庶长见汉书孔氏曰按传此有不更女父襄十一年有庶长鲍庶长武春秋之世已有此名盖後以渐增之商君定为二十非是商君尽新作也】迓晋侯于新楚【传言经书晋侯】杀子印子羽【陈氏曰两下相杀不书】负刍杀其太子而自立也【陈氏曰太子未嗣位遇害不书例在桓五年】十四年是先君宗卿之嗣也【世本孙氏出於卫武公至林父八世】卫侯见而复之【陈氏曰复宜不书传言非卫侯之志所以书归】旨酒思柔【孔氏曰兕兽名觶爵称以兕角为觶也周礼小胥职云觶其不敬者韩诗说觶五升诗良耜云有觶其角则觶是角貌】尊君命也【说见宣元年】郑伯复伐许【陈氏曰连兵虽君将不书义同宣三年晋侯】非圣人谁能修之【此或君子之言但传为称族去族发则亦陋尔】十五年不然则否【凡称人执者史策之恒辞称君执者经变文与伯主以讨罪之义传例不知篡夺之罪重於虐民陈氏讨其君不罪其民皆非】遂逃奔宋【陈氏曰奔者无罪不书例在庄八年】许之乃反【经书奔晋自晋归传言至河上乃反者始去国以奔晋告故归亦书自晋见其出入皆挟晋为重不复详所至者略外也杜以外纳告非也言自不必外纳刘氏又疑华元内有鱼石之援不待挟晋而入亦非也鱼石所以止华元实畏晋耳】言背其族也【荡山杀不书族与成得臣鬬宜申同传皆不能发例】遂出奔楚【向为人大司寇宋六卿之一不书者族同罪同独书鱼石举重】迁许于叶【传见许以畏郑故假外援以迁故经不言迁之者他仿此】十六年滕文公卒【传欲见滕子谥下偶连郑伐宋事注云因滕有丧赘甚矣说在僖十九年】败诸洧陂【孔氏曰乐惧戴公六世孙世本有文也将鉏为乐氏之族不知所出】至于鸣鴈【陈氏曰不书并入鄢陵】陈不违晦【孔氏曰兵尚杀陰道也行兵贵月盛之时故以晦为忌不用晦日陈兵】彻七札焉【孔氏曰潘尫之子其名为党襄二十三年申鲜虞之傅摯辞与此同】公出于坏隤【陈氏曰传言鄢陵之役齐鲁卫皆後师期不书】是皆君也【传言超过见偃鉏不知谋】以诸侯之师侵陈【陈氏曰不书】曹伯归【陈氏曰传言曹伯与僖三十年卫侯事同而书法异】使子叔声伯请季孙于晋【季孙行父公孙婴齐皆从公行史不书】侨如奔齐【盟辞见襄二十三年】刺公子偃【不杀鉏者鉏幼公不忌杜说非】位於七人之下【孔氏曰此时栾书将中军士燮佐之郤錡将上军荀偃佐之韩厥将下军荀偃佐之郤犇将新军郤至佐之是位在七人之下】而求掩其上【周语郤至自称已有大功欲求晋国之政召桓公谓之曰吾子则贤矣晋国之举不失其次吾惧政之未及子也至谓召桓公曰何次之有先大夫荀伯下军之佐以为政赵宣子未有军行而以为政今栾伯自下军往是三子也吾又过之无不及若佐新军而以之为政不亦可乎将必求之】其可乎【陈氏曰言郤至所以见杀】十七年侵晋虚滑【陈氏曰滑复见】至于高氏【陈氏曰传见救晋不书至襄二十三年始书之今按凡书救皆谓直救其国都或伐敌则书伐以救救而侵焉但书侵犯不足言救陈氏於此发义过矣杜云从告亦非後仿此】反自鄢陵【陈氏曰传言鄢陵之功晋厉公所以弑】高弱以卢叛【凡贱者叛史皆不书後仿此】帅师围卢【诸侯自围其邑史不书】而复之【传见所以不告叛】而立其左右【陈氏曰传见杀大夫乃厉公之意故皆书国杀】吾因奉孙周以事君【周语晋孙谈之子周适周事单襄公注晋襄公之孙惠伯谈晋自骊姬之譖不畜羣公子故周适周事单襄公】楚公子橐师【陈氏曰传见橐师书人】晋杀其大夫【传见杀三郤公之意杀胥童者书偃也而经无异文故皆以有罪发例然胥童不以两下相杀书者实以栾书中行偃当国以国讨告耳】十八年使程滑弑厉公【弑君者当国赴不言贼主名故书国以弑】以车一乘【陈氏曰传言君弑所以不得葬】以谷

叛故也【说在宣九年】晋悼公即位【释例曰厉公见杀悼公自外绍立本非君臣无丧制也孔氏曰丧服小记云与诸侯为兄弟者服斩郑玄云谓卿大夫以下也与尊者为亲不敢以轻服服之讎厉是文公之曾孙悼是文公之玄孙有缌麻之亲法当服斩而云无丧制者悼之父祖去晋适周厉既见杀悼即被迎迎之以为晋君即与厉公体敌且葬厉公以车一乘国内尚不以为君不可责悼公服斩也纵使当为之斩絶而别立亦非嗣矣】使魏相士魴魏颀赵武为卿【晋语云使吕宣子佐下军曰邲之役吕錡佐知庄子於下军获楚公子谷臣与连尹襄老以免其子鄢陵之役亲射楚王而败楚师以定晋国而无後其子不可不崇也使彘共子将新军曰武子之季文子之母弟也武子宣法以定晋国文子勤身以定诸侯二子之德其可忘乎故以彘季屏其宗使令狐文子佐之曰昔克潞之役秦来图败晋功魏颀以其身退秦于辅氏亲止杜回其勲铭于景钟至于今不育其子不可不与也又曰吕宣子卒公以赵文子能恤大事使佐下军孔氏曰吕宣子魏相也彘共子士魴也令狐文子魏颀也赵武父祖功名颇着故不序】使修士蒍之法【孔氏曰范武子为大傅孤也士为为司空卿也其法可遵故使二大夫居其官而修其法二人皆是大夫非孤卿也僖二十八年晋作三行三十一年即罢之以以为五军彼云屠击将右行未知辛即屠击之子孙也为是其祖代屠击也正以荀林父将中行遂以中行为氏故谓此人之先将右行因以为氏耳】使训勇力之士时使【孔氏曰周礼大御御官之长别有戎仆掌御戎车春秋征伐之世以御戎为重校正当周礼校人校人不属大御此盖诸侯兼官诸御谓诸御车之人设令国有千乘乘有一御皆令此官教之周礼有司右上士也掌羣右之政凡国家勇力之士能用五兵者属焉更有戎右中大夫此司士盖周礼司右之类故为车右属官勇力之士皆谓为车右者也设令国有千乘乘有一右总使此官训之使不犯法】立军尉以摄之【孔氏曰若梁余子养御罕夷解张御郤克之类往前恒有定员掌共卿御】使训羣驹之礼【孔氏曰周礼齐仆下大夫掌馭金路以宾朝覲宗遇享食皆乘金路杜言乘马御乘车之仆则当彼齐仆也月令季秋天子乃教田猎命仆夫七驹咸驾载旌旐则驹是主驾之官郑玄云七驹谓趣马主为诸官驾说者也周礼趣马掌驾说之颁是驹为主驾之官驾车以共御者程郑为乘马御御之贵者故令掌驾之官亦属之戎车贵强力乘车尚礼客故训羣驹令教马进退使合礼法也】以恶曰复入【刘氏曰事与例合者少与例违者多不托之从赴则托之从某例惟注者推言之不复可信也陈氏曰传言楚人伐宋以纳鱼石故书入卫人弑其君以逆卫侯衍故书归见入者难辞归者易辞也而作例者曰凡去其国国逆而立之曰入诸侯纳之曰归殊失传意今按归入言复说见属辞】晋必恤之【陈氏曰传言楚纳鱼石而晋悼复伯】楚子重救彭城伐宋【陈氏曰传见婴齐书人经有郑人传阙文】晋侯师于台谷以救宋【陈氏曰传言救虽君将不书】

春秋左氏传补注卷五

<经部,春秋类,春秋左氏传补注>

卷六

钦定四库全书

春秋左氏传补注卷六 元 赵汭 撰襄公上

元年追书也【据二年遂城虎牢不系郑者伯主之令以内辞书也哀三年围戚不系卫者以有卫石曼姑也此围彭城亦伯主之令且宋华元在焉而经特书宋彭城其为追书明矣但传以非宋地发义则失之】且不登叛人也【孔氏曰不与楚得取邑封人故使彭城还系於宋也】彭城降晋【晋降彭城而归诸宋见後二十六年传邑不言降与郕鄆小国异杜说非】齐太子光为质於晋【陈氏曰传为三年书光会起】入其郛【贾逵氏曰韩厥帅诸侯之师谓帅宋卫滕薛伐郑齐鲁曹邾?次于郕故诸侯之师不序今按不叙诸侯师说见宣九年晋人降彭城以五大夫归计齐不会皆在正月则此非围彭城之师矣下别书仲孙蔑出会可见】以待晋师【陈氏曰传言诸侯之师所以不书会晋师】以为之援【陈氏曰传言经所以不书二君】侵宋吕留【陈氏曰不书救郑书侵宋讥不在救楚自此再出师不书矣今按不书救说见成十七年】取犬丘【子然非卿并壬夫】来聘礼也【诸侯不服天子之丧自东迁则然传初无一语及之於是以朝聘为礼盖无足辨杜云未赴胡云已赴皆其末尔】礼之大者也【叶氏曰此乃强弱相倾何谋事补阙之云周官春朝以图天下之事夏宗以陈天下之谟天子之礼也】二年君子是以知齐灵公之为灵也【陈氏曰为六年灭莱起】於是子罕当国【孔氏曰礼君薨听於冢宰不须摄行君事此令子罕当国者郑国间於晋楚国家多难丧代之际或致倾危盖成公顾命使之当国非常法也子驷为政已是正卿知当国者为摄君矣沈氏云鲁襄四岁国家无虞今僖公年虽长大为偏於晋楚故令子罕当国也】晋师侵郑【不见宋师卫甯殖为会戚起略言之】官命未改【孔氏曰先君既葬嗣君正位乃得建官命臣十六年晋侯改服修官是其事也先君未葬皆因旧事不得建官命臣故云官命未改庶事悉皆未改不可即违先君言此者不用从晋之意故也】故书曰楚杀其大夫公子申【陈氏曰传见楚自公子申公子婴齐公子壬夫为政故不竟於晋婴齐卒在明年壬夫杀在五年】三年吴人伐楚【陈氏曰吴伐楚自此至二十五年始书之】寡君惧矣【孔氏曰周礼九拜一曰稽首诸侯事天子之礼也】敢不稽首【陈氏曰传言诸侯事伯主如天子】吴子不至【陈说在成九年】将伏劔【孔氏曰谓仰劔刃身伏其上而取死也】使佐新军【孔氏曰与之礼食者若公食大夫礼以大夫为宾公亲为之特设礼食服?云於是魏颡卒矣使赵武将新军代魏颡升魏绛佐新军代赵武也世族谱魏颡魏绛俱是魏犝之子颡别为令狐氏绛为魏氏盖颡长而庶绛幼而适也】士富为候奄【陈氏曰传累悼公之善】楚司马公子何忌侵陈【陈氏曰楚一不书】四年今我易之难哉【传记韩献子之言与五年范宣子之言见晋所以终弃陈於楚】楚彭名侵陈【陈氏曰楚再不书】陈无礼故也【不责诸侯不能救而讥陈无礼盖缘臧武仲语而失之】使臣弗敢与闻【周礼大宗伯云八命作牧九命作伯郑司农云牧一州之牧也伯长诸侯为方伯也孔氏曰元长也牧是州长伯是三伯虽命数不同俱是诸侯之长也】季孙不御【传始言无棣不虞终言请木用櫨明不从始议终得成礼或疑定夫人称定姒此定姒当从公羊作定弋据定夫人直从夫谥此乃妾母谥定不嫌相同】夷羿收之【伯明君此寒国之时弃不收采此传再言夷羿故以夷为氏】失人故也【

孔氏曰夏本纪禹生启启生太康为羿所距太康弟仲康立尚书孔安国云羿废太康而立其弟仲康为天子则仲康羿之所立但羿握其权哀元年传称有过浇杀斟灌以灭后相相依斟灌故浇灭之是相立为天子乃出依斟灌则相之立也盖亦羿立之矣此传言羿代夏政云不修民事寒浞杀羿言取其国家则羿必自立为天子也当是逐出后相羿乃自立相依斟灌斟寻夏祚犹尚未灭盖与羿并称王也及寒浞杀羿因羿室而生浇浇已长大自能用师始灭后相相死之後始生少康少康生杼杼又年长已堪诱豷方始灭浞而立少康计太康失邦及少康绍国尚有百载乃灭有穷据此传文夏乱甚矣而夏本纪云仲康崩子相立相崩子少康立都不言羿浞之事是马迁说之疎也】官箴王阙【孔氏曰言官箴者各以其官所掌而为箴辞】在帝夷羿【孔氏曰三代称王实与帝同史记於夏殷诸王皆称为帝此羿篡立为王故以帝称焉】田以时【陈氏曰传言景公以狄而失诸侯悼公以和戎而复伯】邾人莒人伐郕【伐郕不书後书郕举重】败于狐骀【臧纆非卿侵败史不书】鲁於是乎始髻【孔氏曰髻之形制礼无明文郑衆以为臬麻与髮相半结之杜以郑衆为长故用其说於时鲁师大败遭丧者多妇人迎子迎夫不能备其凶服唯髻而已同路迎丧以髻相吊传言鲁於是始髻者自此以後遂以髻为吊服虽有吉者亦髻以吊人檀弓曰鲁妇人之髻而吊也自败於壶骀始也郑玄云时家家有丧髻而相吊也髻者依丧服妇人为斩衰三年者髻其齐衰期亦髻其妇人吊服则郑注檀弓云大夫之妻锡衰士之妻则疑衰皆吉笄无首素总也】五年晋人执之【陈氏曰传释经不书晋执且为十年王叔出奔起】言比诸鲁大夫也【陈氏曰传释经不书及今按郕属鲁故偕如不言及下书仲孙蔑孙林父同】君子谓楚共王於是不刑【刘氏曰传言壬夫贪杀之当也共王杀之何谓不刑乎解经若此取舍安从哉陈氏曰传见楚以不竞杀二大夫】盟于戚【陈氏曰传言晋与吴盟皆不书後见哀十三年】无之而後可【陈氏曰传见楚用公子贞而晋人惧】会于城棣以救之【凡会伐会侵会救皆不书其地杜说非】公在位【丧大记大夫之丧将大斂既铺绞紵衾衣君至主人迎先入门右巫止于门外君释菜祝先入升堂君即位于序端士丧礼君若有赐焉则视斂既布衣君至君升自阼阶西乡刘炫又引记云君既即位于序端卿大夫即位于堂廉楹西北面东上主人房外南面主妇尸西东面迁尸卒斂宰告主人降北面于堂下君抚之主人拜稽顙君降升主人冯之命主妇冯之士之丧将大斂君不在其余礼犹大夫】可不谓忠乎【行父杀适立庶世专国政传舍大恶录小善亦当时流俗之论】六年郕恃赂也【鲁以往年夏属郕秋使听命於会安得遽有贡赋於鲁盖鲁人受其财贿杜说非】迁莱于郕【孔氏曰郕即小邾也小邾附属於齐故灭莱国而迁其君於小邾使之寄居以终身也今按传言灭又言迁则所迁者其族属人民与经言迁纪邢鄆鄆同非必其君】七年宜其不从也【孔氏曰礼孟春之月月令曰是月也天子乃以元日祈谷于上帝即是郊天之祭也其下即云乃择元辰天子亲载耒耜躬耕帝籍是郊而後耕也献子此言正与礼合据此郊天之礼必用周之三月而杂记云孟献子曰正月日至可以有事于上帝七月日至可以有事於祖七月而禘献子为之也此与礼记俱称献子二文不同必有一缪礼记後人所录左传当得其真若七月而禘献子为之则当献子之时应有七月禘者烝尝过则书禘过亦宜书何以献子之时不书七月禘也足知礼记之言非献子矣】隧正【孔氏曰五县为隧则隧正当周礼之遂人也掌诸遂之政令徒役出诸遂之民故为主役徒者】使掌公族大夫【孔氏曰无忌先为公族大夫今言使掌是与诸公族大夫为师也】公登亦登【聘礼公迎宾于大门内及庙门公揖入立于中庭纳宾宾入三揖至于阶三让公升二等郑玄云先宾升二等亦欲君行一臣行二言公先升二等然从臣始升一等

】而以疟疾赴于诸侯【孔氏曰鲁之隐闵实被弑而书薨讳而不言弑则亦不以被弑赴诸侯此郑伯实为子驷所弑而以疟疾赴於诸侯亦如隐闵之类讳而不言弑故鲁史不得书弑也陈氏曰按传记弑君无赴于他邦者於郑伯髡顽楚子麇齐侯阳生传皆言赴而经以卒书之说在後传】而执之【使公子黄往入楚军】陈侯逃归【陈氏曰传因言公子黄所以奔楚二庆所以见杀】八年孙击孙恶出奔卫【陈氏曰辟杀谓寘于理也今按凡辟杀诸子不告二孙微奔不告】郑子国子耳侵蔡【传见子国称人】尊晋侯也【陈氏曰传释卿不书以晋侯在会】乃及楚平【陈氏曰传言郑以六卿异心是以不竞】九年司里【孔氏曰周礼里宰每里下士一人谓六遂之内二十五家之长也此言司里谓司城内之民若今城内之坊里也里必有长不知其官之名使伯氏司此城内诸里之长也】正徒【孔氏曰大司徒掌徒庶之政令小司徒凡用衆庶则掌其政教凡国之大事致民是司徒掌徒役也言其正徒司里所使遂正所纳皆是临时调民而役之若今之夫役也司徒所具正徒者常供官役若今之正下也】奔火所【孔氏曰此遂正当天子之遂大夫故遂大夫职云各掌其遂之政令遂人职云五家为邻五邻为里四里为鄴五鄴为鄙五鄙为县五县为遂郑司农云王国百里内为六乡外为六遂郑玄云郊内比闾族党州乡郊外邻里鄴鄙县遂异其名者示相变耳尚书费誓云鲁人三郊三遂然则诸侯之有乡遂亦以郊内郊外别之也郊内属乡郊外属遂华臣直言具正徒不言其事者以是郊内之民共救火百役即上蓄水潦积土涂之类非唯救火而已若郊保之民既远故使随火所起奔往救之直救火而已】亦如之【孔氏曰刑书言刑器必载於器物郑铸刑鼎而叔向责之晋铸刑鼎而仲尼讥之此言刑器必不在鼎或书於板号此板为刑器耳】庇武守【孔氏曰车马甲兵司马之职使皇郈掌此事皇郈必是司马也校正主马於周礼为校人是司马之属官也周礼司马之属无主车之官昭四年传云夫子为司马与工正是诸侯之官司司马之属有工正主车也国有灾患恐致奸寇故使司马命此二官出车马备兵甲以防非常也言庀武守者甲兵器械藏於府库若今武库使具其守守此武库也】庀府守【孔氏曰鉏吾大宰传无其文贾逵云然周礼大宰之职掌建邦之六典杜以府为六官之典其事载於书故使其官守刘炫以为府守谓府库守藏今知不然者以百司府藏已属左右二师上华闕讨右官官庀其司向戌讨左亦如之则是府库之物二师总令羣官所主按哀三年鲁遭火灾出礼书御书藏象魏皆以典籍为重明此府守是六官之典若以为府库财物便是不重六典也】敝宫【孔氏曰周礼无司宫巷伯之官唯有内小臣寺人王肃云今後宫称永巷是巷者宫内道名伯长也是宫内门巷之长也诗巷伯云寺人孟子作为此诗故知巷伯寺人一也】二师令四乡正敬享【孔氏曰周礼大司徒云五家为比五比为闾四闾为族五族为党五党为州五州为乡乡大夫每乡卿一人此云乡正则别乡正非卿典之但其所职掌当天子之乡大夫耳周礼乡大夫属司徒此乡正言二师命之者二师分掌其方左右各掌其二乡也周礼乡为一军大国三军宋是大国不过三军而有四乡者当时所立非正法於时宋置六卿况四乡乎敬享不知所享何神周礼大祝国有天灾弥祀社稷禱祠弥犹徧也此遇天火为灾亦当徧祀羣神】于西门之外【孔氏曰周礼大祝掌六祝之辞以事鬼神祗祈福祥小宗伯掌建国之神位故所有祭祀皆祝宗同行盘庚汤之九世孙殷之第十九王也自盘庚至纣又十二王而殷?盘庚弟小乙是宋微子之八世祖也当时之意不知何故特祀之此备火灾所使羣官急者在前缓者在後故先司里次其正徒次纳郊保然後二师总庀羣官以刑器车马甲兵典法国之所重故特命三官庀具其物先外官备具救火然後及内故次司宫巷伯人事既毕乃祭享鬼神故次敬享祀盘庚之事也】心为大火【孔氏曰昭二十九年传

五行之官有木正火正金正水正土正各掌其职祀为贵神祀火星之时以此火正之神配食也天子祭天之时因祭四方之星诸侯祭其分野之星其祭火星皆以火正配食也周礼司燿掌行火之政令季春出火季秋纳火建辰之月日在胃昏七星中南方七星有并鬼柳星张翼轸七者共为朱鸟之宿昧谓柳也鹑火星昏而在南方於此之时令民放火昧星为火之候故於十二次昧为鹑火也建戌之月日体在房房心相近与日俱出俱没伏在日下不得出见故令内火禁放火也火官合配其人盖多不知谁食於心谁食於昧也】居商丘【孔氏曰释例云宋商商丘三名一地梁国睢阳也然则商丘在宋或以为漳水之南故殷虚为商丘非也】故商主大火【周礼保章氏以星上辨九州之地所封封域皆有分星郑玄云九州中诸侯之封域亦有分焉其书亡矣今其存可言者十二次之分也星纪吴越也玄枵齐也娵訾卫也降娄鲁也大梁赵也实沈晋也鹑首秦也鹑火周也鹑尾楚也寿星郑也大火宋也析木燕也孔氏曰其见於传记者则此云商主大火昭元年传云参为晋星二十八年传云龙宋郑之星又曰以害鸟帑周楚恶之昭七年四月日食传称鲁卫恶之去卫地如鲁地又十年传曰今兹岁在颛顼之虚姜氏任氏实守其地又三十二年传曰越得岁而吴伐之凶晋语云实沈之虚晋人是居周语云岁在鹑火我有周之分野是有分野之言也周礼虽云皆有分星不知其谁分之何必所分能当天地星纪在於东北吴越实在东南鲁卫东方诸侯遥属戌亥之次又三家分晋方始有赵而韩魏无分赵独有之汉书地理志分郡国以配诸次其地分或多或少鹑首极多鹑火甚狭於其分野或有妖祥而为占者多得其效盖古之圣哲有以度知非後人所能测也】遇艮之八【孔氏曰大卜周官而职掌三易然则周世之卜杂用连山归藏周易也周易之爻唯有九六此筮乃言遇艮之八二易皆以七八为占故此筮遇八谓艮之第二爻不变者是八也揲蓍求爻系辞有法所谓有七八九六说者谓七为少阳八为少陰其爻不变也九为老阳六为老陰其爻皆变也周易以变为占连山归藏以不变为占此言遇艮之八下文穆姜云是於周易晋语郑公子重耳筮得贞屯悔豫皆八其下司空季子云是在周易并於遇八之下别言周易知此遇八非周易也】无咎【孔氏曰若一爻独变则得指论此爻或二爻三爻皆变则每爻义异不知所从则当总论彖辞故姜亦以彖为言】弗得出矣【叶氏曰穆姜不应自暴其过如此盖卜筮家托穆姜之言为书传不能辨而妄信之今按传所载占筮事凡十八处皆此类也】秦人侵晋【陈氏曰不书至十一年始书之】肆眚围郑【孔氏曰将求民力赦诸侯之军内犯法者】皆从郑伯【周礼小宗伯掌三族之别以辨亲疏其正室皆谓之门子郑玄云正室适子也】以诸侯复伐之【一役非再举史不书】晋侯以公宴于河上【公有适祖母之丧晋侯不当与宴季武子不能以公固辞皆非也晋平溴梁之会亦与诸侯宴于温诸侯在丧废礼其来远矣孔氏谓传皆无讥则卒哭之後得宴乐何其谬也】一星终也【孔氏曰直言一星终知是岁星者以古今历书推步五星金水日行一度土三百七十七日行星十二度火七百八十日行星一百四十五度四者皆不得十二年而一终唯木三百九十八日行星三十三度十二年而强一周举其大数十二年而一终故知是岁星】以先君之祧处之【孔氏曰冠必在庙既行裸享祭必有乐所言金石节之谓冠时之乐非祭祀之乐也诸侯之冠礼亡大载礼公冠篇於士三冠後更加玄冕是也士冠礼亦行事於庙而不为祭祀士无乐可设而唯祧同耳天子有二祧诸侯无祧聘礼云不腆先君之祧是谓始祖也诸侯五庙则祧始祖也是亦庙也言祧者祧尊而庙亲待宾客者尚尊者不待至鲁而假於卫者及诸侯宾客未散故也】冠于成公之庙【孔氏曰以晋悼欲速故寄卫庙而假钟磬其裸享之礼归鲁乃祭耳】三驾而楚不能与争【陈氏曰传言悼公复伯】十年抉之以出门者【孔氏

曰县门者编板广长如门施关机以县门上有寇则发机而下之】以成一队【考工记车人为车柯长三尺轮崇三柯是轮高九尺彀长寻有四尺车戟常崇於彀四尺八尺曰寻则戟长一丈六尺也】言自会也【陈氏曰传释遂例】宾祭用之【孔氏曰鲁为季札舞四代之乐知四代之乐鲁皆有之明堂位云凡四代之服器鲁兼用之禘是三年大祭礼无过者知禘祭於大庙则作四代之乐也然则禘是礼之大者羣公不得与同而於宾得同禘者敬邻国之宾故得用大祭之乐也其天子享诸侯亦同祭乐故大司乐云大祭祀王出入奏王夏尸出入奏肆夏其他如祭祀郑注云王出入宾出入亦奏王夏奏肆夏又祭统云大尝禘升歌清庙下管象仲尼燕居云两君相见亦升歌清庙下管象是祭与享宾用乐同也刘炫云禘是大礼宾得与同者享宾用乐礼传无文但宾礼既轻必异於禘鲁以享宾当时之失用之已久遂以为常荀偃士勾引过缪之事以諂晋侯使听宋耳鲁以禘乐享宾犹以十一牢为士鞅吴以引徵百牢亦非正也】谓之夷俘【会灭不言以君归文不便也陈氏曰国微见俘不责死社稷非也昭四年赖子同】纳诸霍人【孔氏曰郑语及世本皆云偃阳妘姓是祝融之孙陆终第四子求言之後虞夏以来世祀不絶今复继之必知霍人为霍邑者汉书樊噲传云攻霍人是霍人邑名也】礼也【刘氏曰以是为礼诸侯谁不乐灭国乎今按传每以非礼为礼诸家辨驳已备皆不复论】晋荀罍伐秦【陈氏曰传见荀罍书师】郑皇耳帅师侵卫【上书伐宋举重】楚子囊郑子耳伐我西鄙【伐我无不书之法陈氏槩谓不悉书非也楚郑志在围萧以退为进非实伐鲁故史不书】故长於滕【传言序诸侯不同皆出伯主之意】言无大夫焉【陈氏曰传释书盗例】听政辟【孔氏曰子孔好专权自以身既当国望其一听於己为盟载之书曰自羣卿诸司以下一皆以位之次序一听执政之法】言将归焉【孔氏曰二年晋城虎牢则虎牢久已属晋非复郑有晋侯之意郑人若服将归之焉善晋侯故探其心而系之郑也】侵郑北鄙而归【事同九年】不能举其契【传见周衰至使晋大夫听王卿士之讼】十一年将作三军【孔氏曰以昭五年舍中军知此时作者作中军是鲁本无中军也此言请为三军各征其军知往前二军皆属公三卿不得专其民也此时襄公幼弱季氏世秉鲁政因公之少欲专其民故假立中军以改作也礼明堂位云成王封周公於曲阜地方七百里其时必有三军盖自文公以来伯主之令军多则贡重自减为二军耳非是鲁衆不满三军也往前若减一军亦应书之而经不书者季氏秉国权专擅改作卑弱公室故史特书之若军家自量强弱其军或减或益国史不须书也苏氏又云蒐于红革车千乘所以今不满三军者以当时采地衆多公邑民少故不能满三军三子各毁其乘以足之也周礼小司徒职云凡起徒役无过家一人是家出一人故乡为一军天子六军出自六乡则大国三军出自三乡其余公邑采地之民不在三军之数季武子今为三军则异於是矣以鲁国属公之民皆分为三亦谓之三军其军之民不啻一万二千五百家也何则鲁国合竟之民属公者岂惟有三万七千五百家乎明其决不然矣此作三军与礼之三军名同而实异也春秋之世兵革递兴出军多少量敌强弱士卒之数无复定準成二年鞏之战晋军八百乘计有六万人唯三卿帅之昭十三年平丘之会晋叔向云寡君有革车四千乘在计四千士卒成二十四军时晋国唯立三军则甲车四千属三军耳其军岂止一万二千五百人乎昭八年鲁蒐于红传称革车千乘千乘之衆充三军之数明知此分合竟之民以为三军军之所统其数异於礼也】各征其军【孔氏曰往前民皆属公公税其民以分赐羣臣今武子欲令民即属己己所应得自税取之恐穆子不从故先告之言军之家属者丁壮从军者官无所税其家属不入军者乃税之耳】三子各毁其乘【孔氏曰往前民皆属公二军非征伐不属三子故三子自以采邑之民以为己之私乘如

子产出兵车十七乘之类今既三分公室所分得者即是己有不须更立私乘故三子各自毁坏旧时车乘部伍以足成三军也】不入者倍征【孔氏曰其乘之人即所分得者国内三分有一之人也役谓共官力役则今之丁也邑谓赋税若今之租调也知邑是赋税者从民入官惟有力役与赋税耳赋税而谓之邑者赋税所入若私邑然故以邑言之】使尽为臣【孔氏曰昭五年传追说此事云季氏尽征之叔孙氏臣其子弟孟氏取其半焉叔孙氏臣其子弟不臣父兄谓取二分而二归公也孟氏取其半又如叔孙所取其中更取其半又以半归公谓取一分而三归公也此言孟氏是子弟中课取其一又分半以归公叔孙使子弟尽为己臣唯以父兄归公耳】郑子展侵宋【陈氏曰不书宋侵郑书郑侵宋讥在郑】东侵旧许【旧许见昭十二年传孔氏曰许南迁而郑得之】名山名川【孔氏曰郑氏云会同而盟明神监之谓之司盟司盟非一神也其司慎亦不知指斥何神但在山川之上知其是天神耳名山山之有名者谓五岳四镇也名川谓四渎也】秦右大夫詹帅师从楚子【陈氏曰传见秦附楚之实】郑子展出盟晋侯【外泄盟虽伯主史不书杜陈说皆非】会于萧鱼【孔氏曰会于萧鱼经虽无月但会下有冬故以为会在秋也传言日月次第分明是经繆史官失之也】甲兵备【孔氏曰射礼数射算二算为纯一算为奇是淳为耦也】歌钟二肆【孔氏曰周礼小胥云凡悬钟磬半为堵全为肆郑玄云钟磬者编悬之二八十六枚而在一簋谓之堵钟一堵磬一堵谓之肆传言歌钟二肆则兼有磬矣若其无磬不得成肆杜以传唯云歌钟故但解钟数云三十二枚其磬数亦同矣此二肆皆为编悬也下文及其鐃磬者鐃是大钟磬是大磬皆特悬之非编悬也】藏在盟府【孔氏曰僖五年传曰虢仲虢叔为文王卿士勲在王室藏於盟府是司盟之府掌藏功勲典策故有赏功之制也】礼也【孔氏曰以魏绛蒙赐始有金石之乐知未赐不得有也】秦庶长鲍庶长武【外微者称人左氏学者合二传为例陈氏不然微者之师不书凡书人皆贬故微者有得书人之义此以伐晋为重故微者得书考之经传左氏为是後放此陈氏曰秦不加兵於晋二十年矣】易秦故也【陈氏曰讥不在晋故不书晋败绩义同成十三年】十二年临於周庙礼也【孔氏曰杜以下文周庙尊於周公之庙知是文王庙也以郑祖厉王立所出王庙知为周公出文王故鲁立其庙也哀二年蒯聩祷云敢昭告皇祖文王卫亦立文王庙也郊特牲曰诸侯不敢祖天子大夫不敢祖诸侯而公庙之设於私家非礼也刘氏曰鲁君僭而立周庙三家僭而设公庙左氏不知遂真谓礼岂不误哉凡诸侯之丧异姓临於外同姓於祖庙同宗於祢庙於义足矣陈氏曰传见吴始赴】及姑姊妹【孔氏曰释亲父之姊妹为姑樊光曰春秋传云姑姊妹然则古人谓姑为姑姊妹盖父之姊为姑姊父之妹为姑姊妹列女传梁有节姊妹是谓父妹为姊妹也】为夫人宁礼也【孔氏曰楚共王以成元年即位秦嬴归楚盖应多年传因子庚之聘发其归楚非此年归而即使归宁按昭元年秦鍼奔晋其母曰弗去惧选鍼则景公之弟昭元年其母犹在杜云父母既没连言之耳陈氏曰传言秦楚合且为宋之盟释齐秦起】十三年孟献子书劳于庙礼也【孔氏曰公朝于晋而献子书劳知策勲非惟讨伐之功虽或常行有以定国安民亦书功於庙也赵伯循曰从朝还非有军戎之事何劳之有今按当时诸侯以善事伯主内外无虞为劳绩衰世之意也书劳即书至杜说非辨见桓二年】凡书取言易也【胡邦衡曰隐四年春莒人伐取牟娄上言伐下言取非易也五年冬宋人伐郑围长葛至六年冬取长葛取得为易乎今按根牟鄆郛皆不絶其祀故书取赵伯循曰凡得国而不言灭者不絶其祀也传盖不知此义】弗地曰入【陈氏曰按此与文十五年例自相违今不取叶氏曰传不明经故多岐以幸中】以从於下军礼也【孔氏曰什吏谓十人长也从车曰卒在车曰乘新军将佐皆迁其军内十人之长率其

步卒车士与其新军官属军尉司马之类令下军将佐兼领之周礼夏官凡军制不言十人有长而此云什吏者齐语管子设法吴语王孙雄设法司马法三者数人置帅皆以什计之异於周礼则晋人为军或十人置史也】所以从先君於祔庙者【孔氏曰祔近也於诸庙父最为近也计昭穆之次昭次入昭庙穆次入穆庙皆代为祖庙而言代为祔庙者谓与见在生者为祔庙】大夫从之【陈氏曰传记大夫自谥其君】吴侵楚【陈氏曰虽伐丧不书说见襄三年】获公子党【陈氏曰传见吴楚构兵交相获略不书】楚人归之【陈氏曰为三十年良霄再见且言归行人不书】十四年以退吴人【晋人方释楚而从事於秦势岂能为吴谋楚其通吴以挠楚不过欲其自相攻而已范宣子数吴不德而退之盖设辞以拒其伐楚之谋杜氏责其伐丧或者又疑传妄皆非】职女之由【刘氏曰此皆不实也诸侯解体非戎之过范宣子何以诬之去年蒐于绵上传曰晋国由是大和诸侯遂睦至此一年何故遽有言语漏泄不如昔者之事】逐我诸戎【孔氏曰僖二十二年传云秦晋迁陆浑之戎于伊川昭九年传云惠公归自秦而诱以来此言秦人逐之惠公与田三文不同者此戎本处瓜州明远在秦之西北秦贪其土晋贪其人二国共诱而使迁僖传是其实也昭传主专责晋故指言晋尔】济涇而次【陈氏曰传言公孙蚘所以书於向北宫括所以书於伐秦】晋人谓之迁延之役【陈氏曰传见悼公之怠】摄也【陈氏曰传言一役之间经有笔削後见二十六年】子展奔齐【陈氏曰传见奔非其罪虽母弟不书】无告无罪【传於此记定姜之言及臧孙之言後二十六年记右宰谷之言见卫侯衎不子不君宜失位】成国不过半天子之军【孔氏曰周礼大宗伯以九仪之命正邦国之位五命赐则七命赐国郑玄云则地未成国之名方四百里以上为成国如郑之言成国者唯公与侯耳伯虽与侯同命地方三百里未得为成国也夏官序云大国三军次国二军小国一军当以公侯为大国伯为次国子男为小国也】弗去何为【二语大甚不可为训乐师职兼风刺非卿大夫比故危言不忌左氏由此定弑君称君为君无道陈氏又以释经不书出君之人皆非也说又见昭三十二年】获楚公子宜谷【陈氏曰不书获义同十三年】无废朕命【陈氏曰传见周以后故锡命于齐】谋定卫也【陈氏曰传言晋成逐君之乱剽弑衎归卫有二君者十年晋为之也】齐人始贰【陈氏曰传言晋执政之贪齐於是加兵於鲁】十五年君子谓楚於是乎能官人【陈氏曰传言楚复强】固请而归之【陈氏曰终十年盗杀三卿传】十六年高厚逃归【陈氏曰大夫逃例不书传为齐晋交恶起本】为夷故也【虽伯国亦无以主兵大夫先诸侯之礼在鲁史亦无以主兵大夫序诸侯上之法卿虽可会伯子男然君臣之礼自若传发此义赘矣】复伐许而还【陈氏曰传着经所以但书伐许】敢使鲁无鸩乎【为十八年同围齐传】十七年遂奔陈【杜氏曰经书秋者以始作乱时来告孔氏曰传因华臣之出本其惧罪之由故於冬之下追言华閱卒耳其实华閱之卒或在九月之前华臣弱其室杀其宰当在九月内耳今按经书华臣出奔在秋而传记其事在冬且详其日月杜氏谓以始作乱时来告亦非由左氏所据载籍或追录旧事日月讹舛不与经合传姑仍之以示传疑之义不得以从赴为辞其传记在前而经书在後者乃可言从赴尔他仿此】苴絰带杖菅屨【孔氏曰丧服云苴絰杖绞带此传带不言绞亦当为绞带也若腰带则谓之絰故丧服注云麻在首在腰皆曰絰绞带者绳带也凡丧服冠纓带屨皆象吉时常服但变之使粗恶耳其衰与絰是新造以明义故特为立其名】非大夫之礼也【杂记云大夫为其父母兄弟之未为大夫之丧服如士服士为其父母兄弟之为大夫者之丧服如士服如彼记文则大夫与士丧服不同记是後人记当时之事今此晏子之老亦讥晏子所为非大夫之礼是时之所行士及大夫丧服各有不同也晏子实为大夫而行当时

之士礼晏子反时以从正其家老不解谓晏子为失故据时所行而讥之也晏子其父始卒则晏子未为大夫言晏子为大夫者礼丧服大夫之子得从大夫之法【唯卿为大夫【孔氏曰檀弓云鲁穆公之母卒使人问於曾申曾申对曰哭泣之哀齐斩之情饘粥之食自天子违然则天子以下其服父母尊卑皆同无大夫士之异晏子所行是正礼也言唯卿得服大夫服我是大夫得服士服又言已位卑不得从大夫之法者是恶其直已以斥时之失礼故逊辞略答家老也家语曾子问此事孔子云晏平仲可谓能辟害也不以已是而驳人之非故王肃与杜皆为此说】十八年齐侯伐我北鄙【陈氏曰传见齐侯书师】守之广里【此言齐人守平陰之防於书围齐何与後十二月内其三门焚其四郭乃围齐之事杜说非】南及沂【陈氏曰传状晋师之暴於是天子始昏于齐】天道多在西北【孔氏曰岁星右行於天大率一岁行一次二十八年岁在星纪距此十一年郤而数之此年在豕韦豕韦一名娵訾当亥之次也周十二月夏之十月其月又建亥故曰多在西北】十九年归之於我【不书归在师受之】晋栾黶帅师【乐魴非卿合书晋师不书义同成二年伯宗】妇人无刑【孔氏曰妇人淫则闭之於宫犯死不得不杀於五等之中无墨劓刖也】使以行礼也【陈氏曰终十四年书蜚传】从君於昏也【说见僖十一年下子孔同赵伯循曰据传齐高厚楚郤宛等死并是两下相杀而经以国讨为文者盖杀者皆承君命而杀之故经以累上之辞书之传则杂史之记意在专归於杀者故不録其君命耳】二十年孟庄子伐邾以报之【刘氏曰晋人既执邾子又取邾田何谓未报乎】言非其罪也【公子黄以偁为二庆所逐不得为无罪传序公子燮事若能谅其心者犹以不与民同欲罪之则以书国讨为必有罪故也凡传叙事实而断义非往往类此】曰孙林父甯殖出其君【言出君之罪无国不记然南面之君祸福自己故鲁春秋但书君自出而臣之罪亦不可掩陈氏谓孔子笔削之非也鲁史固非他国可及】二十一年重地也【陈氏曰传释来奔虽贱有得书者後见昭五年三十一年叶氏曰莒有庆有挈邾有畀我有快皆非以地叛者邾莒虽小国再命之大夫自得以名见今按邾莒大夫列于诸侯之会未有以名见者此皆以接我名】辄栾氏也【陈氏曰传言晋连年会诸侯皆以细故】二十二年臧武仲如晋【不书非公命】执事实重图之【陈氏曰传言子产以辞令立国因见周季文胜其实之敝自子产叔向皆不能免今按此记子产之言与二十九年女叔侯论鲁事皆以见伯国政令无节诸侯不胜其劳晋之不竞以此】殷以少牢【孔氏曰少牢馈食礼者诸侯之大夫时祭之礼也是时祭用少牢今公孙黑肱使黜官薄祭故时祭用特羊殷祭乃少牢又杂记云上大夫之虞也少牢卒哭成事祔皆大牢大夫得用大牢者丧祭故进一等士丧礼士遣奠用少牢是也大夫无禘祫而云殷三年祭者礼记言大夫有善於君祫及五世是也】遂缢而死【程氏曰使子南无罪弃疾当告於其父而逃之如其有罪而君杀之不可曰弃父事讎也舜杀鲧而禹臣之古有是事】辞八人者而後王安之【陈氏曰传言楚亟杀大夫人多自危】

卷七

钦定四库全书

春秋左氏传补注卷七 元 赵汭 撰襄公

二十三年礼为邻国阙【孔氏曰孝公晋平公之舅也尊同则相为不降平公於礼为舅当服緦麻三月但緦麻既轻其恩不过邻国故传言礼为邻国阙也杜言诸侯絶期者据礼之正法言诸侯尊降其亲虽有本服期者亦当为之阙故以邻国责之礼父在为母期丧絶旁期非母也】庆氏以陈叛【叛楚非叛国故不以叛告】遂杀庆虎庆寅【衆役人实杀二庆以国讨为文史从告】以藩载栾盈及其士【陈氏曰传言栾盈不书自齐文同鱼石】听於中行氏【孔氏曰十三年传云荀罃卒十四年传言盈生六年而武子卒是其少也知悼子荀首之孙中行吴荀林父之曾孙首是林父之弟首为知氏林父为中行氏是同祖也悼子是荀吴二从叔父故相听从计悼子年十六不得为十七故沈氏云後人转写误】及七舆大夫与之【七舆大夫杜氏说见僖十年则此七舆大夫杜亦为主副车之官也刘炫云若是主公车则当情亲於公不应曲附栾氏服云下军舆帅七人是也】墨纁冒絰【孔氏曰夫人为其兄弟当大功丧服大功布衰牡麻絰冒絰者以絰冒其首也乐王鲋使宣子诈为夫人孝服也案经葬祀孝公之下始书栾盈复入于晋则栾盈之入在孝公葬後杜解诸侯既葬除服而夫人犹有服者葬祀孝公书鲁使去之日栾盈入晋当在葬祀孝公之前故夫人犹有服得诈为之也今按诸侯葬为雨止而有当书日者未必使行即书杜氏既葬除服之说据之此传亦倍缪之一证孔氏曲为说通之过矣】奉公以如固宫【孔氏曰晋语云范宣子以公入于襄公之宫盖襄公有别宫牢固故谓之固宫】申鲜虞之傅摯为右【孔氏曰俗本多云申鲜虞之子今案注云傅摯申鲜虞之子若传先有子字无烦此注故今定本皆无】况以恶乎【陈氏曰为二十五年废君起本】取朝歌【陈氏曰齐始叛晋】张武军於荧庭【武军前见宣十二年後见昭十三年】获晏髡【陈氏曰晋乱不能出师】次于雍榆礼也【鲁语平丘之会子服惠伯见韩宣子曰昔栾氏之乱齐人间晋之祸伐取朝歌我先君襄公不敢宁处使叔孙豹悉帅敝赋以从军吏次于雍榆与邯郸胜击齐之左犄止晏莱焉齐师退而後敢还今按邯郸胜即赵胜晏莱即晏髡也鲁师次于雍榆盖有晋命传偶不能详谷梁传曰言救後次非救也啖氏曰凡救当奔命以往救次失救道也言次于雍榆罪叔孙也诸家多从之皆不考事实而因文生义谓之得经旨可乎】立于户侧【孔氏曰丧大记云大夫之丧主人坐于东方此立于户侧则在室户之东西面立也礼记云坐此云立者以季孙来故立尔】夫石犹生我【孔氏曰服云夫谓孟孙也桓十三年传夫固谓君夫岂不知服云夫谓鬬伯比也皆谓所斥前人为夫】使正夫助之【孔氏曰七年传称叔仲昭伯为隧正谓南遗请城费吾多与而役是役夫隧正所主隧正当属司徒臧氏为司寇而借之於臧氏者盖当时臧氏兼主掌之】问盟首焉【周礼外史掌书外令掌四方之志】其孟椒乎【陈氏曰传言臧氏衰三家益专】言自外也【陈氏曰传释去位不得书大夫】下妾不得与郊吊【孔氏曰檀弓云哀公使人吊蕢尚遇诸道辟於路画宫而受吊焉曾子曰蕢尚不如梁之妻知礼也檀弓云君遇柩於路必使人吊之是男子从柩在路则得野受吊妇人无外事虽从柩亦不得野受吊耳若男子得野受吊而曾子非蕢尚者以蕢尚在朝显者故宜吊於其家若君遇柩於路使人吊之者谓庶人及微小之

臣也檀弓因蕢尚而说此事云?梁死其妻迎其柩於路而哭之哀则?梁之妻虽从柩而辞不受吊是由异於男子故也】二十四年为陶唐氏【孔氏曰如杜此注陶唐共为一名即是晋阳县也史记云帝尧为陶唐氏韦昭云陶唐皆国名犹汤称殷商也按经传契居商故汤以商为国号後盘庚迁殷故殷商双举历检书传未有帝尧居陶而以陶冠唐盖地以二字为名所称或单或复也张晏云尧为唐侯国於中山唐县然则唐是中山县名非晋阳也尧自唐侯升为天子号曰陶唐其治在晋阳耳舜受尧禅封尧子丹朱为王者之後犹称为唐终虞之世以陶唐为号故曰自虞以上也】为豕韦氏【孔氏曰郑语云祝融之後八姓大彭豕韦为商伯矣又曰彭姓彭祖豕韦则商灭之矣贾逵云大彭豕韦为商伯其後世失道殷德复兴而灭之然则商之初豕韦国君为彭姓也其後乃以刘累之後代之详见昭二十九年传注】为唐杜氏【孔氏曰以国语杜伯文不连唐知唐杜二国名知殷封之於唐者以周成王灭唐故也知後封於杜者以宣王时有杜伯故也晋语云昔隰叔子违周难奔於晋生子舆为司空世及武子佐文襄为卿以辅成景後之人可则是以受随范子舆士蔦字武子士会也会士蔦之孙是隰叔四世及士会食邑於范为范氏也】楚子伐郑以救齐【不言四国传略之】公孙之亟也【陈氏曰传言晋师之懈】齐人城郚【传自此以後言齐人城郚者三由不得其详故屡举之外传周语灵王二十二年谷洛鬪将毁王宫韦昭曰穀洛二水名水激有似於鬪灵王时谷水盛出於王城之西而南流入于洛水毁王城之西南将及王宫故齐人成郚】二十五年将庸何归【将庸何归申释上文君死安归注误】舍之得民【陈氏曰传言齐不用贤臣为政虽有晏子不死其难】四簋【周礼缝人掌衣簋柳之材郑玄云必先纆衣其木乃以张饰也丧大记云棺饰君黼簋二黻簋二画簋二郑玄云汉礼簋以木为筐广三尺高二尺四寸方两角高衣以白布画者画云气其余各如其象柄长五尺车行使人持之而从既窆树於圻中檀弓曰周人墙置簋是也礼器云天子八簋诸侯六簋大夫四簋郑玄云八簋者加龙簋二孔氏曰方言云自关而东谓扇为簋则簋是扇之类也】不跽【孔氏曰礼丧车乘人专道而行无贵贱一也此不止行人略贱之】不以兵甲【孔氏曰服?云下车遣车也杂记云遣车视牢具郑玄云言车多少各如所包遣奠牲体之数也然则遣车载所包遣奠而藏之者与遣奠天子太牢包九个诸侯亦太牢包七个大夫亦太牢包五个士少牢包三个大夫以上乃有遣车如郑之所言遣车者乃是明器涂车刍灵载所包遣奠藏之於圻中下车若是明器则甲兵亦是明器当云无甲兵不得云不以甲兵也杜云送葬之车则谓此为贰车非遣车也言下车者盖谓麤恶之车非良车也周礼大行人云上公贰车九乘侯伯贰车七乘子男贰车五乘则齐是侯爵法当车七乘耳今传举七乘言其不依旧法知齐旧依上公之礼贰车九乘其送葬又有甲兵今皆降损也用甲兵者葬是送终大礼法当备列军阵若汉葬霍光发材官轻车比军伍校士军陈至茂陵以送其葬所以荣之也陈氏曰传言君弑不得以礼葬义同成十八年今按传见庄公所以不书葬下又见二十八年】齐人以庄公说【刘炫云齐人以庄公伐晋说晋言晋讐既死令新君服从晋也】男女以班【刘炫云哀元年蔡人男女以辨与此同谓男女分别示晋以恐惧服罪也】晋侯许之【传见晋失盟主之义杜氏谓齐有丧故经无讥说者因据以驳卿不书失所之例皆非也诸侯之会经无异文与侵伐不同刘氏曰假使晋遂讨齐破其城杀其贼污其宫未可谓之伐丧也弑君而谓之伐丧诸侯其无讨贼者矣】崔子止其帑以求五鹿【陈氏曰传言卫献公所以得入】司空致地乃还【孔氏曰陈国既乱致使官司废阙人民分散符节失亡故令陈之司徒招致人民司马集致符节司空检致土地使各依其旧】知楚令尹【孔氏曰下文始言屈建为令尹者因伐舒鸠而追序之其实蘧子冯卒

在此盟前故服杜皆以令尹为屈建也】兵可以弭【传见晋衰赵武偷故厌兵弭兵之说
不始於向戌】不如速战【孔氏曰方言云垫下也吴地下湿】以备三恪【孔氏曰乐记云武
王克殷未及下车而封黄帝之後於蓟封帝尧之後於祝封帝舜之後於陈下车而封夏后氏
之後於宋封殷之後於宋郑玄以此谓宋为二王之後蓟祝陈为三恪杜意以此传言以备三
恪知其通二代而备其数耳恪敬也封其後示敬而已故曰恪其二代不假称恪惟陈为恪耳
今按二代以王者之後各自用其礼乐不但示敬而已故不得言恪则三恪当从郑氏通蓟祝
陈数之为是】慎辞哉【陈氏曰传申言郑辞令之美而过其实今按郑辞令之美孔子尝称
之若论语所记是也传仲尼曰云云者未必皆一时之言不言谁知其志以上亦未必真圣人
所述也】量入修赋【孔氏曰九上之内偃猪京陵无物可入而言九土之所入者总言之又
曰山林薮泽京陵偃猪本非可食之地不在授民之限】可哀也哉【传记大叔仪之言及後
蘧伯玉去国见甯氏废立贤臣皆不与】成而不结【陈氏曰传言齐楚固相交秦晋盟而不
合是以宋之役诸夏始判遂成南北之势故特出之】二十六年能无卑乎【传见晋室卑故
急於结秦好】子鲜不获命於敬嬴【传见子鲜为复非己意】杀子叔及太子角【孔氏曰
剽是穆公之孙黑背之子於献公为从父昆弟成十年卫侯之弟黑背帅师侵郑传曰卫子叔
黑背侵郑是黑背字子叔即以子叔为族也元年卫侯使公孙剽来聘传云卫子叔来聘是举
族而称之也今按举族而称如鲁称季孙孟孙之比然黑背父子乃是公子公孙无称族之法
盖如叔盼之子公孙婴齐称子叔婴齐耳陈氏曰传见弑君虽杀太子不书以弑君为重】言
罪之在甯氏也【陈氏曰传释弑君书主名例嫌为衍弑剽无罪特明之】专禄以周旋戮也
【程氏曰此义施之常人则可林父出君而君入畏诛而叛非特专禄而叛也】国纳之也【
陈氏曰传释复归例按卫侯归言国逆与成十八年例违见例非是】公使止之【陈氏曰传
终言卫侯不君】三命之服【晋命士会传言请于王此不言请于王则郑伯自赐之可知礼
乐自诸侯出久矣或请或不请无复定準杜说非也】先八邑【孔氏曰周礼小司徒四井为
邑故杜以八邑为三十二井刘炫云案论语有十室之邑又杜注免余邑为一乘之邑又宋郑
之间六邑岩戈锡等杜何以知此邑必为四井之邑今知不然者邑之为名大小无定子展子
产为卿日久先有采邑今以入陈有功加赐田土不应更以八个大邑而又与之至於免余辞
邑云唯卿备百邑故杜以为一乘之邑合论语百乘之家其实一乘称邑文无所出杜以正邑
解之得渐赐土田之义又八邑六邑为节级之差刘以为大邑而规杜氏非也】将以讨卫也
【传见晋合诸侯为臣讨君】颀遇王子弱焉【陈氏曰传见围令素行於国】不失所也【
传见经不书大夫必有为遂妄释之胡氏赵武称人为助孙氏良霄不贬以郑伯如晋独不释
君助臣得经旨】使女齐以先归【伯主会而执大夫非内不言以归陈袁涛涂季孙意如是
其例也】晋人执而囚之士弱氏【不书执卫侯为臣执君不可以为训】文子以告晋侯【
上言取卫田益孙氏下记取卫姬见赵武叔向皆从君於昏家氏曰是时晋赵武为政叔向为
之谋主二子者崇虚誉而无实益】国子赋饔之柔矣【孔氏曰汉书艺文志无周书篇目其
书今在或云是孔子删书之余按其文非尚书之类彼引诗云马之刚矣饔之柔矣马亦不刚
饔亦不柔志气麤麤取与不疑此诗余无所见故谓彼文是也】为太子内师而无宠【孔氏
曰内师者身为寺人之官公使之监知太子内事为在内人之长也】而言复故【孔氏曰楚
语云椒举将奔晋蔡声子遇之於郑郊飧之以璧贿曰子尚良食尚能事晋君以为诸侯主辞
曰非所愿也若得归骨於楚死且不朽声子曰子尚良食吾归子故椒举降三拜纳其乘马声
子受之传言复故杜云共议归楚之事谓此也】成陈以当之【孔氏曰郑衆云此范匄所言

苗賁皇亦言之故声子引以为喻】栾范易行以诱之【孔氏曰贾逵郑衆皆读易为变易之易贾以行为道也栾为将范为佐二人分中军别将之欲使栾与范易道令范先诱楚栾以良卒从而击之郑谓中军与下军易卒伍也计设谋之时道未定分何以言改道行非卒伍之名安得为易卒伍也二说皆不可通楚语说此事云雍子谓栾书曰楚师可料也在中军王族而已若易中下楚必歆之韦昭云中下中军之下也歆犹贪也简易栾范之行示之以弱以诳楚也是韦昭已读为简易之易故杜从之也此与楚语俱述声子之言传言鄢陵之败苗賁皇为之楚语云雍子为之二文不同刘炫以为国语非丘明所作为有此类往往与左传不同故也】声子使椒鸣逆之【陈氏曰随会在秦而六卿谋椒举在晋而子木惧此晋楚所以代兴也於传声子之辞知战国说士之渐】辞不失旧【孔氏曰列国之大夫入天子之国曰某士周礼大宰之属有旅下士三十有二人刘炫云知时事四时贡职者小行人云春入贡秋献功王亲受之郑玄云贡谓六服所贡功谓考绩之功今按於此见诸侯於天子有贡无聘不修职贡而言聘东迁诸侯之仇也传殊不察其非说又见後二十八年】以廩丘奔晋【孔氏曰按廩丘地在东郡则是卫之邦域齐竟不至此也羊角高鱼皆在东郡廩丘与之相近齐不得别有廩丘乌余齐之大夫得以廩丘奔晋者盖齐人往前取得卫邑以赐乌余如郑公孙段之得州宋乐大心之有原也】克而取之【不书非晋命以盗略】二十七年公孙免余请杀之【陈氏曰传言杀甯喜不出讨贼之意义同僖十年晋里克】欲弭诸侯之兵以为名【传讥向戌惟欲窃虚名见弭兵非远略】蔡公孙归生至【孔氏曰诸侯大夫七月始集於宋而此会书在夏者事虽在秋行还乃告追以叔孙豹发时书之十年夏会于柤而经书在春注经书春书始行孔氏曰释例班序谱晋合诸侯二十国起僖二十八年尽哀十四年大率皆陈後次蔡蔡後次卫是陈于晋会常在卫上也今孔氏乃降於蔡卫在石恶之下故知免非上卿故也成三年传曰次国之上卿当大国之中中当其下是计卿位为班也知非免後至者以传称与蔡公孙归生同至故也】以藩为军【孔氏曰古人行兵止则筑为垒堑以备不虞此以藩篱为军者方欲弭兵以示不相忌也】楚人衷甲【陈氏曰传见楚终怀不测之心是盟晋幸而免】乃盟【贾逵曰叔孙义也服?云叔孙不为人私其於尊国之义得之】言违命也【一事再见卒名公羊传例刘氏曰蔡沈失位左氏贬之今鲁欲自同人之私失位甚矣大夫出境有可以重社稷者犹曰专之今命出季氏而谓不可违非也】固必有尸盟者【孔氏曰盟实大国为主而此云小国主盟知其主辨具也盟法大国制其言小国尸其事此盟争先歆不争主备叔向以小国主盟为言者叔向以久争不决或将战鬪因盟时小国有所主欲令赵孟下楚假此以劝之耳】晋有信也【周制会以班爵为序歆血则先同姓说见定四年是盟与会序次本异今屈建所争者歆血之先後耳其大夫之会楚固未尝先晋也宋公兼享晋楚之大夫赵孟为客则当时人情可见况宋盟诸侯虽曰两属终未尝以事晋者事楚楚虽驾晋先歆鲁史岂遽以楚先晋韩宣子所谓周礼在鲁正指此类传云书先晋晋有信也考之已不详杜氏云孔子追正之亦非传意也】盟于蒙门之外【陈氏曰传言宋公不书见以国地者其君必与因见桓二年会邓僖十九年盟齐二十年盟邢】削而投之【陈氏曰传言宋之盟识者不与】崔氏堞其宫而守之【孔氏曰谓新筑女墙而守之】乃谥【自杀不书】再失闰矣【孔氏曰历十九年为一章章有七闰从文十一年至襄十三年凡五十七年已成三章当有二十一闰又从襄十四年至今为十四年又当有五闰故应有二十六闰也长历推得二十四闰者释例云寻按今世所谓鲁历者不与春秋相符殆来世好事者为之非真也今俱不知其法术其依春秋经传反覆其终始以求之近得其实矣鲁之司历渐失其闰至此年日食之月始觉其

繆遂頓置兩閏以應天正是故明年經書春無冰傳以為時災若不復頓置兩閏則明年春是今之九月十月十一月無冰非天時之異無緣總書春也劉氏曰歷家之術求閏余易求交朔難今司歷能正交朔反不能置閏非人情也閏有常準率三十二月必一逢之如傳所言再失閏者則司歷廢閏殆七十月彌五年矣亦非人情也明年春無冰杜氏曰頓置兩閏以應天正故正月建子得以無冰為災頓置兩閏詭聽駭俗亦非人情也啖氏曰按經言十二月傳言十一月又言再失閏依經當為三失閏進退不同不可得而考今按傳於此言司歷過也哀十三年又記仲尼曰司歷過也皆指王朝歷官與桓十七年傳曰官失之也意同其曰天子有日官諸侯有日御日官居卿以底日日御不失日以授百官於朝則所謂司歷與官非謂魯人明矣杜氏乃以為魯之司歷哀十三年傳又云季孫雖聞仲尼之言而不正歷皆謂魯自有歷實承劉歆之誤而非傳意也劉氏之說見漢書律歷志其所傳魯歷不與春秋相符杜氏亦以為好事者為之竊謂周室雖衰猶君臨列國崩薨卒葬禍福皆告諸侯必無不頒歷之理借令喪亂之際頒不以時諸侯亦必不敢輒自為歷使諸侯皆自為歷則齊晉大國當先為之如大國皆自為歷而所差往往若此則當時所書盟會卒葬日月魯史當以何國為正使魯史所書日月差錯與周歷不同韓宣子見魯春秋何以輒曰周禮盡在魯矣此必無之事也】二十八年不飢何為【葉氏曰左氏所記梓慎裨竈之徒以星次言吉凶若合符契皆星家假托之辭】宋之盟故也【陳氏曰傳具見楚之屬】時事也【春秋大國事天子惟聘而不朝故韓起聘周稱歸時事于宰旅知言聘之非也小國事大國乃朝而不聘故子產相鄭伯朝晉言會時事無異於事天子矣左氏不能辨因以時事釋邾子來朝過在不見周禮】周楚惡之【周有天下之號也豈可以星次繫言周楚隱三年傳周鄭并称蓋有自来矣】舍不為壇【孔氏曰聘禮賓至于近郊君使卿用束帛勞無設壇之法下云先君適四國未嘗不為壇蓋以朝禮君親行事重故有之也】無昭禍焉可也【傳見諸侯朝楚非得已故子產自損其禮且以為禍】以告而反之【孔氏曰崔氏之亂但是莊公之黨崔氏以之為賊當時辟難并悉出奔崔氏既亡慶封召令還國故言使諸逃亡之人得賊名而出者以已情告而悉反之】公膳日雙雞【孔氏曰禮記玉藻云天子日食少牢朔月太牢諸侯日食特牲朔月少牢其大夫則日食特豚朔月特牲今膳日雙雞者齊國臨時之事不如禮也】又焉用盟【傳見諸侯失政奸庸擅命賢哲失所如伯玉在衛平仲在齊臨事變而獲免皆其德行素孚於人】慶摯為上獻【孔氏曰祭祀之禮主人先獻下文慶舍死公懼而歸則於時公親在矣又此祭慶舍泄事公與慶舍不為上獻而摯為上獻者慶舍使為之不可以禮責也】慶氏之馬善驚【孔氏曰今人謂數驚為好驚好亦善之義也】至於魚里【孔氏曰劉炫以為國人從旁為優引行以至魚里】慶封泛祭【孔氏曰禮法食必先祭祭古之先食以示有所先也公食大夫禮云賓升席坐取韭菹以徧櫛于醢上豆之間祭又言祭鉶羹於上鉶之間祭飲酒於上豆之間是祭食之禮各有其處】奔吳【陳氏曰再奔略不書】亦未書禮也【傳記此類甚多示策書外猶有所考】其鄙六十【孔氏曰下云北郭佐邑六十則此亦是六十邑】於是乎正德以幅之【孔氏曰人皆欲生計重厚而財用利益心既无厭於是乎用正德以為邊幅使有度也】與我其拱璧【孔氏曰拱謂合兩手也此璧兩手拱抱之故為大璧】以其棺尸崔杼於市【傳見莊公不書葬】季蘭尸之敬也【孔氏曰詩言采芣於澗采藻於潦此又別言濟澤之阿者以濟在魯國故穆叔獨舉所見而言也詩言季女而此言季蘭謂季女服蘭草也】叔孫穆子【不書例在成十三年】宋公遂反【陳氏曰傳具載宋鄭朝楚事見宋盟非諸侯之志】二十九年釋不朝正于廟也【釋例曰凡公之行始則書所如還則書公至今復中書公在楚者明國之守

臣亦以公不朝之故告于庙也陈氏曰按成十年公如晋十一年三月公至自晋昭十五年公如晋十六年夏公至自晋皆不朝正经不书公在晋於是公危故书之】既而悔之【孔氏曰檀弓云襄公朝于荆康王卒荆人曰必请袭鲁人曰非礼也荆人强之巫先祓柩荆人悔之记之所言即是此事所异者此言请襚彼言请袭此言祓殡彼言祓柩虽俱说此事先後不同礼死而浴浴即袭袭後始小斂大斂乃殡按往年传公及汉闻康王卒公欲反则康王之卒公未至楚楚人使公襚传在此年言之则此年始今公亲襚不得为袭也卒已踰月不得柩仍在地足知殡是而柩非记虚而传实也然则襚衣所以衣尸既殡而使公襚者杂记记致襚之礼云委衣于殡东是既殡犹致襚也文九年秦人来归僖公成风之隧僖薨十年犹致之况既殡也】齐人葬庄公於北郭【再见不书葬】及舍而後闻取卞【季孙叔使公治恐其不受辞】乃归【传见襄公几出季氏久无君意如乃济恶】且无使季氏葬我【陈氏曰传言人不义季氏】遂使印段如周【陈氏曰传见鲁不往会不书葬例今按此史法也】而夏肆是屏【孔氏曰方言云肆柝余也郑玄云斩而复生曰肆?是夏後灭而复存犹木之柝生小栽也】其谁云之【陈氏曰传言城?之役晋以十国之衆经理母家诸侯益貳】射者三耦【孔氏曰周礼射人云诸侯之射以四耦此三耦者彼是畿内诸侯故四耦此及仪礼大射畿外诸侯故三耦或当臣与君异也】来治?田【不书者史无其本不録其末也?田盖鲁伐?时所取赂田鲁人堕舅甥之义讳不登于策故复归于?亦不书事与汶阳田异又见昭七年】而焉用老臣【传见晋取於诸侯无节故号令不行】使工为之歌周南召南【孔氏曰周南十一篇召南十四篇札此时徧观周乐诗篇三百不可歌尽或每诗歌一篇两篇以示意耳未必尽歌之也】曰美哉【孔氏曰乐人采其诗辞以为乐章述其诗之本音以为乐之定声其声既定其法可传虽多历年世而其音不改季札所云美哉皆美其声也】见舞韶箛者【孔氏曰箛即箫也尚书箫韶九成韶箛即箫韶也】通嗣君也【孔氏曰二十五年遏为巢牛臣所杀余祭嗣立至此始使札通上国吴子未死之前命札出使既遣札聘而後身死札以六月到鲁未及闻丧故每事皆行吉礼也】罪高止也【高止实放而以奔告传既妄释说者并疑其事】将亡矣【传为驪姜之乱张本且起子产为政事】三十年臣生之岁正月【说见僖五年】其季於今三之一也【刘待制曰所谓其季於今三之一者季者末也今今日也谓已得四百四十四全甲子其末一甲子六十日而今日乃癸未才得二十日也故曰三之一】是其日数也【孔氏曰亥字二画为首六画为身下首之二画并之使如其身傍则是生来日数也因亥画似筭位故假之以为言其本作亥字不为此也按字画古之亥字体殊不然盖春秋之时亥有二六之体异於古制刘待制曰如者往也移下亥上二画往于亥字身侧】然则二万六千六百有六旬也【孔氏曰文十一年至此年为七十四年而上云七十三年按文十一年正月甲子朔为夏之正月是其年三月也此年之二月癸未是夏之十二月计为七十三年犹尚未终也假作全年筭之置七十三年以全日三百六十五日乘之已得二万六千六百四十五日也每年有四分日之一是四年而成一日以四除七十三年又得十八日并全日为二万六千六百六十三日四分日之一今除去三日四分日之一整取六旬合当十二月二十七日今杜长历云二十三日癸未是少四日所以不与常历同者盖杜约準春秋日月以为长历与常历不同故置闰远近不定盖七十三年之内於常历校四个大月而剩用四日故癸未为二十三日若依常历是二十七日也】则其属也【孔氏曰诸是守邑之长公邑称大夫私邑则称宰此言问其县大夫问绛县之大夫也绛非赵武私邑而云则其属者盖诸是公邑国卿分掌之而此邑属赵武也】使为君复陶【孔氏曰复陶见昭十二年传此言君复陶知是主君衣服之

官也】以为绛县师【孔氏曰既使为主衣服之官又以为绛邑之县师也如周礼则县师是王朝之官而此言绛县师者绛是晋国所都之邑盖以居在绛邑故系绛以言之】罪在王也【天王以讨乱告陈氏曰传释五大夫实杀佞夫而书王且明天子诸侯目君同例】鸟鸣于亳社【孔氏曰殷都於亳武王伐纣而颁其社於诸侯以为亡国之戒此鸟鸣于鲁国之亳社也哀四年亳社灾】待姆也【此宋人设辞以掩其不能揅君母之罪故左氏与二传同而皆不察其妄伯姬归宋至是四十一年盖六十余岁使有姆存又且加老非唯不可待实亦不必待也】降娄中而旦【孔氏曰月令旦危中者据夜有长短及星度有广狭是细计之数杜据大略而言故与月令不同】尤之也【陈氏曰传明经特书故】讳之也【陈氏曰传释鲁不书他国之大夫书人讥不在鲁今按经无讳义陈说非传所及】三十一年鲁其惧哉【传见晋衰而鲁惧以齐楚不足与故也】是以有平丘之会【陈氏曰传言晋衰之故咎在执政】毁也【陈氏曰传言毁与遇害同辞须数句乃用一字括之此是作书之体】乃筑诸侯之馆【传记子产之言见晋方盛时待诸侯有礼其衰也反是】去疾奔齐【去疾不书奔说在文十四年】言罪之在也【失与文十六年宣四年传例同刘氏曰如是则父有罪子得而弑之也乱天地之性莫甚焉此固左氏不受经之蔽】其果立乎【孔氏曰释例土地名延州来阙则杜谓延州来三字共为一邑服?云延陵也州来邑名季子让王位升延陵为大夫食邑州来传家通言之按传文谓之延陵季子则是延陵与州来必不得为一但不知何以呼为延陵耳或延陵亦是邑名盖并食二邑故连言之】谋於邑则否【叶氏曰此盖因论语所谓为命裨谌草创者不达草创之义凿为谋野之说犹误承孔父正色立朝之言而谓华督见孔父之妻于路承秦伯以千乘之富不能容其弟之言而谓秦鍼出奔车千乘传承旧闻而妄实以事者每如是】吾不信也【孔氏曰公羊传於二十一年下云十有一月庚子孔子生谷梁传於二十一年十月下云庚子孔子生贾逵服?皆定为襄二十一年生也孔子世家云鲁襄公二十二年而孔子生年七十三鲁哀公十六年夏四月己丑卒杜此注从史记也今按司马迁特为孔子作世家至书孔子生年乃不用二传必他有所据故杜氏从之】令尹似君矣【孔氏曰服?云言令尹动作以君仪故云以君矣明年传曰二执戈者前矣是用君仪也俗本作似君若云似君不须言以今定本亦作似君恐非】

卷八

钦定四库全书

春秋左氏传补注卷八 元 赵汭 撰昭公上

元年告於庄共之庙而来【孔氏曰文王世子曰五庙之孙祖庙未毁虽为庶人取妻必告郑玄云告於君也亦既告君必须告庙君尊不主臣昏故围自告也】其敢爱丰氏之祧【孔氏曰祭法云远祖庙为祧公孙段是穆公之孙子丰之子其家惟有子丰之庙杜言远祖庙者顺传文言之】读旧书加于牲上而已【今按於此可见宋之盟晋楚所争者歃血之先後而已此不歃血故史不书盟】季武子伐莒取郚【不书季孙伐莒者莒人告於会叔孙豹几被戮晋赵孟固请於楚而後免故为内讳之义与僖十六年灭项不言师同杜说非】吾又谁怨【孔氏曰历检上世以来季孙出使不少於叔孙而云叔出季处从来久者季孙世为上卿法当上卿守国次卿出使耳必须使上卿者上卿非不使也】周有徐奄【孔氏曰徐奄二国皆嬴姓世本文也服?云鲁公所伐徐戎也按费誓云淮夷徐戎并兴】具五献之笾豆於幕下【孔氏曰聘礼卿聘饗饔五牢故卿皆五献至春秋之时大国之卿乃得从卿礼若次国之卿依大国大夫之制唯三献故杜此注云大国之卿五献又昭六年传注云大夫三献是也】礼终乃宴【孔氏曰谓享礼既终即因而为宴不待异日也杜解享宴礼异所以得相因者以其殽俎同故也宣十六年传云王享有体荐宴有折俎公当享卿当宴王室之礼也其实诸侯之待公卿礼亦当然以卿会公侯享宴皆折俎不体荐享宴俎同故得因行礼也】子皮赋野有死麕之卒章【彪以喻楚时诸侯恶公子围故欲赵孟安徐驯弭之观答赋之语可见杜说非矣】禹之力也【孔氏曰冠者首服之总名弁冕冠中之小别端委是身服言弁冕端委总举冠衣而言非谓定公赵孟身所自衣也周礼司服於士服下云其齐服有玄端素端郑玄云谓之端者取其正也衣袂皆二尺二寸而属幅是广褻等也其祛尺二寸大夫以上侈之服?云礼衣端正无杀故曰端文德之衣尚褻长故曰委论语乡党非帷裳必杀之郑康成云帷裳谓朝祭之服其制正幅如帷非帷裳者谓深衣削其幅缝齐倍要礼记深衣之制短不见肤长不被土然则朝祭之服当曳地服言是也】郑放游楚於吴【不书非卿他仿此】而蔡蔡叔【孔氏曰说文云 散之也从米杀声然则 为放散之义故训为放也隶书改作已失本体写者全类蔡字至有重为一蔡字重点以读之者】罪秦伯也【陈氏曰义同陈黄申释之者以襄二十年传未尽君臣之义】此之谓多矣【刘氏曰出奔者势不得以千乘行又一日之享取币八反非朝夕可望皆不近事实盖旧说秦伯以千乘之富不能容其母弟传者不知则谓鍼以千乘出奔记者不辨又增取币八反】以什共车必克【孔氏曰周礼十人为什以一什之人共一车之地故必克也】偏为前拒【孔氏曰五陈者即两伍专参偏是也相离者布陈使相远也服?引司马法云五十乘为两百二十乘为伍八十一乘为专二十九乘为参二十五乘为偏彼皆準车数多少以为别名此传去车用卒而有此名则此名不以车数为别也杜云皆临时处置之名其意不同服说则名与人数不可得知也周礼则五人为伍二十五人为两无专参偏之名也】展舆奔吴【陈氏曰传见展舆踰年不称子义同陈佗齐无知】后帝不臧【孔氏曰襄九年传称阍伯为陶唐氏之火正知后帝是尧也】故辰为商星【孔氏曰商谓宋也宋商後故称商人】以服事夏商【孔氏曰二十九年传云陶唐既衰其後有刘累累虽迁鲁

子孙仍在大夏故历夏及商也刘炫云非累子孙则其同族等类耳】故参为晋星【孔氏曰晋世家云唐叔子燮是为晋侯杜谱亦云燮父改为晋侯则叔虞之身不称晋也】宣汾洮【释例曰汾水出太原故汾阳县至河东汾陰县入河其洮水阙不知所在当亦是晋地之水後世竭涸耳】封诸汾川【孔氏曰颛顼为帝承金天之後台骀是金天裔孙为臣宜当颛顼故以帝用嘉之为颛顼嘉耳】不容弹矣【刘炫氏曰五降而息罢退者五声一周声下而息前声罢退以待後声非作乐息也孔氏曰罢退之後其曲已了不容更复弹作】弗听也【刘炫氏曰此说降後不弹之意也】縊而弑之【孔氏曰若以为十二月己酉则六日己酉子干奔晋至晋犹见赵孟七日庚戌赵孟卒便是日相切迫无相见之理故知十一月为是己酉为误】甲辰朔烝于温【刘炫氏曰晋烝及适南阳并在十二月之前文系十二月者欲见烝後即行十二月之文为下甲辰朔起本举月遥属下明晋烝犹在朔前十二月非误也】庚戌卒【陈氏曰传终言赵孟之偷志不在伯故宋虢之盟楚驾於晋】二年且告为政而来见礼也【叔孙豹尝以晋君失政欲树於韩子使为鲁备季孙不从今韩起为政当聘鲁不使他人而身来亦欲亲结鲁好或疑传妄过矣】与周之所以王也【传见鲁之策书乃周公遗制所谓鲁春秋乃国史成书二传不知此说故不得笔削本末】执诸中都【陈氏曰传言所以不书执】加木焉【传见子皙三罪子产不能以时讨故经无异文】三年大夫送葬【子大叔所言文襄朝聘之制考之春秋惟鲁事齐桓为合晋文以後经传事迹皆不同盖伯业有盛衰疏数随时有过有不及终不可为定制也卿共葬事则襄公而後鲁以卿会葬者三君传於昭三十年又记大叔之言亦见不能常也】而数於守适【孔氏曰言夫人守内官之适长故以守适言夫人也文襄之制夫人丧士吊大夫送葬今游吉卿也而云同於守适则於时适夫人丧已令卿送葬矣】及遗姑姊妹【孔氏曰遗姑姊妹谓非夫人所生者也】未有伉俪【孔氏曰少姜本非正夫人而云未有伉俪者盖晋侯当时无正夫人其继室者使韩起上卿逆之郑罕虎如晋贺之则後娶者为夫人也】已在齐矣【孔氏曰相训为助今定本相作祖】谗鼎之铭【服?氏曰谗鼎疾谗之鼎明堂所云崇鼎是也一云谗地名禹铸九鼎於甘谗之地故曰谗鼎】唯羊舌氏在而已【孔氏曰世族谱云羊舌氏晋之公族也羊舌其所食邑名唯言晋之公族不知出何公也杜云同祖为宗谓同出一公有十一族也】子丰有劳於晋国【孔氏曰子丰有劳事无所见】伯石再拜稽首受策以出【传见晋侯策命外大夫赐之以田僭天子之礼】葬滕成公【刘炫氏曰叔弓以四月发鲁滕以五月葬君叔弓书始行之月滕书实葬之月故书经异文也传述遇讎之事并就葬月言耳陈氏曰传言滕所以始书葬】敬子不入【孔氏曰檀弓记此事云惠伯曰政也不可以叔父之私不将公事知懿伯是椒叔父也懿伯为人所杀及滕郊逢其讎叔弓不入者礼椒也为椒有辟仇之耻礼之欲使杀之】敬子从之【孔氏曰檀弓云子夏请问居昆弟之仇如之何曰仕不与共国衞君命而使虽遇之不鬪叔父之与昆弟亲疎同尔辟仇非耻故椒请先入也】吉庶几焉【陈氏曰传备载诸国吊贺事以见晋失诸侯之故】罪之也【传见杀大夫有名有不名既以称名为有罪国君出奔有名有不名亦以称名为罪之然卫侯郑叛中国从夷狄其罪大矣而出奔不名燕大夫比以杀公之外嬖不出且见弑乃於其出奔而罪之失其类矣】四年四岳【孔氏曰中岳嵩高即大室是也下别言之故此言四岳】三涂【孔氏曰释例土地名云三涂河南陆浑县南山名或曰三涂伊阙大谷轘辕三道也传曰晋将伐陆浑而先有事於洛与三涂先祭山川也谓三道皆非也】何辱命焉【传见晋人中实畏难而文以不争故以诸侯授楚】莫匡其君【传见晋君懦臣贪无能为者故楚敢求其所从之诸侯】西陆朝觐而出之【孔氏曰觐见也西道之

宿有星朝见者於是而出之】卫侯辞以疾【传见东诸侯初无从楚之志】宋华费遂郑大夫从【陈氏曰传言从见华费遂送大司马所以不书】使屈申围朱方【陈氏曰为明年杀屈申起本】王从之【不言以归说见襄十年】故曰取【陈氏曰传释取例按僖六年晋袭虞遂灭之执虞公传曰书曰晋人执虞公罪虞且言易也则言易不但施於取传凡四发取例皆以不书伐故曰易见襄十三年例非是】作丘赋【孔氏曰哀十一年传注云丘赋之法因其田财通出马一匹牛三头今欲别其田及家财各为一赋故言田赋然则此与彼同赋歛家资使出牛马又别赋其田使之出粟若今输租更出马一疋牛三头是一丘出两丘之税按周礼有夫征家征夫征谓出税家征谓出车徒给徭役此牛马之属则周礼之家征也其夫征十一而税是与家征别今按传记晋作州兵郑作丘赋见加赋毒民不惟鲁】尔未际【孔氏曰大夫将立适子必须接见同寮季武子立纇饮大夫酒是其事也孟丙未与大夫交际故为之作钟因落钟令与相见】见仲而何【孔氏曰大夫立子为适必自见之於君宣十四年申舟见犀而行定六年乐祁见溷而行是其事也】孟孙为司空以书勲【孔氏曰所以司徒书名者周礼大司徒掌十二教十有一曰以贤制爵十有二曰以庸制禄故司徒书名定位号也司马与工正书服者周礼夏官司马其属有司士掌羣臣之政亦以德诏爵以功诏禄工正虽不属司马掌作车服故与司马书服也按周礼司勲属夏官今司空书勲者春秋之时又是诸侯之法不可尽与礼同传见鲁三卿官犹旧制如晋宋皆改易周官矣】五年卑公室也【孔氏曰鲁之军名传无其号晋作三军为上中下则鲁之三军亦当然也分中军之衆属上下二军其上下二军依旧不动故云舍中军也其废中军之後上下二军分为四哀十一年齐师伐鲁传称孟孺子泄帅右师冉求帅左师冉求季氏宰也又言叔孙退而蒐乘更无别称知自以叔孙为军名也】季氏择二【孔氏曰季孙因叔孙家祸退之使同於孟孙独取其半为专已甚又择取善者是专之极故传言择二以见之】而贡于公【孔氏曰初作三军季氏尽征之并不入公室也叔孙氏臣其子弟以一家之内有父兄子弟四品以父兄之税入公子弟之税入已大率半入公半入已孟氏则於子弟中取其半或取子或取弟大率三分归公一分入已十二分其国民三家得七公得五国民不尽属公今舍中军四分公室三家自取其税减已税以贡於公国民不复属於公公室弥益卑矣】不可能也【此非孔子之言也借令昭子未知豎牛饿杀其父但以杀适立庶为大罪孔子亦岂可但据其所言而善之传举细遗大又托之於圣人类如此】晋侯送女于邢丘【陈氏曰传言晋卑事楚今按传记齐请继室于晋晋亦归女于楚其後齐又女于吴齐晋皆伯国也於是皆衰至荐女以相结夷狄所以独强】君子谓叔侯於是乎知礼【陈氏曰传言周衰文胜无益於治】越大夫常寿过帅师会楚子于琐【陈氏曰越常寿过始见书人今按夷狄举号君臣同辞其臣从中国序列则称人以便文陈氏得书人非】吴人败诸鹊岸【陈氏曰楚一不书败】六年大夫如秦葬景公【陈氏曰传言秦所以始书葬因见卿会葬非礼】惧民之有争心也【孔氏曰尚书吕刑五刑之属三千周礼司刑掌五刑之法以丽万民之罪皆是豫制刑矣而云临事制刑不豫设法者圣王虽制刑法举其大纲但共犯一法情有浅深或轻而难原或重而可恕虽依準旧条而断有出入不豫设定法告示下民令不测浅深常畏而惧罪也今郑铸之於鼎以章示下民法既豫定民皆先知於是倚公法以展私情附轻刑而犯大恶是无所忌而起争端也】而徼幸成之【孔氏曰法之设文有限民之犯罪无穷为法立文不能网罗诸罪民之所犯不必正与法同自然有危疑之理因此危文以生争心将有实罪而获免者也】铸刑书【孔氏曰为其文是制参辟勒於鼎是铸刑书】吾以救世也【孔氏曰当时郑国大夫邑长盖有断狱不平轻重失中故作

此书以令之所以救当世也】得赐不过三献【孔氏曰大行人云上公九献侯伯七献子男五献献各如其命数典命云公侯伯之卿皆三命知其当三献也大夫卿之总名】皆知其将为王也【陈氏曰为十三年去疾得国起传】乃逆之【传见楚卑晋晋畏楚】子荡归罪於蕩泄而杀之【陈氏曰楚再不书败】且吊败也【鲁使卿吊败则杜氏不告非事实矣】逆诸河礼也【孔氏曰世族谱以王正为杂人诸本及王肃董遇注皆作王正俗本或误为士句此人不当与士鞅之父同姓】晋侯许之【传见晋衰诸侯复散】七年齐求之也【诸家从谷梁传作鲁暨齐平刘氏析左氏齐求鲁平为一节癸巳以下为齐燕行成之事以合其说盖不察後文有齐燕平之语】盟于濡上【孔氏曰今按高阳无此水也水源皆出於山其出平地皆是山中平地燕赵之界无泉出者未知杜言何所按据】不克而还【陈氏曰传释经书平罪齐无讨燕之实且为十二年纳欵起本】为王旌以田【孔氏曰凡九旗之帛皆用绦干首有羽羽为旌名遂以旌为旗称礼纬稽命徵云礼天子旗九刃曳地诸侯七刃齐轸杜以楚虽僭号称王未必即如天子故以诸侯解之言王旌游至於轸】遂赦之【陈氏曰传载椒举蕩后疆芋尹无宇之辞见楚所以能强】愿与诸侯落之【孔氏曰杂记云路寝成则考之而不衅考之者设盛食以落之杜言祭之为落者当祭中溜之神以安之】公如楚【陈氏曰传言鲁从楚之不得已也】则自取谪于日月之灾【以分野论日食受灾之国亦谬】晋人为取成【不书说见襄二十九年昭定哀春秋非公命而书者多矣杜说非陈氏曰传言季氏专不待公命】余又将杀段也【刘炫氏曰段即丰氏当言驷氏党字之误】吾为之归也【何休膏肓曰孔子不语怪力乱神以鬼神为政必惑衆故不言也今左氏以此令後世废仁义而祈福於鬼神此大乱之道也郑玄答之曰伯有恶人也其死为厉鬼厉者陰阳之气相乘不和之名尚书五行传六厉是也人死体魄则降志气在上有尚德者附和气而兴利孟夏之月令雩祀百辟卿士有益于民者由此也为厉者因害气而施灾故谓之厉鬼月令民多厉疾五行传有御六厉之礼礼天子立七祀有大厉诸侯立五祀有国厉欲以安鬼神弭其害也】余敢忘高圉亚圉【陈氏曰传言周衰诸侯多不待命而自立】曰孔丘【孔氏曰当言三十四而云五盖相传误耳】而灭於宋【孔氏曰家语本姓篇云宋湜公熙生弗父何何生宋父周周生世子胜胜生正考父考父生孔父嘉其後以孔为氏也孔父生木金父金父生皐夷父夷父生防叔防叔避华氏之偪而奔鲁生伯夏伯夏生梁纆梁纆即生孔子也】杀献公而立成公【陈氏曰传见两下相杀虽王卿士不书】岁时日月星辰是谓也【孔氏曰周礼冯相氏掌十有二岁十有二月十有二辰十日二十有八星之位谓此六物也】八年罪在招也【陈氏曰嫌同卫鱄陈黄故别释之】将天下实贺【陈氏曰传见子产讥铜鞮师旷讽麇祁叔向亦云以见晋之不竞】归罪於公子过而杀之【归罪於过者招也以讨乱告故称人与晋先都士穀同】杀马毁玉以葬【陈氏曰於葬陈哀公见有鲁不书会葬者於葬楚康王见有鲁会不书葬者今按葬陈哀公以楚告而书不书楚葬避其僭号二者皆鲁史变例】使穿封戌为陈公【陈氏曰传言楚实利陈以讨招为名】侍饮酒於王【传见楚子称师讥不在弃疾】臣必致死礼以息楚国【孔氏曰致死礼者欲为郟敖致死杀灵王也穿封戌既臣事灵王而为此悖言者以明在君为君之义此对是諂非悖也】九年楚公子弃疾迁许于夷【不书楚说在成十五年】实城父【孔氏曰杜以地名经传不同而传言实者则以为名有改易也传不言实者则以为二名并存也所言实者皆举旧以实新此地旧名城父此时新改为夷昭十八许迁于白羽传云许迁于析实白羽定十年公会齐侯于夹谷传云会于祝其实夹谷十三年齐侯卫侯次于垂葭传云次于垂葭实即氏此四者或经书未改或经书已改传皆上句举

其已改之名下句实其未改之号】吾西土也【孔氏曰释例土地云魏河东河北县也芮冯翊临晋县芮乡是也毕在京兆长安县西北骀在武功岐在美阳今按其地芮在魏之西南百余里耳岐在骀之西北无百里也诗称后稷封郃计魏在郃东六百余里公刘居豳又在岐西北四百余里此传极言远境而辞不及豳其实自岐以西犹是周竟但不复重言之耳】吾东土也【服?氏曰蒲姑商奄滨东海者也蒲姑齐也商奄鲁也二十年传曰蒲姑氏因之定四年传曰因商奄之民命以伯禽】吾北土也【孔氏曰土地名云巴巴郡江州县也楚南郡江陵县也建宁郡南有濮夷地然则巴楚邓中夏之国唯濮为远夷耳地名又云燕国蓟县也亳是小国阙不知所在盖与燕相近亦是中國也唯肃慎为远夷鲁语云武王克商肃慎氏贡楛矢晋之玄菟即在辽东东北】晋人礼而归之【陈氏曰传言周衰甚因见晋之无政】故曰五十二年【孔氏曰历家以周天十二次次别为百四十四分岁星每年行一百四十五分是岁星行一次外剩行一分积一百四十四年乃剩行一次故昭十五年得超一辰今杜氏既无此义而三十二年岁星得在丑者岁星之行天之常数超辰之义不言自显】十年陈氏始大【陈氏曰传言栾高之亡陈氏所以兴】始用人於亳社【不书史讳国恶】葬平公也【传记郑伯往吊又因叔孙如晋并记十一国会葬大夫见晋虽失政诸侯犹畏其强盖取诸史氏别志陈氏见传文序列如释经然误以为有笔削非也外会葬法不得书】其是之谓乎【陈氏曰终上文高强事】十一年僖子使助蕞氏之籓【孔氏曰礼有副车倅车皆谓副贰之车也籓亦副倅之意】将焉用之【陈氏曰传见晋大夫自忧其不竟】晋人使狐父请蔡于楚弗许【传见晋人能合诸侯而畏楚憚战故不能救蔡叶氏谓谋救蔡不果无贬辞疑传妄胡氏乃谓心欲救蔡而力弗加则无恶有愧於荀吴矣盖不知昭公而後大夫有事悉从其恒称】会有表【孔氏曰着定谓伫立定处会有表亦是位之定处但着下言定则表亦是定故直言会有表耳俗本谓表下有旗谬也野会设表为位亦当有物记处如今之位版也礼诸侯建旗设旗为表也覲礼诸侯覲于天子入墀门或左或右各就其旗而立是天子於野会诸侯设表以为位也盟主之会诸侯亦必以旗表位大夫聚会亦应有以表位但无文以见耳】无守气矣【孔氏曰言无守身之气将必死】祖不归也【不为祖考所归义何取於归姓与外传言宣王不藉千亩战于千亩王师败绩之类相似当时自有一等迂缪之论左氏择之不精耳】楚子灭蔡【陈氏曰传言楚子书师】于冈山【孔氏曰此时楚以畜牲用之无人为之作谥必是蔡侯庐归国乃追谥其父为隐耳释例土地名冈山阙不知其处经言以归用之必是楚地山也】十二年因其衆也【陈氏曰传见北燕伯欵不名】公子慙遂如晋【不书本从公行事见後例在成十三年襄二十八年杜氏陈氏俱未考】葬郑简公【杜氏以此证其卒哭除丧之说非传意後见昭十五年】遂入昔阳【孔氏曰刘炫谓肥鼓并在钜鹿昔阳即是鼓都在鲜虞东南也二十二年传云晋荀吴使师伪余者负甲以息於昔阳之门外遂袭鼓灭之则昔阳之为鼓都断可知矣今杜以昔阳为肥国都是者以传云遂入昔阳即云壬午灭肥是因入而灭之故云昔阳肥国都也昔阳既在乐平沾县而杜又云钜鹿下曲阳县西南有肥累城相去远者杜君土地例称有者皆疑辞故云乐平沾县东有昔阳是疑而不定但肥都昔阳与鼓相近晋既灭得肥国故二十二年息昔阳之门外遂袭鼓而取之昔阳非鼓都也】以肥子緡皋归【不书并後伐鲜虞肥鼓皆白狄微种鲜虞之属故十五年灭鼓亦不书】杀甘悼公【陈氏曰不书义同七年单献公传載甘单之祸皆所以起周乱】以再命为卿【孔氏曰悼子之卒不书於经则是未为卿也其卒当在武子之前平子以孙继祖武子卒後即平子立也传言悼子卒者欲见昭子为卿远在平子之先】更受三命【孔氏曰十年平子伐莒名书

於经即平子於时已为卿矣释例曰鲁之叔孙父兄再命而书於经晋司空亚旅一命而经不书推此知诸侯之卿大夫再命以上皆书於经自一命而下大夫及士经皆称人名氏不得见也是杜检传文知再命书名平子伐莒书名知其已再命矣平子伐莒克之昭子不伐莒也昭子无功而更受三命知平子以功加三命昭子以例加为三命也】以费叛如齐【陈氏曰凡家臣叛但书围不书叛後仿此传中载豎牛南蒯之事见叔季皆有家祸鲁无强君二氏遂专】遂奔齐【孔氏曰凡言出奔皆自内而出文七年晋先蔑奔秦先在秦地因即奔秦故不言出也归父还自晋至笙遂奔齐笙在鲁之竟外故不言出也此言及郊已入鲁竟传言及郊解经所以书出】曰吾不为怨府【陈氏曰传言鲁三家本不同心】围徐以惧吴【陈氏曰不书围】专足畏也【刘炫氏曰楚语云灵王城陈蔡不羹问於范无宇曰今吾城三国赋皆千乘亦当晋矣诸侯其来乎对曰是三城者岂不使诸侯之惕焉彼再言三城无四国也盖占四字积画四当为三】而无醉饱之心【孔氏曰言若用民力当随其所能而制其形模依此形模用民之力而无有醉饱盈溢之心也醉饱者饮食餍足之名以王之游行必劳损民力不知餍足故令依法用之】十三年越大夫戮焉【王肃氏曰越大夫常寿过也申之会经书淮夷而不书越者以常寿过有罪不得列会故不书越也戮者陈其罪恶以徇诸军言将杀之终亦不杀过至今在楚故怨而作乱】城而居之【孔氏曰固城城之坚固者息舟即是其一以围时有所毁故更城而居之】及公子罢敌【陈氏曰杀太子不书义同襄二十六年卫角】公子比为王【陈氏曰传言弃疾实召之而蔽罪於比】王缙于芋尹申亥氏【孔氏曰传既以五月统癸亥之日而乙卯丙辰亦是五月之日虽则言有颠倒即令蒙此五月之文也刘炫氏曰杜此注经书四月误按上经注云灵王实以五月死楚人生失灵王本其始祸以赴两注不同今按四月者比归国之月也春秋之法凡大夫公子反国皆不月而弑君无不月者比归而王弑故经没死之月蒙上文比归为一事见比以篡逆归而特存其归国之月以异之杜氏不知笔削之旨故经传异说】实訾敖【孔氏曰郟敖与此訾敖皆不成君无号谥也元年传云葬王于郟谓之郟敖此云葬子干于訾实訾敖并以地名冠敖未知其故又世家楚之先君有若敖宵敖皆在位多年亦称为敖不知敖是何义】获其五帅【陈氏曰吴楚相败皆不书至定四年始书之】子产以幄幕九张行【孔氏曰周礼幕人掌帷幕幄帘绶之事郑玄云王出宫则有是事在旁曰帷在上曰幕皆以布为之四合象宫室曰幄帘王在幕若幄中坐上承尘幄帘皆以纒为之凡四物者以绶连系焉然则幕大幄小幄在幕下张之幄幕九张盖九幄九幕也】淫刍蕘者【孔氏曰刍者饲牛马之草也蕘者共燃火之草也说文云蕘薪也】使诸侯岁聘以志业【孔氏曰岁岁使於天子所以献其贡赋令诸国各自记其职贡之业】间朝以讲礼【孔氏曰间朝者据聘为言也既云岁聘因从聘岁为始更间一年乃朝故知间朝是三年而一朝也】以显昭明【叔向言朝聘之节大数与周礼不合盖东迁典籍散失士大夫亦无所折衷】而使之从公侯之贡【王肃氏曰郑伯爵而连男言之犹言公侯足句辞也孔氏曰僖二十九年例云在礼卿不会公侯会伯子男可也是伯国下同子男也】十四年尊晋罪已也【大夫不书至降於君也必执然後书至重正卿也传例非陈氏亦曲为之义】司徒老祁虐癸【孔氏曰世族谱司徒老祁为一人虐癸为一人服?云司徒姓也老祈字也虐癸亦姓字也杜以下句请於南蒯曰臣愿受盟知是南蒯家臣】蒲余侯兹夫杀莒公子意恢【陈氏曰传见兹夫实杀意恢而书国郊公不书奔说在二十三年】争鄱田【巫臣奔晋晋与之邢雍子奔晋晋与之鄱事在襄二十六年传孔晁云邢与鄱争疆界】与叔鱼於市【孔氏曰晋语说此事云叔向既对宣子邢侯闻之而逃遂施邢侯氏孔晁云废其族也则国语读为弛

训之为废家语说此事亦为弛王肃云弛宜为施施行也服?云施罪於邢侯施犹劾也邢侯亡故劾之】可谓直矣【传本以直为义杜说失传意】犹义也夫【数其贿称其诈皆为国事言之杜疑伤义非也传文语助也夫二字甚多未必皆是疑辞其治国制刑以下亦未必皆夫子语】十五年戒百官【孔氏曰周礼大宰祀五帝前期十日帅执事而十日遂戒享先王亦如之郑玄云十日容散斋七日致斋三日也既卜又戒百官以始斋此戒百官亦谓戒之令斋】去乐卒事礼也【孔氏曰祭必有乐乐有文舞武舞文执羽龠武执干戚其入庙也必先文而後武叔弓之卒当龠始入之时故经举龠入及其去之则诸乐皆去故经云去乐钟鼓管磬悉皆去之非独去龠舞也】王太子寿卒【陈氏曰传见王太子卒不书】王穆后崩【陈氏曰传见王穆后崩不书且为昭二十六年王子朝告诸侯起赵伯循曰王后世子卒葬不书王室不告诸侯不赴也】民知义所【孔氏曰十七年荀吴诈祭于雒以灭陆渾二十二年负甲伪余以入昔阳而此时独降而不纳者此时荀吴自度已力必其能获故因以示义】以鼓子鞮归【不书说见十二年陈氏曰十二年狄晋自後皆书卿帅师今按自晋悼公卒大夫将皆从其恒称若其年晋荀偃卫甯殖十七年卫石买齐高厚十八年卫孙林父晋士匄二十四年齐崔杼二十五年郑公孙夏之类无称人者】晋荀跖如周葬穆后【陈氏曰传见王后葬不书今按鲁无使卿大夫吊葬王后之事传见他国有之】樽以鲁壶【孔氏曰周礼司尊彝云秋尝冬烝其馈献用两壶樽郑玄云壶者以壶为樽燕礼云司官尊于东楹之西两方壶左玄酒是礼法有以壶为樽】故曰籍氏【孔氏曰九世之祖称高祖者言是高远之祖也郯子以少皞为高祖意与此同其九世之次见世本】而有三年之丧二焉【孔氏曰丧服斩衰三年章内有为父为长子齐衰杖舥章内有夫为妻服问曰君所主夫人妻太子适妇郑玄云记言君者主谓诸侯而天子亦与妻为丧主也然则妻服齐衰杖舥耳而传以后崩太子卒为三年之丧二者丧服杖期章内有父在为母传曰何以杖舥也至尊在不敢申其私亲也父必三年然後娶达子之志也父以其子有三年之戚为之三年不娶则夫之於妻有三年之义故可通谓之三年之丧】将焉用之【传见叔向讥不遂服三年杜说非又按预晋朝议太子之服谓周公不言高宗服心丧三年而云谅闇此服心丧之文也叔向不讥景王除丧而议其宴乐已早既葬应除而违谅闇之节也先儒谓其巧饰经传以附人情此言除丧当在卒哭文又少异】十六年讳之也【陈氏曰传见他年正月公在晋皆不书今按内见止执史皆不书公在晋有笔削说见襄二十九年传初不及此】齐侯伐徐【孔氏曰虚举经文者为下徐人行成起本】使然丹诱戎蛮子嘉杀之【陈氏曰传见戎蛮子嘉不名】赂以甲父之鼎【陈氏曰晋自平丘之盟不能合诸侯而诸侯始有自为盟会者不书义见二十六年】无伯也夫【陈氏曰传言昭公以来伯者不作而齐人横纳北燕伯伐徐莒今为此会至剽陵而专盟矣】又御之适县间【孔氏曰诸侯享宾之礼亡唯有公食大夫之礼存耳其礼云大夫纳宾宾入门左郑玄云左西方宾位也又云及庙门公揖入宾入三揖至于阶三让公升二等宾升大夫立于东夹南西面北上士立于门东北面西上孔张後至盖宾入门乃始来至当从大夫适东夹之南西面位也张乃立於客间宾入未升阶立于西方孔张入客行间也张初立客间在西方被御适客後又益西也又被御适县间盖又复益西入於钟磬乐肆之间也】十七年伐鼓於社【孔氏曰周礼大仆云凡军旅田役赞王鼓救日月食亦如之郑玄云王通鼓佐击其余面则日食王有亲鼓之时也】不君君矣【叶氏曰昭子言天子诸侯之礼是矣而言用於正月则太史与平子皆失之夏书辰弗集千房以事秋言之则先王之礼不独在正月凡食皆举之矣经书日食三十六言鼓用牲于社者三其二皆在六月其一在九月左氏惑於太史之言故庄二

十五年误援之】而火名【孔氏曰帝系世本皆为炎帝即神农氏炎帝身号神农代号也】而水名【孔氏曰共工氏霸有九州祭法文也】而龙名【孔氏曰月令云其帝大皞易下系云包牺氏之王天下也即大皞身号伏牺氏号也】陆浑子奔楚【奔不书外恒略也陈氏讥不在奔非灭而奔不得有二义】水火所以合也【孔氏曰丙是火日午是火位壬是水日子是水位故丙午为火壬子为水】卜战不吉【孔氏曰世本穆王生王子扬扬生尹尹生令尹勺】获其乘舟余皇【陈氏曰传见楚令尹阳勺书人吴公子光但书国义见十三年】

春秋左氏传补注卷八

卷九

钦定四库全书

春秋左氏传补注卷九 元 赵汭 撰昭公下

十八年而代之【孔氏曰毛氏世有采地为畿内之国於时天子微弱故自杀自伐不能禁之】侈故之以【孔氏曰郑语云祝融其後八姓昆吾为夏伯世本云昆吾者卫是也然则昆吾国名言昆吾夏伯者以表昆吾国君其上世尝为夏伯其恶熟诛者非此为伯之身当是後世之孙耳诗云韦顾既伐昆吾夏桀共桀同文又传云乙卯亡知以乙卯日与桀同诛】登大庭氏之库以望之【孔氏曰大庭氏古天子之国名也先儒旧说皆云炎帝号神农氏一曰大庭氏服?云在黄帝前郑玄诗谱云大庭在轩辕之前亦以大庭为炎帝也】至于大宫【孔氏曰子寬游吉之子世族谱子寬与游速浑罕为一人驷带字子上六年死矣此别有子上非驷带也楚语说事神之礼云使名姓之後能知牺牲之物彝器之量屏摄之位坛场之所而心率旧典者为之宗知屏摄是祭祀之位也郑衆云摄束茅以为屏蔽其事或当然】告于先君【孔氏曰每庙木主皆以石函盛之当祭则出之事毕则纳於函藏於庙之北壁之内所以辟火灾也卫次仲云右主八寸左主七寸广厚三寸穿中央达四方也范甯云天子主长尺二寸诸侯长一尺也白虎通云纳之西壁】邠人藉稻【孔氏曰周之六月夏之四月种稻之时其君自出观行之藉犹藉蹈践履之义服?云藉耕种於藉田也今按国语宣王不藉千亩下云及藉膳夫农正陈藉礼王耕一墦则藉者耕种藉田之名记云天子田藉千亩诸侯百亩则诸侯比天子特多寡不同而已其礼则一粢盛六谷皆备此但言藉稻者如周礼掌稼下地者但名稻人举一以包其余也旧说误以藉为藉蹈又转为履行学者疑之遂引此为周不改月之证不以服说考之故也】原氏其亡乎【陈氏曰再为王室乱起本】大为社【孔氏曰祭祀有常而云大为社者此非常祭之月而为火特祭礼物备具大於常祭故称大也】曰毁於北方【刘氏曰近上十二年郑简公卒将为葬除及游氏之庙将毁焉子太叔使其除徒执用以立曰不忍庙也子产乃使辟之此两传实一事也鲁郑异国说者不同或谓葬时事或谓蒐时事而丘明则两记之何以明其然耶曰狃於小数而不知已非子大叔事也前既不忍毁以为惠矣俄而又自隳之亦非子产事也】十九年以持其世而已【陈氏曰传言楚之衰】楚夫人嬴氏至自秦【陈氏曰为二十年太子建奔起】饮大子止之药而卒【传序许止之弑语简事尽臣子於君父虽非故亦书弑春秋修辞兼礼法二传说者皆不及此张氏曰药剂之得失决死生於须臾疟疾未足以死而遽至於大故是药杀之也进药而药杀可不谓之弑哉所以异於商臣蔡般者过与故不同尔】大子奔晋【不书奔非故弑异於庆父宋万陈氏曰不书奔以弑君为义】同盟于虫【陈氏曰不书义同十六年蒲隧】以度而去之【孔氏曰纺为纺麻作纆也此妇人以麻纆度城高下令长与城等而去藏之去即藏也字书去作奔羌吕反谓掌物也今关西仍呼为奔东人轻言为去音莒】齐师入纪【传见外入邑不书成九年楚入郢特书之】其父兄立子瑕【孔氏曰按世本子游子瑕并公孙夏之子杜云叔父未详】惧队宗主【孔氏曰大夫继世为一宗之主恐队失也服?云祔主藏於宗庙故曰宗主少牢馈食大夫礼也大夫无主何所队乎】非抚之也【陈氏曰为定四年楚败张本】乃归蹶由【陈氏曰传言楚实不竞於吴乃反所执】二十年日南至【孔氏曰历法十九年为一章章首之

岁必周之正月朔旦冬至僖五年正月辛亥朔日南至是章首之岁年也计僖五年至往年合一百三十三年是为七章今年复为章首当言正月己丑朔日南至今传乃云二月己丑日南至是错名正月为二月也历之正法往年十二月後宜置闰月即此年正月当是往年闰月此年二月乃是正月故朔日己丑日南至也时史失闰往年错不置闰传於八月之下乃云闰月戊辰是闰在二月後也】太子建奔宋【陈氏曰奔非其罪虽太子不书义同莒郊公】执已以至【服氏曰城父人城父大夫也】公子地以为质【孔氏曰定十年经书宋公之弟辰时当景公之世辰及地不得为元公之弟也世族谱辰地皆为元公子此诸本皆云元公弟当时转写误耳】故齐豹【陈氏曰传见齐豹既夺司寇故书盗】使华齐御公孟【孔氏曰诸本皆华上有使字计华齐是公孟之臣自为公孟之御非齐氏所当使必不得有使字学者以上文有使祝鼃使一乘下有使华寅乘贰车使华寅执盖以此妄加使字今定本有使非也】公如死鸟【不书说在僖二十八年陈氏曰传言卫无政几以盗丧国所以书盗杀卫侯之兄】遂伐齐氏灭之【诛盗不告义同尉止】丁巳晦【孔氏曰丙辰丁巳乃是频曰其事既多不应二日之中并为此事今杜不云日误者以误在可知且宣二年壬申朝于武宫注云壬申十月五日既有日而无月冬又在壬申下明传文无较例又注哀十二年传云此事经在十二月蠡上今倒在下更具列其月以为别者传本不以为义例故不皆齐同如杜此言或传因简牒之辞不复具显其日月今按此说得之而未尽故刘侍读每疑传妄说见二十三年】公子朝【公子不书奔者卫人以杀宣姜故讳不告朝寻反国二十二年会救宋】齐侯疥遂痎【孔氏曰後魏李绘聘梁梁人袁狎与绘言及春秋说此事云疥当为痎痎是小痎痎是大痎以小致大非疥也按说文疥搔也痎热寒并作痎有热痎痎二日发痎是齐侯之痎初二日一发後遂频日热发故曰疥遂痎以此久不差若其不然疥搔小患与痎不类何云疥遂痎乎】祈望守之【孔氏曰此皆齐自立此名故与周礼不同山泽之利当与民共之言公立此官使之守掌专山泽之利不与民共故鬼神加怒而病也】故寛难【为政用猛非君子之道也或是因大叔所偏而矫之】政是以和【此非圣人之言善为政者寛不至慢猛不至残可也待其慢然後济之以猛见其残然後济之以寛则上下交相病久矣故刚柔无两用之道寛猛非相济之具左氏不得与七十子之徒接所引圣人语每多傳会】古之遗爱也【遗爱犹云德泽在人指从政言之】二十一年天王将铸无射【孔氏曰襄十九年季武子作林钟亦是钟声应林钟之律也此无射之钟在王城铸之敬王居洛阳盖移就之也秦灭周其钟徙於长安历汉魏晋常在长安及刘裕灭姚泓又移於江东历宋齐梁陈其钟犹在东魏使魏收聘梁收作聘游赋云珍是淫器无射高县是也及开皇九年平陈又迁於西京置大常寺时人悉共见之至十五年勅毁之】位在卑【孔氏曰丧大记国君初死之礼云既正尸子坐于东方卿大夫父兄子姓立于东方有司庶士哭于堂下北面郑玄云正尸者谓迁尸牖下南首也子谓大子子姓谓衆子孙也彼初死之时即别适庶况其至葬君道成矣失位明其不在适子位也位在卑盖处其庶兄之下】以齐鲍国归费之礼为士鞅【孔氏曰杜以周礼掌客诸侯牢礼各以其命数卿大夫来者亦当牢礼如其命数计鲍国齐卿不过三命於法当三牢而鲁人失礼为鲍国七牢也下云加四为十一知本七牢也】为十一牢【陈氏曰传积鲁不守礼之失】至相过也【孔氏曰日之行天一岁一周月之行天二十九日有余已得一周日月异道互相交错月之一周必半在日道里从外而入内也半在日道表从内而出外也或六入七出或七入六出凡十三出入而与日一会历家谓之交道通而计之一百七十三日有余而有一交交在望前朔则日食望则月食交在望後望则月食後月朔则日食此自然之常数也交数满则相过

非二至乃相过也传之所言以一分日夜等者春分之时朔则日在娄望则月在角秋分之时朔则日在角望则月在娄娄角是天之中道日月俱从中道故昼夜等似有体敌之理月可敌日冬至之时朔则日在斗望则月在井夏至之时朔则日在井望则月在斗斗井南北昼夜长短之极似若月之极长可以掩日然故云至相过谓絶相悬殊也此唯冬至耳言二至者全句以成文此皆假托以为言非实事也刘炫云此皆假其事以为等差其实灾之大小不如此也】故常为水【孔氏曰言其他非分至之月则为灾二十四年五月日食梓慎曰将水其年八月大雩又七年四月甲辰朔日食春分之时而云鲁卫恶之常水之言既无其验足知是假托日食以为戒耳】而不能送亡【送亡句絶孔说非】救宋【不书救宋以出奔为义说见属辞陈氏曰传言晋以诸侯之师救宋围南里不书与围彭城书法异】吕封人华豹张句为右【孔氏曰吕邑封人官名豹即下文华豹是也本或豹上有华释例谱一人再见名字不同皆两载之宋杂人内有吕封人豹华豹为一知此本无华也】不狎鄙【孔氏曰狎言更递也城谓豹女频射我不使我得更递是为鄙也豹服此言故抽矢而止豹亦不达军之战礼也】诸侯唯宋事其君【孔氏曰言诸侯之内唯宋之臣民善事其君以前未尝有叛逆者也俗本或无其字若无其字则是唯宋事楚检於时宋国不属楚也】故辞公【陈氏曰传言晋失诸侯】二十二年败齐师于寿余【传见帅贱不书并齐侯】已牺何害【孔氏曰牺者宠牲之名因以喻宠子言宠爱为牺者依法用牲今宠爱为牺者乃实用人他人宠之如牺後实招祸难矣己子宠之如牺有何害也牺者实用人人是对牲为称据凡人也人牺实难此人据疎外之人上下人意异】王弗应【孔氏曰贾逵以为太子寿卒景王不立适子郑衆以为寿卒王命猛代之後欲废猛立朝耳服以贾为然杜从郑说者二十六年传闵子马云子朝干景之命则景有命矣若子朝子猛并未有命俱是庶子朝又年长於次当立自求为嗣宜矣刘蚩何以恶其为乱而欲去之若俱未被立王意不偏羣臣无党王命为嗣则莫敢不从何须将杀单刘以立朝也】盟羣王子于单氏【孔氏曰猛朝俱是王子单刘必欲立猛明猛是次正当立故也猛为次正不知其本盖是太子寿之母弟或是穆后侄娣之子或母贵也安定胡氏曰十五年太子寿卒至此八年不更立者有母弟故也今按胡氏之说虽未若郑杜考传之精其明猛为次正则一也经书王猛所以定一时犹豫决千载嫌疑】于庄宫以归【孔氏曰敬王位定乃追谥之】以纳王于王城【陈氏曰不书晋义系於刘单今按经传时月不同由左氏所据史籍讹舛别无考证悉仍其旧以示传疑之法杜氏惟据长历辄云经误非也】敬王即位【孔氏曰敬王名句本纪文也本纪不言敬王是猛之母弟先儒相传说耳】二十三年二师围郊【孔氏曰围郊在叔鞅卒前告在叔鞅卒後故经书在後围郊在朔或亦在叔孙婼如晋之前】庚戌还【乱未弭而告间必二卿不亲事师不肃也观明年士景伯蒞问周故晋人乃辞子朝不纳其使则前此观望可知陈氏曰传去年言晋籍谈荀跖见书人】获鉏弱地【取邾师不书非侵伐】晋人来讨【刘氏曰是年正月有壬寅朔有庚戌有癸丑传叙邾事在庚戌之後经记叔孙如晋在癸丑之前夫庚戌癸丑四日耳邾人已能诉于晋晋人已能来讨何其神速也故曰不然今按左氏传采衆记以释经其附丽断截皆以经为主或先经以始事或後经以终义则所记之事各有本末自不容以日月次其先後如此年传自壬寅朔至庚戌还是记晋人围郊本末自邾人城翼至晋人来讨是原叔孙如晋之由非谓邾人城翼以後所记之事皆在庚戌後也如刘侍读所难则作传者必如近代所修日历而後可】尹圉诱刘佗杀之【陈氏曰传见尹圉召伯免奔不书名尹圉书氏并刘蚩单旗亦着不名之实】齐人纳郊公【陈氏曰传言郊公出入皆不书与郑忽异】帅贱【陈氏曰传见所以不书楚杜氏以遠越

非正卿是矣又言不书楚楚不自战何其戾也今按将虽卑师不可没夷狄交相败不书陈氏发例也亦自违之何也】吴子从之【不称吴子夷狄举号例後仿此】战于鸡父【释例曰泓之战书己巳朔鄢陵之战书甲午晦此书戊辰而不言晦者经传之见晦朔时史随其日而存之无义例也今按经传所书日月不同者多矣何独晦朔为异杜谓时史无义例非也】楚未陈也【刘氏曰吴乘楚师之求备而薄之犹未陈也故不言战】胡子髡沈子沉灭【闵公二年狄灭卫不言君灭此特举其君言之者懿公虽无道於其民犹云死社稷也胡沈之君幼而狂为楚所用而死故但指其身言之书法之有不同也】获陈夏啮【大夫生死皆曰获僖公元年获莒子之弟挈哀公二年获齐国书获之义同此】尹氏立王子朝【春秋之卒尹氏见尹氏世执周柄貽祸天家至是复背单刘立子朝寻俱奔楚】南宮极震【但言南宮极震则是以震死不必为屋所压】其三川震【周语云幽王二年西周三川皆震】西王【传见子朝所以书立】楚大子之母在郢【孔氏曰土地名郢是蔡地蔡在楚之东北故建母在郢得召吴人也】诸樊入郢【孔氏曰吴子诸樊吴王僚之伯父也僚子又名诸樊乃与伯祖同名吴人虽是东夷理亦不应然也此久远之书又字经篆隶或误耳】能无亡乎【孔氏曰子囊城郢君子谓之忠囊瓦城郢沈尹戌谓之必亡事不同者囊瓦畏吴侵逼不能远抚边竟唯欲近守城郭其事异故也】二十四年以甘桓公见王子朝【传见子朝之乱皆世臣实为之】尊晋也【说见十四年意如】泄问周故【孔氏曰晋助敬王久矣今使景伯如周问曲直者以子朝更强久竟未决晋人恐敬王不成更审其事故疑而使察之也晋人於此乃辞王子朝不纳其使则以前犹与往来其心两望至此始絶耳今按传见晋人犹未知适从】晋之耻也【传见王室之故天下责望在晋】期以明年【传见晋人怠於勤王】遂灭巢及鍾离【巢即五年遼后疆所城者本属楚小国故得言灭鍾离邑略非不告刘氏曰巢伯爵国非楚邑本书序巢伯来朝】二十五年曰明年将纳王【晋人徵会则曰明年纳王又曰明年传见不惟怠且观望】民之行也【孔氏曰人禀天地之性而生动作皆象天地但人有贤与不肖行有过与不及圣人制为中法名之曰礼易及尔雅并训履为礼是礼名由践履而生也人之本性自然法象天地圣人还复法象天地而制礼教之是礼由天地而来故子产论礼皆天地人三者并言之】是以长久【孔氏曰自夫礼至因地之性言礼本法天地也自生其六气至民失其性言天用气味声色以养人不得过其度也是故为礼以下言圣人制礼以奉天性不使过其度也】请终身守此言也【传见赵鞅不在王室】其将及乎【传云书所无也释经之义毕矣师已曰以下乃小说傳会之辞或云好事者所增益也】季氏介其鸡【孔氏曰郑衆云介甲也为鸡着甲高诱注吕氏春秋云铠着鸡头杜此二说皆不可解以邠氏为金距言之则着甲是也】其衆万於季氏【释例曰禘於大庙礼之常也各於其宫时之为也虽非三年大祭而书禘用禘礼也孔氏曰季氏私祭家庙与禘同日言将禘是豫部分也】先君之庙【孔氏曰杜以襄若以次递毁则庙与先公同处禘於襄公亦应兼祭余庙今特云禘於襄公似与先公异处故云盖襄公别立庙】大夫遂怨平子【传积季氏失人心之事】以察罪弗许【孔氏曰释例土地名襄十八年沂水出东莞盖县艾山南经琅邪东海至下邳县入泗此沂水出鲁国鲁县西南入泗水以其有二故辨明之】君必悔之弗听【传见公不能用子家子之言故失国】是无叔孙氏也【陈氏曰传言叔季於是始合】执冰而踞【孔氏曰方言弓藏谓之鞬或谓之犊丸此或说犊丸是箭箛其盖可以取饮十三年传云司铎射奉壶饮水谓执此也诗云抑释棚忌抑鬯弓忌鬯藏弓则冰藏矢也毛传云棚所以覆矢棚与水虽异音义则同是一器也】公徒将杀昭子【孔氏曰昭子谋归安衆而後纳公则独公得入从公伐季

氏者不得入故欲杀昭子也】戊辰卒【昭子有纳公之心軋於季氏不克而自杀原其志盖内畏臧邠及羣公子欲兼存叔季相为唇齿而已使其能以己邑为公邑已衆为公徒外请齐晋宋卫以讨季氏而纳公季氏虽强有不为戮乎使齐晋果援季氏亦不过能亡而已惜其蔽於患失而徒死也】公徒执之【孔氏曰古者马以驾车不单骑也曲礼云前有车骑者礼记汉世书耳经典无骑字刘炫谓左师展将以公乘马而归欲共公单骑而归此骑马之渐今按公羊传齐侯唁公于野井言以鞶为凡与此言乘马相合则当时固已有单骑者盖从公出者或车或骑也】所以藉干者【孔氏曰说文云楹方木也干脇也木以藉干明是棺中笊牀】齐侯围郕【陈氏曰传见经书取不言围他仿此】使为贾正焉【孔氏曰贾正如周礼之贾师也邠在後为季氏私邑此时尚为公邑故使贾正通计簿於季氏】倭句不余欺也【陈氏曰季臧亦交恶】二十六年齐侯取郕【经并上围书取传纪其实杜说非谷梁传曰以其为公取之故易言之其说皆通也】君若待于曲棘【孔氏曰曲棘宋地齐侯欲纳鲁君当是从齐向鲁必不远涉宋地土地名齐地无曲棘十年传桓子召子山而反棘焉此即彼棘也本无曲字涉上卒于曲棘误加曲耳】师及齐师战于炊鼻【战不书为鲁讳臣拒君也故齐师围成特书公以见义杜说非】?入者三寸【孔氏曰说文车軋下曲者襄十四年传称射两鞬而还盖胸鞬字通用耳繇即由也训为从也】谋纳公也【陈氏曰传载昭公十六年齐徐郟莒盟于蒲隧十九年宋郑郟徐盟于虫则诸侯有不待伯者而自盟会者久矣於是始书今按诸侯自相盟不书与外特相盟不书同义此以公会书】刘子以王出【孔氏曰二十三年传云六月庚寅单子刘子樊齐以王如刘盖从刘而居狄泉自狄泉又居於刘今为子朝所逐盖自刘而出也服?云出成周也按二十三年天王居于狄泉狄泉虽近成周成周不属王也其传云召伯奭南宮极以成周人戊戌二十四年传云王子朝用成周之宝珪于河是成周属子朝之验也二十五午黄父之会赵简子令诸侯之大夫云明年将纳王纳王者欲纳之於成周耳若敬王先在成周无为更须纳之知此出者从刘出耳】王次于滑【孔氏曰王虽未有安居终亦不出畿内知此皆周地陈氏曰传备敬王播迁之故】奉周之典籍以奔楚【传见尹氏毛伯名陈氏曰召伯召伯奭也杜言当称召氏非】陰忌奔莒以叛【王人叛史不书】王入于成周【东莱吕氏曰汉河南县即郟鄠周武王迁九鼎周公营以为都是为王城洛诰所谓卜涧水东瀍水西惟洛食者也汉洛阳县周公营下都以迁殷顽民是为成周洛诰所谓卜?水东亦惟洛食者也平王东迁定都于王城子朝之乱其余党多在王城敬王畏之徙都成周临川吴氏曰王城曰东都盖以镐京为周之西都东对西而言也成周曰下都盖以王城为洛之上都下对上而言也】王入于庄宫【陈氏曰传言敬王之乱四年而後定故经不与单刘以复辟之义而深罪晋汪氏曰传记王入于庄宫杜注庄宫在王城则敬王亦入王城矣三十二年书城成周盖敬王入王城而弗居遂定都成周也】王子朝使告于诸侯【传见子朝奔在王入前书在王入後王入乃告诸侯】以间王政【孔氏曰周本纪云彘之乱宣王在召公之宫国人围之召公以其子代太子太子竟得脱周召二公二相行政号曰共和元年是其释位与治王政之事也】而後效官【孔氏曰周本纪云共和十四年厉王死于彘太子靖长于召公家二相乃共立之为王是为宣王共和之年官之政事皆决於二相宣王长而立志二相乃致其官政於王也效者致与之义】用迁郟鄠【刘炫氏曰如国语史记之文幽王止立伯服为太子耳既虜褒姒必废其子未立为王而得称携王者或幽王死後褒姒之党立之为王也汲冢书纪年云平王奔西申而立伯盘以为太子与幽王俱死于戏先是申侯鲁侯及许文公立平王於申以本太子故称天王幽王既死而虢公翰又立王子余臣於携周二王并立二十一

年携王为晋文公所杀以本非适故称携王束皙云旧说携王为伯服伯服古文作伯盘非携王也】二十七年使延州来季子聘于上国【释例土地名延州来阙杜意谓吴地别有州来按十三年吴灭州来十九年楚人城州来则州来未为吴有可知二十三年吴伐州来楚薳越以诸侯之师奔命救州来师败二君灭楚师大奔二十四年吴更灭巢及鍾离则州来自薳越不能救卒为吴有可知矣然则季子所封不必别有其地吴世家季札封于延陵故号曰延陵季子故杜谓延陵其本封至此时又益以州来也孔氏曰吴地势卑下中国在其上流故谓中国为上国也亦不知其聘几国经不书来必不至鲁擅弓云延陵季子适齐於其反也其长子死葬於嬴博之间郑玄云鲁昭公二十七年聘於上国是也】以济师【孔氏曰都邑之士以君子为号故知是有复除者谓优复其身除其徭役贾逵云然今之律令犹名放课役者为复除或平常免其徭役事急乃使之周礼校人掌养马诸侯六闲养马之人多矣此唯养马不给余役今亦事急而徵使之】遇于穷【释例土地名穷阙】吾欲求之【孔氏曰吴世家云吴子寿梦有子四人长曰诸樊次曰余祭次曰余昧次曰季札季札贤而寿梦欲立之季札让不可乃立诸樊诸樊卒有命授弟余祭欲传以次必致国於季札余祭卒弟余昧立余昧卒欲授季札札让逃去於是吴人乃立余昧之子僚为王公子光者王诸樊之子也常以为吾父兄弟四人当传至季子季子不受光父先立光当立遂杀王僚光代立为王公羊传曰僚者长庶也世本云夷昧生光服?云夷昧生光而废之僚者夷昧之庶兄夷昧卒僚代立是用公羊为说也司马迁采世本为史记而今之世本与迁言不同世本多误不足依冯故杜以史记为正也光言王嗣者言已是世适之长孙也】是无若我何【言此事无人如我何】於鱼中以进【吴世家云鱄诸置?首於炙鱼之中以进食】事君如在国【事君如在国即後文贾马归从者衣屨之类此季孙之奸也杜氏乃以书公行告公至当之谬矣说在属辞】乃辞小国而以难复【传见诸侯皆欲纳公晋卿贪故弗克】此必败也【孔氏曰言尚有鬼神以助君此战必当败也况无鬼神乎】其饮酒也【礼诸侯相为宾有享食燕三礼享者享太牢以饮宾子家知齐侯必不为公设享礼第以享为辞耳】使宰献而请安【孔氏曰燕礼者公燕大夫之礼也公虽亲在而别有主人郑玄云主人宰夫也杜以宰献而请安谓齐侯请自安於别室不在坐也刘炫云按燕礼司正受命西阶上北面命卿大夫君曰以我安卿大夫皆对曰诺敢不安彼自请宾使自安当如彼使宰请鲁侯自安耳主人请安谓主人使司正请安于宾服?亦然今知不然者按乡酒礼宾主相敌主人亦请安于宾齐侯与公敌礼安宾乃是常事何须传载其文明是齐侯请欲自安慢公之甚今按下公请使重见则齐侯欲自安可知故子家得以君出使齐侯在坐鲁君岂容遽出也】二十八年辱在寡人【谓公先齐而後晋非谓不告】而後逆之【陈氏曰传言经所以书如晋次乾侯】长叔姒生男【孔氏曰子容是伯华之子其兄弟伯华最长叔向次之其余诸弟皆小於叔向故叔向为长叔叔向之妻其年长於子容之母故称长叔姒也尔雅释亲云长妇谓稚妇为娣妇娣妇谓长妇为姒妇自以身之长稚相谓也】皆举亲也【孔氏曰由武王克商得封建诸国功归於武王耳此十五国或有在後封者尚书康诰之篇周公营洛之年始封康叔于卫洛诰之篇周公致政之年始封伯禽于鲁九年传曰文武成康之封建母弟则康王之世尚有封国宣王方始封郑】勤施无私曰类【郑氏曰类善也无失类者不善之谓也】是以再叹【孔氏曰晋使卿为军将谓之将中军将上军及六国以来遂以将军为官名盖其元起於此】二十九年及原伯鲁之子【陈氏曰天子杀大夫不书例在桓十八年】陰不佞败之【陈氏曰虽王子叛亦不书】是尊是奉【孔氏曰王者祭木火土金水之神而以此人之神配之食非专祭此人也分五行以配四时故五行之神句

芒祝融之徒皆以时物之状而为之名此五者本为五行之神作名耳非与重该之徒为名也虽本非配人之名而配者与之同食亦得取彼神名以为配者神名犹社本土神之名稷本谷神之名配者亦得称社稷也今按传云木正曰句芒又曰使重为句芒以下皆然又云世不失业则句芒至后土亦是当时官名非为配食故得取所配神名以为称也】此其三祀也【孔氏曰穷桑少皞之号帝王世纪亦然贾逵云处穷桑以登为帝故天下号之曰穷桑帝定四年传称封伯禽於少皞之虚土地名穷桑阙言在鲁北相传云耳】以铸刑鼎【孔氏曰冶石为铁用橐扇火谓之鼓计令一鼓便足也】三十年非公且微过也【郛在境内故以书至书居为义乾侯晋地故书所在见公出在外杜陈皆曲傳传意】晋人不能诘【陈氏曰传言诸侯事晋之怠因见葬礼】三十一年子姑归祭【传见晋卿党於季氏昭公所以不得归国】其善志也【齐豹既夺司寇自不应书名非合书而不书者邾莒小国之臣接我则书名非不合书而书者传於鲁史书法类失考据曲说不近人情先儒非之宜也然齐豹乃齐恶之子公孟虽夺其司寇与邑而有役乃反之则犹在大夫之後与士不同而同书盗左氏发义盖以此如齐邾鄆閭职二人皆士也宜称盗而称人杜氏谓不称盗罪商人先儒亦非之二义交互不同皆未有不义之说公羊传曰大夫弑君称氏名贱者穷诸人大夫相杀称人贱者穷诸盗盖周制大夫士皆有上中下三等春秋大夫非卿乃称人穷诸人谓贱者非一等止於称人虽士之贱者亦居官食禄自当坐以弑君如邾鄆閭职不称盗是也穷诸盗谓贱者非一等止於称盗既非两下相杀则当坐以盗杀如齐豹非士而称盗是也苟称人以杀亦与讨乱无辨以公羊此义推左氏事实则二义皆得矣然盗杀蔡侯申自以蔡人讳弑君以盗杀赴公羊不知蔡盗乃诸大夫而又以贱乎贱为义遂与本例相违如两下相杀书名氏谷梁有例今乃谓大夫相杀书人何氏又妄为之注此传注家专门之敝春秋之旨所以未易明也】三十二年又不能用其人也【经书公在其义一也传作三等释之其失与不书即位同】况敢干位以作大事乎【传见狄泉之盟所以不书魏舒所以不序】不可以假人【史墨对赵简子与襄十四年师旷对晋侯皆释君助臣阿附强家所谓社稷无常奉君臣无常位乃党逆附篡之辞不可为训】

卷十

钦定四库全书

春秋左氏传补注卷十 元 赵汭 撰定公

元年魏子蒞政南面【臣视君位】魏子其不免乎【晋卿之侈僭踰于小国鄆泽之盟涉沱尚不以卫为封诸侯当时列国大夫视王室为何如岂惟易位以令为非义哉】以其未复命而田也【孔氏曰魏舒以辛巳会诸侯至庚寅相去唯十日耳魏舒始卒已得范鞅代者范鞅本是中军之佐於次当代魏舒盖晋人闻舒卒而驰使代之】孟懿子会城成周【前年冬会而令役新年乃赴功无再书之法杜注非】归诸京师【传见经不书以归归于京师】不可奸也【女寛之言不明君臣之义非知天者也晋伯宗亦曰天方授楚皆周末士大夫偷惰之论至范鞅谓季孙有天之赞则又托以文其奸皆邪说也】未尝不中吾志也【子家亟言於季孙今不知所言为何然是时内则臧邠二家以君徼幸外则齐晋大国无纳公之诚故子家子欲季孙改过逆公以归终全君臣之义则昭公必不至失国矣观其言曰意如事君不敢不改又曰通外内而去君君将速入则其所尝言於季孙者亦可知矣始则叔孙之谋平子有异志终则荀跖之唁衆从者胁公故事不遂】易几而哭【既昭公不获反国而薨于外则季孙逐君之罪终不可掩而君臣之义絶故子家子亦与季孙絶其不见叔孙即所以絶季孙也】羈弗敢知【有卿士大夫与守龟在则虽季孙亦不得专季孙怨公衍公为而絶昭公之世故答以不敢知】入可也【貌而出者非但与季氏无怨亦非能不屈於不义者】行可也【与季孙为讎者自不得不行季孙使叔孙听命於已故直辞以拒之】羈将逃也【言已则异於二者君知其出谓君生则从君而出也未知其入谓君薨而入是以君死为无知也晋语栾共子辞曲沃武公亦曰且君知成之从也未知其待於曲沃也语意正相似皆忠臣死生不貳之辞盖其心不义季氏而其言哀伤惨怛不恶而严如此】公即位【孔氏曰公羊谷梁皆云正棺於两楹之间然後即位按正棺两楹之间即丧大记君薨既小斂奉尸夷于堂者也此戊辰去癸亥五日非正棺之日不得为正棺即位也杂记云诸侯行而死归至於庙门遂入适所殡郑玄云适所殡谓两楹之间自外来者正棺於两楹之间尸亦夷之於此因殡焉殡必於两楹之间者以其死不於室而自外来留之於中不忍远也】将沟焉【孔氏曰氏犹言家谓公墓地为公氏言是公死之家宅也今按公氏当属上句时方为昭公兆域故使役徒往其所将沟而絶之】祷于燭公【孔氏曰既毀其庙而得祷者盖就祧而祷之】二年贼简公【不书义同昭七年单献公】楚囊瓦伐吴【陈氏曰传见囊瓦书人】师于豫章【释例上地名曰又柏举之役吴人舍舟于淮汭而自豫章与楚师夹汉此皆在江北淮南盖後徙在江南之豫章】获楚公子繁【陈氏曰不书败获并见吴入郢】三年鲜虞人败晋师于平中【陈氏曰不书败义同哀元年今按鲜虞非晋属不当与与国伐盟主同义凡夷狄败中国不书惟庄十年特书之】而请伐楚【陈氏曰传申言楚瓦之贪而失诸侯】四年谋伐楚也【陈氏曰传明此会刘文公实为之非出伯国之意经所以书公及诸侯盟杜氏会盟异处非是】康叔之兄也【孔氏曰史记管蔡世家云武王同母兄弟十人母曰大妣文王正妃也其长子曰伯邑考次曰武王发次曰管叔鲜次曰周公旦次曰蔡叔度次曰曹叔振铎次曰邰叔武次曰霍叔处次曰康叔封次曰聃季载如彼文则蔡叔周公弟也今以蔡叔为周公兄者以僖二十四年传

富辰言文之昭十六国蔡在鲁上明以长幼为次贾逵等皆言蔡叔周公兄故杜从之马迁言多辟繆故不用史记为说】分之土田陪敦【孔氏曰既封为大国地方五百里又分以土田更增彼寛厚为七百里也明堂位云封周公于曲阜地方七百里郑玄云公之地方五百里加鲁以四等之附庸方百里者二十四并五五二十五积四十九开方之得七百里周礼大司徒注云凡诸侯为牧正帅长及有德者乃有附庸故言锡之也】备物典策【服?氏曰备物谓国君威仪之物若今繖扇之属孔氏曰典策谓史官书策之典使依法书时事也】因商奄之民【孔氏曰昭九年传云蒲姑商奄吾东土也此复云因商奄之民则商奄是东方之国近鲁之地也昭元年传云周有徐奄杜以彼奄与此商奄共为一国诗称四国流言毛传以四国为管蔡商奄则商奄各自为国则此奄是也商谓纣子禄父下云管蔡启商是名禄父为商也今按传以商奄对蒲姑言之故杜氏不用毛传自以商奄为一国】命以伯禽【刘炫氏曰命以伯禽犹下命以康诰是伯禽为命书似书序穆王命君牙为周大司徒作君牙即以君牙为篇与此同也】疆以周索【孔氏曰王制云广谷大川异制民生其间异俗修其教不易其俗齐其政不易其宜此民习商之政为日已久还因其风俗开导以旧政也疆理土地以周法则三代经界法皆有异其异未尽闻也考工记器量铭曰时文思索郑亦以索为法】职官五正【孔氏曰职官五正谓五官之长子孙耳曲礼云天子之五官曰司徒司马司空司士司寇郑玄云此殷时制也然则殷时五官居在唐地世为贵族以赐唐叔使主领之所以宠荣唐叔也】唯不尚年也【孔氏曰伯犹多者以叔年稚於伯仲处叔而得多明其长者无所得为不尚年故也】以为已卿士【孔氏曰周公圻内诸侯二卿治事是为周公圻内采邑之卿也】藏在周府【孔氏曰本或为盟府】乃长卫侯於盟【释例曰周之宗盟异姓为後故践土之盟载书齐宋虽大降於郑卫斥周而言指谓王官之宰临盟者也其余杂盟未必皆然践土召陵二会皆蔡在卫上时国次也至盟乃正其高下者敬共神明本其始也春秋会盟之先同姓者唯谓王官之宰临盟时耳践土则王子虎盟诸侯于王庭此盟则刘子在焉故二者先同姓其余杂盟亦以国之大小为次襄二十七年宋之盟晋楚争先若其皆先同姓则楚不得竞也以此知余盟不然今按会以班爵为先後次序犹循盟府之旧典也以国之小大弱强为序当时伯者之习气也若参盟杂盟先後之次出自当时之意无一定也今蔡负屈奔晋本为复楚计也荀范辈不能恤蔡欲以长卫媚其欢心亦无聊之尤矣】蔡侯吴子唐侯伐楚【陈氏曰唐侯不书说在宣十二年】子常之卒奔【陈氏曰传见囊瓦书人】楚子取其妹季?畀我以出【服?氏曰季?许嫁而字畀我季?弟也世族谱季?与畀我二人皆平王女也】以奔吴师【服?氏曰惊却其衆使王得脱孔氏曰执而牵向吴师乃放之】王奔郢【未出境同僖二十八年卫侯】以王奔随【孔氏曰土地名郢江夏云杜县则是楚之西南随义阳随县其国在楚之东也吴师犹尚在楚更东来奔随国者盖为楚与随有恩可保守也】周室何罪【传见吴子所以特书爵为其事与夷狄相败不同虽齐桓召陵之役其辞令未尝及此】吴人乃退【随人知吴必不能定楚】五年王人杀子朝于楚【陈氏曰杀王子朝不书义同子颓】改步改玉【孔氏曰王藻云君与尸行接武大夫继武士中武郑玄云尊者尚徐接武蹈半迹继武迹相及中武迹间容迹是君臣步不同也玉藻又云公侯佩山玄玉大夫佩水苍玉是君臣玉不同也】以救楚【传见秦救楚不书】不能如辞【孔氏曰敢为不敢如为不如古人之语然也僖二十二年传云若爱重伤则如勿伤爱其二毛则如服焉经传之文此类多矣】六年为晋讨郑之伐胥靡也【杜氏知匡归晋者以非邻国不能有其地】往报夫人之币【孔氏曰聘礼者诸侯使卿聘邻国之礼也执圭以致君命执璧以致享币其於夫人则聘用璋享用琮聘

君与夫人一使兼致之夫人不别使也传言报夫人之币则晋之夫人尝有聘鲁者矣礼夫人不别遣使则晋之夫人聘者亦为晋君来聘也经无其事盖遣大夫来聘名氏不合见经故略之也【孔氏曰桓子聘晋君懿子报夫人似共为一使若宾与介然故晋兼享之贱鲁故不复两为设礼传言此者明经所以不各自立文两书如晋也陈氏曰传言经所以累书之】负黍狐人阙外【传见诸侯侵叛皆不书】七年入于仪栗以叛【陈氏曰不书例在昭二十六年】阳虎居之以政【陈氏曰为昭公取地非侵地比杜说非是】徵会于卫【陈氏曰郑叛晋】乃盟于琐【陈氏曰卫叛晋】八年中颊殪【孔氏曰释言云毙仆也孙炎云前覆曰仆然则仆是前覆偃是却倒颜高被击而仆乃转而仰且射子鉏犹死言其善射之功然】乃止诸州【陈氏曰宋叛晋】齐国夏高张【高张不书同襄元年荀偃】卫人请执牛耳【孔氏曰盟用牛耳卑者执之尊者涖之周礼戎右云盟则赞牛耳郑玄谓尸盟者割牛耳取血助为之尸盟者执之襄二十七年传曰诸侯盟小国固必有尸盟者是小国主备办盟具宜执牛耳哀二十七年传曰公会齐侯盟于蒙孟武伯问於高柴曰诸侯盟谁执牛耳季羔曰鄆衍之役吴公子姑曹发阳之役卫石魋武伯曰然则魋也鄆衍吴为盟主不知盟礼而自使其臣执之发阳宋鲁卫三国卫为小蒙则齐鲁二国鲁为小皆是以小国执牛耳而尊者涖之今卫侯与晋大夫盟自以当为盟主宜涖牛耳故请晋大夫使执之】及挽【传不言见血杜注甚矣言及挽者以大夫辱国君详其事也】成桓公【陈氏曰成桓公不书专讥晋经故特书遂杜说非自晋厉以来王人多会伐者矣】禘于僖公【传见讥不在禘不书禘】九年乃逐桐门右师【陈氏曰传言乐大心书奔义同高止】用其竹刑【孔氏曰下云弃其邪可也则邓析不为私作刑书而杀盖别有当死之罪驷黻不矜免之耳】得用焉曰获【刘氏曰失得相对言得所以见失也若器必言得郤大鼎何以言取乎】寝於其中而逃【孔氏曰贾逵云葱灵衣车也有葱有灵说文云輜輶衣车也前後有蔽然则此车前後有蔽两旁开葱可以观望葱中豎木谓之灵今人犹呼葱木为灵子】齐侯伐晋夷仪【陈氏曰不书伐晋义同哀元年】在中牟【孔氏曰此中牟在晋竟内也汉书地理志云三家分晋河南之中牟魏分也杜言荥阳有中牟县谓此河南之中牟也此言晋车在中牟哀五年赵鞅伐卫围中牟论语佛肸为中牟宰当於河北别有中牟】以五家免【孔氏曰服?云是时齐克夷仪而有之故得优具徭役然夷仪故邢都也邢灭入卫後乃属晋不必永为齐有当时暂得之耳】与直盖【孔氏曰说文轩曲輶也谓轩车有藩蔽也鱼轩以鱼皮为饰犀轩当以犀皮为饰也】十年及齐平【陈氏曰鲁叛晋自齐五氏之役诸侯始伐盟主及齐平则鲁从之矣传并於明年郑事发之】亦如之【陈氏曰平不书盟义同宋楚杜说非】齐人来归郛讙龟陰之田【叶氏曰夹谷之事谷梁家语与左氏略同此非圣人所为好事者为之也方阳虎请师以伐我齐且不乘乱以求得志於鲁何有一犁弥之言遽求劫我於仓卒乎左传谓孔子以公退曰士兵之谷梁谓孔子历阶而上不尽一等而视归乎齐侯此与太史公书曹沫事相类沫劫齐侯反其侵地学者固知非实今又缘沫事谓孔子求汶阳之田可乎】侯犯以郕叛【陈氏曰内叛但书围义见昭十二年】母弟辰暨仲佗石彊出奔陈【传重言母弟辰见地虽辰兄非公母弟故不得称弟申明母弟例後年入萧经书辰首恶而地序仲石下以贵贱序之】十二年将墮三都【释例曰三都强盛以夺三家之权陪臣执政下陵上替故仲由墮之而仲尼不禁也孔氏曰公羊传曰孔子行乎季孙三月不违曰家无藏甲邑无百雉之城於是墮郕墮费左氏不言孔子之计当是仲由自立此谋传称费人袭鲁而仲尼在焉是仲尼知其事谓墮之为是故不禁也】乐颀下伐之【史记孔子世家云定公以孔子为中都宰一年四方皆则之由中都

宰为司空由司空为大司寇十年会于夹谷时已为司寇矣十四年由大司寇摄行相事是此时仲尼为司寇【公围成弗克【传见堕三都仲由尝建议於季氏其以为夫子之意者盖春秋後学者臆度言之叶氏曰自阳虎叛季氏叔孙氏皆屈於家臣故南蒯以费叛侯犯以郈叛堕郈堕费二氏自为计而欲去其险尔夫何有於仲由此亦尊孔子而反卑之者也】十三年使师伐晋【陈氏曰再不书伐晋】以邯郸叛【外邑叛史不书】赵鞅奔晋阳【鞅以范中行氏见伐出奔而经书叛者时二家伐之围之皆禀君命故晋人以叛告也观荀跖言於晋侯可见】请皆逐之【三臣始祸而独逐鞅不钧故并逐之陈氏曰传言经所以不独罪鞅而书范中行氏以此见晋范荀亡而韩赵魏益大】十四年太子奔宋【张氏曰蒯聩欲杀南子安有此事且杀夫人蒯聩独得全乎彼之所羞者以志入名恶也如杀其母为恶愈甚矣反不知可羞乎盖蒯聩闻野人之歌其心慙焉则以谓夫人夫人恶其斥己之淫啼而走言太子将杀余以诬之灵公惑於南子所言必听从又蒯聩出奔宋宋南子家也蒯聩负杀南子之名而敢奔其母家此亦一证也今按传记此事殊不近人情灵公惑於南子为之召宋朝逐公叔戎使蒯聩弑其母将安归如蒯聩有无君之心则所谋必不止於此既蒯聩无今将之恶则又安敢谋害南子哉戏阳速之言盖迎合夫人之意以免祸非事实也】十五年郑罕达败宋师于老丘【陈氏曰书伐不书败例在文十一年】不赴且不祔也【定公未葬而夫人卒丧礼不成故不赴诸侯则有之苟为不祔则是无故黜君母於庙事必不然若曰不祔而径迁庙则恐无此理亦与声子言不祔者异二传谓定嬖者哀公妾母亦非定嬖从夫谥而终定哀之世他无定夫人丧此为适母明矣】不成丧也【杜氏谓烦於丧礼不赴可也祔祭礼简既不以速葬同月为烦岂以祔为烦乎】

哀公

元年越不告败也【樛李之败吴子光卒焉既以实来告则入越为父报讐宜无不告者传不知笔削之法说在属辞】围五鹿【陈氏曰并入下伐晋书】取棘蒲【鲁不书讳伐盟主陈氏曰自五氏之役齐卫凡三伐晋於是始书重书之也】二年三揖在下【周礼司士云孤卿特揖大夫以其等旅揖士旁三揖郑玄云特揖一一揖之旅衆也大夫爵同者衆揖之三揖者士有上中下郑衆云卿大夫士皆君之所揖礼春秋传所谓三揖在下】乃立辄【陈氏曰传见立辄非灵公意】使太子纁【孔氏曰礼不至丧所不括髮故以纁代之士丧礼注免之制未闻旧说以为如冠状广一寸丧服小记曰斩衰括髮以麻免以布此用麻布为之自项中而前交於额上卻绕紒也】不设属辟【陆德明氏曰礼记云夫子制於中都四寸之棺五寸之槨郑康成注云此庶人之制也按礼上大夫棺八寸属六寸下大夫棺六寸属四寸无三寸棺制也棺用难朽之木桐木易坏故以为罚孔氏曰大棺之内有属属之内有裊裊亲之之棺郑玄云大夫无裊赵简子云不设属裊时僭也】无入于兆【周礼冢人云凡兵死者不入兆域】大命不敢请【孔氏曰上言军之士衆无令损伤此谓己之身命不敢私请】四年公孙翩【传见公孙翩书盗】锴遂杀之【以盗赴故杀翩不告】会鲜虞纳荀寅于柏人【陈氏曰传见诸侯多救荀范且为伐鲜虞起】五年荀寅士吉射奔齐【不书奔齐以书叛见义以齐卫伐晋为重陈氏曰传见经不书晋荀寅士吉射自朝歌出奔齐与华向异】公子阳生来奔【陈氏曰阳生不书奔说在文十四年】六年葬诸父冒淳【陈氏曰传备载鲍牧朱毛见蔽罪於陈乞且言去高国所以弑荼】七年不亦可乎【孔氏曰王制云君十卿禄鲁牢晋大夫

过十故吴王自谓合得百牢】则有常数矣【周礼大行人云上公九牢侯伯七牢子男五牢】不过十二【孔氏曰周礼掌客云王合诸侯而飨礼则具十有二牢郑玄云飨诸侯而用王礼之数者以公侯伯子男尽在是兼享之莫敌用也以莫敌用故用王礼是天子之礼十二牢也】有由然也【传见吴不以诸侯相接故书法与楚异】季康子欲伐邾【陈氏曰传言伐邾虽书实季氏意】夏盟於鄆衍【说见襄五年】使为司城以听政【传见曹亦有司城司城非宋官然则孟子言孔子主司城贞子为陈侯周臣亦陈之司城耳当时列国官制沿革今不可考】八年遂灭曹【不书灭郑方救曹以入告同姓】杀之【不书杀之异沈子嘉史为同姓故讳之也】问於叔孙辄【孔氏曰定十二年叔孙辄与公山不狃帅费人以袭鲁兵败奔齐於後自齐奔吴吴子今问之】死之可也【孔氏曰既臣之後则身是新君之臣性命非复已有故不复得为旧君死节也若未有臣服则旧君之恩未絶故可还奔旧君之命死其难也言奔命则有命乃奔之若命不及亦不当还】若使子率【孔氏曰率谓在君前引道率领先行故云子辞王将使我以其知鲁道者唯此二人故也】取讙及阚【程氏曰经书以邾子益来吴伐我齐人取讙及阚又书归邾子益于邾齐人归讙及阚比事昭然左氏乃以季康子妻妹之事当之此与齐桓蔡姬事相类今按杜氏见经不言伐与传违用公羊赂齐之说言鲁与之邑若然何不即归邾子既与之邑又归邾子齐人乃以二邑归之不近人情】奉太子革以为政【陈氏曰传释邾益以自奔为文不得与曹羈同据曹羈当书吴伐邾】及齐平【陈氏曰再平不书】齐闻丘明来涖盟【交涖不书皆非卿】九年遇水适火【服氏曰兆南行适火卜法横者为土立者为木邪向经者为金背经者为火因兆而细曲者为水】十年故遂奔齐【再奔不书】师于郕【陈氏曰传见吴子称国邾邾不书义同城濮杜说非】吴延州来季子救陈【季札不书君臣同辞】乃还【孔氏曰襄昭之传称延州来季子者皆是季札也孙毓以为季子食邑於州来世称延州来季子犹赵氏世称赵孟知氏世称知伯延州来季子或是札之子与孙也】十一年可无殇也【孔氏曰丧服大功章云女子子之长殇中殇传曰何以大功未成人也年十九至十六为长殇十五至十二为中殇十一至八岁为下殇不满八岁以下皆为无服之殇其於服长殇中殇降成人一等下殇降二等此汪錡盖长殇也时人疑其当降服又葬殇之礼亦异成人檀弓云周人以殷人之棺槨葬长殇以夏后氏之塋周葬中殇下殇以有虞氏之瓦棺葬无服之殇】歌虞殡【孔氏曰礼殡而葬反日中而虞盖以启殡将虞之歌谓之虞殡】东郭书【四子不书例在宣二年】卫赐进【孔氏曰子贡卫人故称卫赐】齐至无日矣【陈氏曰终上文吴将伐齐传】召之乃归【孔子世家云季康子使公华公宾公林以币迎孔子孔子归】欲以田赋【孔氏曰贾逵以为欲令一井之间出一丘之税并别出马一疋牛三头若其如此则一丘之内有一十六井其出马牛乃多於常一十六倍且直云用田赋何知使井为丘也杜以旧制丘赋之法田之所收及家内资财并共一马三牛今欲制其田及家资各为一赋计一丘民之家资令出一马三牛又田之所收更出一马三牛是为所出倍於常也旧田与家资同赋今欲别赋其田故言欲以田赋也】十二年故不书姓【释例曰为昭公加讳不复系吴改其姓号论语谓之吴孟子盖时人常言非经传正文也孔氏曰坊记云鲁春秋去夫人之姓曰吴其死曰孟子卒是旧史书为孟子卒及仲尼修春秋因而不改去夫人之姓曰吴春秋无此文坊记云然者礼夫人初至必书于策若娶齐女则云夫人姜氏至自齐此孟子初至主时亦当书曰夫人姬氏至自吴同姓不得称姬旧史初书盖直云夫人至自吴是去夫人之姓直书曰吴而已仲尼修春秋以犯礼明着全去其文故今经无其事】放經而拜【孔氏曰刘炫云按十六年仲尼卒哀公諱之子贡讥云生不能用又

世家及诸书无云仲尼仕於哀公杜焉得云孔子始老乎今知不然者以上十一年传称仲尼在卫鲁人以币召之是召之而来当以任用故冉有云子为国老待子而行後乃致事丧服齐衰三月章曰为旧君君之母妻传曰为旧君者孰谓也仕焉而已者也何以齐衰三月言与民同也君之母妻则小君也郑玄云仕焉而已者谓老苦有废疾而致仕者也为小君服者恩深於民也是其服与民同不服臣为小君之服故与常吊也礼齐衰之丧始死而纁孔子以季氏当为臣服小君之礼故以小君礼往吊大夫之吊服弁絰郑玄云弁絰者如爵弁而加环絰曲礼云凡非吊丧非见国君无不答拜者郑玄云丧宾不答拜不自宾客也礼吊无拜法而此言孔子放絰而拜者记言丧宾不答拜谓丧主既拜宾宾不答拜耳其初见主人或吊者先拜据此传文必有拜法记无其事记不具耳】宋皇瑗盟【陈氏曰杜说非】司历过也【说在襄二十七年】十三年单平公【陈氏曰单平公不书不忍书也杜说非】获大子友【陈氏曰吴越相获虽大子不书】辛丑盟【说见襄五年】季辛而毕【孔氏曰周之十月非祭上帝先公之时且祭礼终朝而毕无上辛尽於季辛之事景伯以吴信鬼故虚言以恐吴耳】十四年西狩於大野【传见不言地】获麟【孔氏曰家语说此事云叔孙氏之车士曰子鉏商王肃云车士将车者也子姓鉏商名今传无士字服?云车车士微者也子姓鉏商名】

春秋左氏传补注卷十